

## ISIRELIBAN SANUM GBABURU CCS

Gabu ba tire te ȳisiru kāwa Gari Gari yèn sō te sōora ba Isireliba gara sanam mē ba yarima Egibitin di. Adama sà n mēera sāa sāa, sa ko wa ma ȳisi te, ta n̄ ka tire ten gari kpuro yā. Domi ten gari mero ya sāawa Isireliban sirenabu wōo weerusinain ḡbaburō. Yen sōna ba tu soka ka Heberum Gbaburun Tireru. Wōo wee te sōo, Isireliba ba wurura ba nuki sankira, ba ben gutururu sōosi ka sere ben naane sariru Yinni Gusunōn mi, ye ba ka nūn seesi nōn dabiu. Adama Yinni Gusunō u n̄ ka bu kōsa nēnu. U bu win durom ka win tōn geeru sōosiwa. Ka mē, u ku rā de u kun bu s̄eeyasie. Domi u sāawa gemgii.

*Tire ten kpunaa*

1. Sanum sōoru, wiru 1n di sere wiru 10:10.
2. Isireliban sanum Sinain guurun di n̄ ka da Mōabuban temō, wiru 10:11n di sere wiru 21.
3. Isireliba Mōabuban temō, wiru 22n di sere wiru 25.
4. Kananin tem dubun sōoru, wiru 26n di sere wiru 36.

## ISIRELIBA BA WĀA SINAIN GBABURU

*Ba Isireliba gara*

- 1 Ye Isireliba ba yarima Egibitin di, yen wōo yirusen suru yirusen tōo ḡbiikiru sōora Yinni Gusunō u ka Mōwisi gari kua win kuu bekurugirō,

gbabu te ba mò Sinai. <sup>2</sup> U nεε, i Isireliban tən durəbu kpuro gario, wune ka Aroni, yεnu ka yεnu, bwese kera ka bwese kera, kpa i baawuren yīsiru yore. <sup>3</sup> I bu gario be ba wāā tabu wuunu səə, saa be ba wōō yεndu mən di sere ka be ba kere mε, be ba koo kpī bu tabu ko. <sup>4</sup> Bwese kera baayeren guro gurowa u koo bεε somi. <sup>5</sup> Be ba koo bεε somi mi, beya,

Elisuri, Sedeurin bii, Rubenin bweseru səə,  
<sup>6</sup> ka Selumieli, Surisadain bii, Simeon bweseru səə,  
<sup>7</sup> ka Nasoni, Aminadabun bii, Yudan bweseru səə,  
<sup>8</sup> ka Netaneeli, Suarin bii, Isakarin bweseru səə,  
<sup>9</sup> ka Eliabu, Helonin bii, Sabulonin bweseru səə,  
<sup>10</sup> ka Elisama, Amihudun bii, Efaraimu, Yosefun biin bweseru səə,  
 ka Gamulieli, Pedasurin bii, Manase, Yosefun bii turo goon bweseru səə,  
<sup>11</sup> ka Abidani, Gideonin bii, Benyameen bweseru səə,  
<sup>12</sup> ka Akiesee, Amisadain bii, Danun bweseru səə,  
<sup>13</sup> ka Pagieli, Okiranin bii, Asen bweseru səə,  
<sup>14</sup> ka Eliasafu, Dewelin bii, Gadon bweseru səə,  
<sup>15</sup> ka sere Ahira, Enanin bii, Neftalin bweseru səə.

<sup>16</sup> Guro guro be ba gəsa mi, ba sāawa Isireliban tabu sinambu. <sup>17</sup> Ma Məwisi ka Aroni ba təmbu wokura yiru ye sua bèn yīsinu ba sia mi. <sup>18</sup> Ma ba Isireliba kpuro soka ba mənna wōōn suru yirusen tōō gbiikiru səə, ma ba bu gara bwese kera ka bwese kera, yεnu ka yεnu, saa tən durə be ba wōō yεndu mən di sere ka be ba kere mε, ma ba ben yīsa yorua. <sup>19</sup> Məwisi u bu gara Sinai gbaburə nge mε Yinni Gusunə u nūn səəwa.

<sup>20-43</sup> Ba Isireliban bwese kera baayeren təmbu gara yεnu ka yεnu. Ma ba ben yīsa yorua saa be

ba wɔ̄o yendu mɔ̄n di, be ba koo kpī bu tabu ko.  
Ba garim toruawa ka Rubeni, Yakəbun bii gbiikoon  
bwese kera. Tən ben geeru wee.

Rubenin bweseru sə̄o, ba sāawa təmbu nərəbun  
suba weeru ka nə̄oba tia ka neera wunəbu (46.500).  
Simeon bweseru sə̄o, ba sāawa təmbu nərəbun  
suba weeraakuru ka nə̄oba nn̄e ka gooba wunəbu  
(59.300).

Gadin bweseru sə̄o, ba sāawa təmbu nərəbun suba  
weeru ka nə̄obu ka nata ka weeraakuru (45.650).  
Yudan bweseru sə̄o, ba sāawa təmbu nərəbun suba  
wata ka wəkura nn̄e ka nata (74.600).

Isakarin bweseru sə̄o, ba sāawa təmbu nərəbun  
suba weeraakuru ka nn̄e ka neeru (54.400).

Sabulonin bweseru sə̄o, ba sāawa təmbu nərəbun  
suba weeraakuru ka nə̄oba yiru ka neeru (57.400).

Efaraimu, Yosefun biin bweseru sə̄o, ba sāawa  
təmbu nərəbun suba weeru ka neera wunəbu  
(40.500).

Manase, Yosefun biin bweseru sə̄o, ba sāawa təmbu  
nərəbun suba təna ka yiru ka goobu (32.200).

Benyameen bweseru sə̄o, ba sāawa təmbu nərəbun  
suba təna ka nə̄obu ka neeru (35.400).

Danun bweseru sə̄o, ba sāawa təmbu nərəbun suba  
wata ka yiru ka nata ka wunəbu (62.700).

Aseen bweseru sə̄o, ba sāawa təmbu nərəbun suba  
weeru ka tia ka neera wunəbu (41.500).

Nefitalin bweseru sə̄o, ba sāawa təmbu nərəbun  
suba weeraakuru ka ita ka neeru (53.400).

<sup>44</sup> Tən be Mɔ̄wisi ka Aroni ka Isireliban guro  
gurobu wəkura yiru ye, ba gara, ben geera mi. <sup>45</sup> Ba  
bu garawa saa be ba wɔ̄o yendu mɔ̄n di sere ka be ba  
kere mε, be ba koo kpī bu tabu ko. <sup>46</sup> Be kpuron  
geera kuawa təmbu nərəbun suba nata ka ita ka  
neera wunəbu ka weeraakuru (603.550).

*Lefiban bweserun səmburu*

<sup>47</sup> Bañ Lefiban bweserə təmbu gara, <sup>48</sup> yèn sə Yinni Gusunə u raa Məwisi səjwə u nee, <sup>49</sup> Isirelibə səə, a ku Lefiban bweserun təmbu gari. <sup>50</sup> Kaa de bu ne, Yinni Gusunən kuu te nəəriwa ka ten dendi yānu ka ye ya wāa mi kpuro, beya ba ko n da ye kpuro səbe. Kpa bu ben kunu gira bu ka ne, Yinni Gusunən kuu te sikerena. <sup>51</sup> Isirelibə bà n seewa, Lefibara ba ko n da kuu te kure. Bà n koo maa ben sansani gira, ba ko n da Yinni Gusunən kuu te girewa. Tən tuko ù n tu besu, ba koo nùn gowa. <sup>52</sup> Isireli be ba maa tie, ba koo sinawa ben bwese keran wuuru səə, ben baawure u yəra mi ben gidi bəra ya gire nge me ba bu bənu sāa. <sup>53</sup> Adama Lefiba ba koo ben sansani girawa bu ka kuu te sikerena mi woodan kpakorora wāa. Nge meya ba koo ka tu kōsu. Saa ye səə, Isireliba bañ maa wasi bu tu susi n sere ka bu məru ko.

<sup>54</sup> Ma Isireliba ba Yinni Gusunən wooda ye kpuro məm nəəwa mam məm ye u Məwisi wē mi.

*Nge me Isireliba*

*ba koo ka sinasina ben sansani*

**2**

<sup>1</sup> Yinni Gusunə u Məwisi ka Aroni səjwə u nee, <sup>2</sup> Isirelibə bà n ben sansani giramə, ben baawure u koo win kuru girawa win bweserun gidi bəran bəkuə. Ba koo ben kuu ni girawa bu ka ne, Yinni Gusunən kuu te sikerena, kpa begii ni, nu n ka tu desire fiiko.

<sup>3</sup> Səə yari yeru giara Yudaba ba koo ben sansani gira ben gidi bəran bəkuə be, ka ben tabu kowobu. Ben tabu sunən yīsira Nasoni, Aminadabun bii.

**4** Win tabu kowobun geera sāawa nərəbun suba wata ka wəkura nnə ka nata (74.600).

**5-7** Be ba ko n wāa ben wuuru sāo bera, Isakarin bwese kera ka Sabulonin bwese kera.

Isakarin tabu sunən yīsira Netanəeli, Suarin bii. Win tabu kowobun geera sāawa nərəbun suba weeraakuru ka nnə ka neeru (54.400).

Sabuloniban tabu sunən yīsira Eliabu, Helonin bii.

**8** Win tabu kowobun geera sāawa nərəbun suba weeraakuru ka nəəba yiru ka neeru (57.400).

**9** Be kpurowa ba sāa Yudaban tabu kowobu ma ben geera kua nərəbun suba wunəbu ka wəne ka nəəba tia ka neeru (186.400).

Isireliba bà n sanum seewa, bera ba ko n da gbi.

**10** Sāo yēsan nəm dwaru giara Rubeniba ba koo ben sansani gira ben gidi bəran bəkuə be, ka ben tabu kowobu.

Ben tabu sunən yīsira Elisuri, Sedeurin bii.

**11** Ben tabu kowobun geera sāawa təmbu nərəbun suba weeru ka nəəba tia ka neera wunəbu (46.500).

**12-14** Be ba ko n wāa ben wuuru sāo, bera Siməən bwese kera ka Gadin bwese kera.

Siməəban tabu sunən yīsira Selumieli, Surisadain bii. Ben tabu kowobu ba sāawa təmbu nərəbun suba weeraakuru ka nəəba nnə ka gooba wunəbu (59.300).

Gadigibun tabu sunən yīsira Eliasafu, Dewəlin bii.

**15** Ben tabu kowoba sāqwa təmbu nərəbun suba weeru ka nəəbu ka nata ka weeraakuru (45.650).

**16** Be ka Rubenin tabu kowobu kpuro ba sāawa təmbu nərəbun suba wunəbu ka weeraakuru ka tia ka neeru ka weeraakuru (151.450).

Beya ba koo ko yiruse bà n swaa wəriə.

**17** Yen biru, Lefiba ba koo Yinni Gusunən kuru sua kpa ba n wāa tabu kowo wuunu yiru ye ya gbia

ka wuunu yiru ye ya wāa biruən suunu səə. Ben tii ba ko n swiñnewa nge mē ba ra ka sine sine bà n sansani giramə. Ben baawure u koo yɔ̄rawa win gidi bəran bəkuə.

**18** Səə duu yeru giara Efaraimuba ba koo ben sansani gira ben gidi bəran bəkuə be, ka ben tabu kowobu.

Ben tabu sunən yīsira Elisama, Amihudun bii.

**19** Win tabu kowobun geera sāawa təmbu nərəbun suba weeru ka neera wunəbu (40.500).

**20-23** Ben wuuru səəra Manaseba ka Benyameεba ba koo ben sansani gira.

Manaseban tabu sunən yīsira Gamulieli, Pedasurin bii.

Win tabu kowobun geera sāawa təmbu nərəbun suba təna ka yiru ka goobu (32.200).

Benyameεban tabu sunəwa Abidani, Gideonin bii. Win tabu kowobun geera sāawa təmbu nərəbun suba təna ka nəəbu ka neeru (35.400).

**24** Be kpuro ka Efaraimun tabu kowobun geera kuawa təmbu nərəbun suba wunəbu ka nəəba ita ka wunəbu (108.100).

Bera ba ko n sāa itase bà n swaa wəriə.

**25** Səə yēsan nəm geu giara Danuba ba koo maa ben sansani gira ben gidi bəran bəkuə be, ka ben tabu kowobu.

Ben tabu sunən yīsira Akiesee, Amisadain bii.

**26** Win tabu kowobun geera sāawa təmbu nərəbun suba wata ka yiru ka nata ka wunəbu (62.700).

**27-30** Ben wuuru səəra Aseεba ka Nefitaliba ba koo du.

Aseεban tabu sunən yīsira Pagiel, Okiranin bii.

Ben tabu kowobun geera sāawa təmbu nərəbun suba weeru ka tia ka neera wunəbu (41.500).

Nefitaliban tabu sunən yīsira Ahira, Enanin bii.  
Win tabu kowobun geera sāawa təmbu nərəbun  
suba weeraakuru ka ita ka neeru (53.400).

<sup>31</sup> Be kpuro ka Danuba ben geera kuawa təmbu  
nərəbun suba wunaa wata ita sari ka nata (157.600).

Isireliba bà n swaa wəri, kpa ben baawuren gidi  
bora ya n bu gbiiye, bera ba koo be ba tie swīi biru.

<sup>32</sup> Isireli be ba koo kpī bu tabu ko, ben geera  
kuawa nərəbun suba nata ka ita ka neera wunəbu  
ka weeraakuru (603.550). Ba bu garawa bwese  
kera ka bwese kera, yənu ka yənu. <sup>33</sup> Ban Lefiban  
bweseru gara yèn sō Yinni Gusuno u Məwisi səəwa  
u ku bu gari.

<sup>34</sup> Ma Isireliba ba kua mam mam ye Yinni  
Gusuno u Məwisi səəwa. Ben baawure u win  
sansani girawa mi ben gidi bora ya gire. Yen biru,  
bà n seewa ba swaa wəri, ba ra n swīinewa bwese  
kera ka bwese kera, yənu ka yənu.

### *Lefin bweserun səmburu*

## 3

<sup>1</sup> Tən be ba wāa Aroni ka Məwisin bwese kera  
səə sanam me Yinni Gusuno u ka Məwisi gari kua  
Sinai, ben yīsa wee. <sup>2</sup> Bibu nnewa Aroni u mə.  
Gbiikoon yīsira Nadabu. Be ba maa tie bera, Abihu  
ka Eleasaa ka Itamaa. <sup>3</sup> Be kpurowa ba gum tāre  
bu ka ko yāku kowobu, ma ba bu yi nənəm səmbu  
ten sō. <sup>4</sup> Adama Nadabu ka Abihu ba gu sāa yerun  
kənnəwə Sinain gbaburə sanam me ba ka Yinni  
Gusuno turare tuka daawə bu ka yākunu ko. N  
deema ben goo kun bii mara. Ma n tia Eleasaa ka  
Itamaa ka sere ben baaba Aroni wi u ra n bu kpare  
yāku kobun səmburu səə.

<sup>5</sup> Yera Yinni Gusuno u Mewisi səwa u nee, <sup>6</sup> a de Lefin bibun bweseru tu na kpa a tu Aroni nəmu səndia səmbu ten sə. <sup>7</sup> Ba ko n dan wāwa Gusunən kurun kɔnnəwə bu ka ten səmburu ko Aroni ka Isirelibə kpuron ayerə. <sup>8</sup> Beya ba koo kuu te, ka ten dendu yānu kpuron səmburu ko Isireliban ayerə. <sup>9</sup> Kaa wooda wēwa a nee, Aroni ka win bibə ba ko n Lefiba mə bu ka sāa yee ten səmburu ko. <sup>10</sup> Adama Aroni ka win bibu tənawə ba koo yākuru ko. Goo u n yākuru kua, ma n kun be, ba koo yēro gowa.

<sup>11</sup> Yinni Gusuno u maa Mewisi səwa u nee, <sup>12</sup> wee na Lefibə wuna Isireliban suunu səon di ba n ka sāa Isireliban bii tən durə gbiikobun kɔsire, kpa bu ko negibu. <sup>13</sup> Domi saa min di na Egibitigibun bii gbiikobu go, saa min diya na Isireliban bii gbiikobu ka ben yaa sabenun bii gbiikinu tii yiiya. Ma ba kua negibu. Nena Yinni Gusuno.

### *Ba gari gari kua Lefiban*

#### *bweseru sāa nən gbiikiru*

<sup>14</sup> Yinni Gusuno u kpam Mewisi səwa Sinain gabburə u nee, <sup>15</sup> a Lefin bibun bweseru gario yenu ka yenu, bweseru ka bweseru. Ben tən durə baawurewa kaa gari saa be ba suru tia mən di sere ka be ba kere me.

<sup>16</sup> Ma Mewisi u bu gara nge me Yinni Gusuno u gerua.

<sup>17</sup> Be ba sāa Lefin bibu bera, Geesəni ka Kehati ka Merari. <sup>18</sup> Be ba sāa Geesənin bibu ka ben bweseru bera, Libini ka Simei. <sup>19</sup> Be ba sāa Kehatin bibun bweseru bera, Amuramu ka Yisehari ka Heboroni ka Usielu. <sup>20</sup> Be ba maq sāa Merariba ka ben bweseru bera, Makili ka Musi. Beni kpurowa ba sāa Lefin bibun bweseru.

<sup>21</sup> Geesənin min diya Libinin bweseru ka Siməin bweseru ta yara. <sup>22</sup> Tən durə be ba gara be ba suru tia mə ka be ba kere me Geesənin bweseru səə ben geera kuawa təmbu nərəbun suba nəəba yiru ka neera wunəbu (7.500). <sup>23</sup> Geesəniba ba ra ben sansani girewa Yinni Gusunən kurun biruə səə duu yeru gia. <sup>24</sup> Ben kparon yīsira Eliasafu, Lælin bii. <sup>25</sup> Ye Geesənin bweseru ta ko n da ko kuu bekurugii te səə yera, kuu ten beku karenu ni ba koo doke ten səəwə ka ten təəwə ka ten kənnəwə <sup>26</sup> ka ten yaaraə ka yaara yen kənnəwə ka sere maa ten wēe kpuro.

<sup>27</sup> Kehatin min diya Amuramugibу ka Yiseharigibу ka Heboronigibу ka Usieligibun bwese kəri maa yara. <sup>28</sup> Tən durə be ba gara Kehatin bwese te səə, be ba suru tia mə ka be ba kere me, ben geera kuawa təmbu nərəbun suba nəəba ita ka nata (8.600). <sup>29</sup> Kehatiba ba ra ben sansani girewa kuu ten səə yēsan nəm geu gia. <sup>30</sup> Ben kparon yīsira Elisafani, Usielin bii. <sup>31</sup> Kehati bera ba ko n da woodan kpakoro ten səmburu ko ka tabulu ye, ka dabu ge, ka yāku yenu ka kuu ten dendy yānu kpuro ka dii dəərarun beku kare te. Beya ba ko n da ye kpuron səmburu ko.

<sup>32</sup> Wi u sāa Lefiba kpuron guro guro wiya, Eleasaa, Aroni yāku kowon bii. Wiya u tən be kpuro kpare be ba sāa yee ten səma mə.

<sup>33</sup> Mərarin min diya Makiligibу ka Musigibun bwesera yara. <sup>34</sup> Tən durə be ba gara be ba suru tia mə ka be ba kere me, ben geera kuawa təmbu nərəbun suba nəəba tia ka goobu (6.200). <sup>35</sup> Ben kparon yīsira Surieli, Abihailin bii. Ba ra ben sansani girewa səə yēsan nəm geu gia. <sup>36</sup> Beya ba Yinni Gusunən kuu ten dāa besi ka ten dāa pəəsi ka

ten gbereba ka ten yɔratii ka ten sɔm yānu kpuro nɔmu səndia,<sup>37</sup> ka sere ten kara dānu ka ten yɔratii ka ten kurumba ka ten wɛɛ.

<sup>38</sup> Mɔwisi ka Aroni ka win bibu ba rɑ ben sansani girewa kuu ten kɔnnowə sɔɔ yari yeru gia. Domi beya ba ko n da səmburu ko kuu te sɔɔ Isireliban sɔ kpa ba n tu kɔsu tɔn tuko goo u ku raa ka tu susin sɔ, kpa u ku raa gbi.

<sup>39</sup> Lefi tɔn durɔ be Mɔwisi ka Aroni ba gara be ba suru tia mɔ ka be ba kere me, nge me Yinni Gusunɔ u gerua, ben geera sãawa təmbu nɔrɔbun suba yɛnda yiru (22.000).

### *Bii gbiikobun yakiabu*

<sup>40</sup> Yinni Gusunɔ u kpam Mɔwisi sɔɔwa u nee, a Isireliban bii tɔn durɔ gbiikobu gario saa be ba suru tia mɔn di sere ka be ba kere me, kpa a bu gari baawure ka win yisiru. <sup>41</sup> Yen biru, kpa a Lefiba wuna a yi nənem ba n sãa ne Yinni Gusunɔgibu Isireliban bii gbiikobun ayerɔ. Meyya kaa maa man ben yaa sabenu yiiya Isireliban yaa sabenun bii gbiikinun ayerɔ.

<sup>42</sup> Ma Mɔwisi u Isireliban bii gbiikoo be gara nge me Yinni Gusunɔ u nùn sɔɔwa u ko. <sup>43</sup> Ma be kpuron geera kua tɔnu nɔrɔbun suba yɛnda yiru ka goobu ka wata ka wəkura ita (22.273).

<sup>44</sup> Yinni Gusunɔ u kpam Mɔwisi sɔɔwa u nee, <sup>45</sup> a Lefiba wunɔ nənem kpa bu ko bii gbiikoo be kpuron kɔsire. Meyya kaa maa ko ka ben yaa sabenu kpuro, nu ko Isireliban yaa sabenun buu gbiikuu baageren kɔsire. Ba ko n wāawa nən sɔ. Nəna Yinni Gusunɔ. <sup>46</sup> Bà n kī bu Isireliban bii gbiikobu goobu ka wata ka wəkura ita (273) be ba Lefiba dabiru

kere mi yakia,<sup>47</sup> sii geesun gobi nɔəbuwa kaa mwa ben baawuren wɔllɔ. Gobi yin tian bunum mu sāawa garamu wəkuru nge mε ba ka yi dimɔ sāa yerɔ. <sup>48</sup> Aroni ka win biba kaa yi nəmu bəria bu ka Isireliban bii gbiikobu yakia be ba Lefiba dabiru kere.

<sup>49</sup> Ma Məwisi u gobi yi mwεera u yi bii gbiikoo ben yakiabun sɔ. <sup>50</sup> Ma yi kua sii geesun gobi nərɔbu ka gooba wunəbu ka wata ka nəɔbu (1.365) nge mε ba ka yi dimɔ sāa yerɔ. <sup>51</sup> Ma u yi kpuro Aroni ka win bibu wẽ nge mε Yinni Gusunɔ u nùn sɔɔwa.

### *Kehatin bwese keran səmburu*

## 4

<sup>1</sup> Yinni Gusunɔ u Məwisi ka Aroni sɔɔwa u nεε, <sup>2</sup> i Kehatin bweserun təmbu gario Lefin bibun bweseru sɔɔ, yenu ka yenu, <sup>3</sup> saa be ba wɔɔ tena mən di n ka girari be ba mə wɔɔ weeraakurɔ, be ba koo kpī bu Yinni Gusunən kuu ten səmburu ko. <sup>4</sup> Sāa yerun dii te ta dεere gem gem sɔɔra ba koo səmburu ko. Səmbu te ba koo ko wee. <sup>5</sup> Bà n seewa ba doonɔ, Aroni ka win biba ba koo beku kare te sɔsia te ta wāa dii te ta dεere gem gem kənnəwɔ, kpa bu tu woodan kpakoro te wukiri. <sup>6</sup> Ten wɔlləwa ba koo gəni damgii təria kpa bu maa yin wɔllɔ beku boogugiru səndi kpa bu sere kpakoro ten nənutii wasi. <sup>7</sup> Ba koo beku boogugiru teriawa tabulu yen wɔllɔ mi ba ra pẽe səndi kpa bu yen wɔllɔ gbε̃enū səndi ka nəri ka pεrentibə ka tam kparabanu, kpa bu ku de pẽe yu biara mi baadomma. <sup>8</sup> Yen biruwa ba koo ye kpuron wɔllɔ beku wunəmgiru wukiri kpa bu gəni damgii səndi.

Bà n kpa, kpa bu tabulu yen n̄enutii wasi. <sup>9</sup> Yen biru, ba koo maa beku boogugiru sua bu dabu ge wukiri ka gen fitilanu ka gen bakusu ka gen torom guratii ka gum kparabanu, gen dendì yānu kpuro gesi. <sup>10</sup> Ba koo dabu ge, ka gen dendì yāa ni kpuro dokewa b̄ōru s̄ō te ba kua ka ḡoni damgia. Yen biru, kpa bu tu sāarusia dāa p̄otura s̄ō ye ba koo ka tu sua. <sup>11</sup> Kpa bu maa beku boogugiru sua bu wukiri kpakoro ten w̄oll̄ mi ba ra turare d̄ō doke kpa bu maa tu ḡoni damgii wukiri. Yen biru, kpa bu ten n̄enutii wasi. <sup>12</sup> Kpa bu kuu ten dendì yānu kpuro sua bu nu kure ka beku boogugiru. Yen biru, kpa bu nu doke b̄ōru s̄ō te ba kua ka ḡoni damgii kpa bu b̄ō te sāarusia dāa p̄otura s̄ō ye ba koo ka tu sua. <sup>13</sup> Kpa bu maa torom gura yāku yerun di. Yen biru, kpa bu tu beku wun̄omgiru wukiri. <sup>14</sup> Ten w̄oll̄wa ba koo ten dendì yāa ni kpuro doke. Niya, d̄ō guratii ka kaato donnuginu ka kaato ni nu tie ka gb̄ee ni ba ra ka yem yēke, kpa bu ye ḡoni damgii wukiri. Yen biru, kpa bu yen n̄enutii wasi. <sup>15</sup> Aroni ka win bibu bà n dendì yāa ni kpuro wukiri ba kpa, Kehatin bwesera ta koo na tu nu sua tu s̄obe. Adama tu ku raa dendì yāa nin tii b̄ab̄a bà kun nu bekuru wukiri kpa tu ku raa gbi. Isireliba bà n seewa ba swaa w̄ori, Kehatin bwese tera ta ko n da sāa yāa ni s̄obe. <sup>16</sup> Eleasaa, Aroni yāku kowon biiwa u ko n da maa dabu gen gum gari yē, ka sere turare nubu durorugia ye, ka bururu ka yokan yāku te ba ra ko t̄ō baatere ka gum m̄e ba ra ḡāanu t̄āre bu ka nu ḡosi bu yi n̄enem ne, Yinni Gusunən s̄ō. Wiya u koo ne, Yinni Gusunən kuu te n̄oni doke ka ye ya wāa te s̄oo.

<sup>17</sup> Yinni Gusunə u maa M̄ewisi ka Aroni s̄ōwa u

nεε, <sup>18-19</sup>i de i Kehatin bweseru nəni doke kpa tu ku raa gbi tà n sāa yāa nin səmburu mò. Wee mε kaa ko. Wunε Aroni ka wunen bibu, i ko i ka baaawure dawa win ayerə kpa i nùn səəsi yāa nìn səmburu u koo ko. <sup>20</sup>Bu ku raa du mi, bu ka sāa yee ten dendì yānu kpuro mεeri kpa nε, Yinni Gusunə n ku ra bu go.

### *Geesənin bwese keran*

#### *səmburu*

<sup>21</sup> Yinni Gusunə u Məwisi səəwa u nεε, <sup>22</sup>a Geesənin bwese keran təmbu gario yenu ka yenu. <sup>23</sup>Kaa bu gariwa saa be ba wəə tena mən di sere n ka girari be ba mə wəə weeraakurə, be ba koo kpī bu gesi sāa yee ten səmburu ko. <sup>24</sup>Wee səmbu te Geesənin bweseru ta koo ko. <sup>25</sup>Tə ko n da kuu ten beka səbewa ka ten gəni dəmgii yi ba ra wukiri wəllə ka sere ten kənnən beku kare te, <sup>26</sup>ka ten yaaran beka ka yen kənnən beku kareru ka ten wəə ka ten səm yāa ni nu tie. Ye kpuron səmbura ba koo ko. <sup>27</sup>Geesənin bweseru tà n səmburu mò, Aroni ka win biba ba koo tu nəni doke, beyə ba koo tu sə yē ta koo ko. <sup>28</sup>Səma ye kpurowa Geesənin bweseru ta koo ko. Itamaa, yāku kowo, Aronin biwa u koo bu kpara.

#### *Merarin bwese keran səmburu*

<sup>29</sup> Yinni Gusunə u maa Məwisi səəwa u nεε, a Merarin bwese keran təmbu gario yenu ka yenu. <sup>30</sup>Kaa ben tən durəbu gariwa saa be ba wəə tena mən di n ka da be ba mə wəə weeraakurə, be ba koo kpī bu gesi kuu ten səmburu ko. <sup>31</sup>Wee səmbu te ba koo bu nəmu bəria. Beyə ba ko n da kuu ten dāa besi səbe ka ten dāa pəəsi ka ten gbereba ka

ten yɔratii, <sup>32</sup> ka maa ten yaaran kara dānu ka ten yɔratii ka ten kurumbə ka ten wɛɛ ka sere ten dendyā ni nu tie. Ba koo baawure wɛwa ye u koo səbe. <sup>33</sup> Səma yeniwa Merarin bwese kera ya ko n da ko kuu te səo. Itamaa yāku kowo Aronin biiwā u koo bu nəni doke.

*Ba Lefiba gara be ba koo kpī*

*bu kuu ten səmburu ko*

<sup>34-49</sup> Məwisi ka Aroni ka Isireliban yenu yɛrobu ba Lefiban bwese keri yinin təmbu gara, yiya, Kehati ka Gəesəni ka Merari. Ba bu garawa yenu ka yenu saa be ba wɔɔ təna mən di sere n ka da be ba mə wɔɔ weeraakurə, be ba koo kpī bu səmburu ko kuu te səo gesi nge mə Yinni Gusunə u Məwisi səowə. Be ba gara Kehatin bweseru səo, ben geera kuawa təmbu nərəbun suba yiru ka nata ka wunəbu ka weeraakurə (2.750).

Gəesənin bweseru səo maa, ben geera kuawa təmbu nərəbun suba yiru ka nata ka təna (2.630).

Merarin bweseru səo, ben geera maa kua təmbu nərəbun suba ita ka goobu (3.200). Ma Lefiba kpuron geera kua təmbu nərəbun suba nəəba ita ka neera wunəbu ka wəne (8.580).

Ba ben baawure səowə ye u koo ko ka ye u koo səbe nge mə Yinni Gusunə u Məwisi səowə.

*Be ba koo yara sansanin di*

**5**

<sup>1</sup> Yinni Gusunə u Məwisi səowə u nəe, <sup>2</sup> a Isireliba səowə a nəe, bu bu yaro sansanin di, be ba disi mə gənan bəra disiginun sə, n̄ kun mə kentun sə, n̄ kun mə goru garun sə. <sup>3</sup> Yɛro u səawa tən kurə? I ko i

nùn yarawa kpa u ku raa sansani ye disi doke, yèn suunu sɔɔ nε, Yinni Gusunɔ na wāa.

<sup>4</sup> Ma Isireliba ba Yinni Gusunɔn wooda ye mɛm nɔɔwa. Ma ba tɔmbu kpuro yara be ba disi mɔ mi, nge mε Yinni Gusunɔ u gerua.

### *Torarun sɔmbu*

<sup>5</sup> Yinni Gusunɔ u maa kpam Mɔwisi sɔɔwa u nεε, <sup>6</sup> a Isireliba sɔɔwɔ a nεε, tɔn kurɔwa? Aa, tɔn durɔwa? U n win winsim tora, Yinni Gusunɔwa u tora. <sup>7</sup> Yēro u koo win tora te tuuba kowa kpa u gāa nìn sɔ u tora mi wesia, kpa u yen bɔnu nɔɔbun tia sosi. <sup>8</sup> Wi ba koo gāa ni wesia, ù kun wāa ma uñ maa goo mɔ wi ba koo nu wē, Yinni Gusunɔwa ba koo nu wē, kpa nu ko yāku kowoginu. U koo maa yāa kineru wē te ba koo ka nùn win torarun yākuru kua. <sup>9</sup> Yākuru baatere tèn sukum ba wīa nεnɛm Yinni Gusunɔn sɔ, ta ko n sāawā yāku kowogiru. <sup>10</sup> Kpuro ye ba wē Yinni Gusunɔn sɔ, ya kuawa yāku kowogia. U koo kpī u ye yi nεnɛm win tiin sɔ.

### *Tɔn kurɔ wi ba tamaa*

#### *u sakararu kua*

<sup>11</sup> Yinni Gusunɔ u Mɔwisi sɔɔwa u nεε, <sup>12</sup> a Isireliba kpuro sɔɔwɔ a nεε, tɔn kurɔ goo ù n naanɛ sarirun kookoosu mɔ, <sup>13</sup> ma win durɔ u tamaa durɔ goo u ka nùn kpuna, baa mε ganu sari ni nu nùn sɔɔsimɔ ma u ka goo kpuna, meya uñ maa seedagii goo mɔ wi u nùn wa u ye mɔ, durɔ win tii uñ maa ka nùn ye mwε, <sup>14</sup> sɔrɔkudo uñ ye kue, adama ka mε, nisinun sɔ, uñ nùn naanɛ sāa, ma u tamaa u sakararu kuawa kam kam, <sup>15</sup> baa ñ n mεren na, durɔ wi, u koo ka win kurɔ wi dawa yāku kowon mi ka ɔɔsun som kilo ita. Uñ gum dokemɔ som mε

səo. Meyə uñ maa turare səndimə men wellə. Domi ta sāawa yākuru te ta nisinu yaayamə. <sup>16</sup> Saa ye səo, yāku kowo u koo ka nùn dawa sāa yerə Yinni Gusunən wuswaaø, <sup>17</sup> u yōraysia, kpa u doma nim sua wekerun di te ba kua ka səndu, kpa u tua səkə sāa yerun temə u ka nim me burina. <sup>18</sup> U koo de kurə wi, u yōra Yinni Gusunən wuswaaø kpa u nùn win yasa pota, kpa u kēe te səndi kurə win nəmaø. Saa ye səo, yāku kowon tii u ko n nim sosuram nəni me mu ka bɔri naamə, <sup>19</sup> kpa u kurə wi bɔrusia u nεε, saa ye a wāa wunen durən yenuø, tən durə goo ù kun ka nun kpune, ma añ tii disi doke, Gusunə u ku de a bɔri wa yi nim me, mu koo ka na. <sup>20</sup> Adama ma a ka durə goo kpuna, a tii disi kua, <sup>21</sup> Yinni Gusunə u nun səeyasia, kpa u nun wīroru kpēe kpa wunen nukuru tu məsi sere ba n da nun sie bā n təmbu bɔrusimə. <sup>22</sup> Gusunə u de nim me mu ka bɔri naamə mi, mu du wunen nukuru kpa wunen nuku te, tu məsi, kpa wunen marutuu gu gbera. Saa ye səora, kurə wi, u koo gere u nεε, ami!

<sup>23</sup> Yāku kowo u koo bɔri yi yorewa tireru səo kpa u yi tea ka nim sosuram me, <sup>24</sup> me mu ka bɔri naamə kpa u mu kurə wi nərusia, kpa nim me, mu du win nukuru mu nùn kɔsa kua. <sup>25</sup> Yen biru yāku kowo u koo nisinun kēe te mwa kurə win nəman di kpa u tu səɔsi beri berika, kpa u ka sere tu da yāku yero. <sup>26</sup> Yen biru u koo kēe ten som nəm kure teeru sua kpa u mu dɔø məni yāku yero kpa Yinni Gusunə u kurə wi yaaya. Yen biru kpa u kurə wi nim sosuram me nərusia. <sup>27</sup> U n kurə wi nim me nərusiø ma u disi ma, u kua naane sarirugii win durən mi, nim me, mu koo ka nùn bɔri naawa, kpa mu nùn kɔsa kua, win nukuru tu məsi kpa win marutuu gu gbera,

kpa ba n da nùn sie bà n t̄ombu bōrusim̄o. <sup>28</sup> Adama ù kun disi m̄o, u tii n̄enua dee dee, ba koo nùn garisiwa taare sarirugii. Saa ye s̄o, u koo bibu wa u ma.

<sup>29</sup> Yeniwa ya s̄aa kur̄o ka dur̄o nisinun wooda. Kur̄o ù n win dur̄o n̄oni w̄skua u sakararu kua, <sup>30</sup> ñ kun m̄e dur̄o nisinu n̄u n seewa, ù n win kur̄o taare weesugla w̄ēem̄o, yāku kowo u koo ka nùn dawa Yinni Gusun̄oñ wuswaaø, kpa u ko mam mam ye wooda ye, ya gerua. <sup>31</sup> Dur̄o u ko n s̄aa taare sarirugii. Adama kur̄o ù n tora u koo ten are wa.

### *Be ba tii Yinni Gusun̄o w̄ē*

## 6

<sup>1</sup> Yinni Gusun̄o u M̄owisi s̄oawā u nee, <sup>2</sup> a Isireliba s̄oawā a nee, goo ù n tii wuna n̄enem u ka tii Yinni Gusun̄o w̄ē, <sup>3</sup> yēro un̄ koo tam gam n̄o, baa m̄e ba kua ka resem. Un̄ maa resem beka ñ kun m̄e gbeba dim̄o. <sup>4</sup> Saa ye u tii Gusun̄o w̄ē mi, un̄ gāanu dim̄o ye ba kua ka resem. <sup>5</sup> Un̄ maa win seri kōnim̄o sere win tii w̄ēebun t̄o te, tu ka yibu. U koo win seri deriwa yi n kpēam̄o, kpa u n wāa Gusun̄oñ s̄o. <sup>6</sup> U ku raa maa susi goru garun b̄okuā u sere tu baba, <sup>7</sup> baa ñ n win baan gorun na, ñ kun m̄e win merogiru, ñ kun m̄e win w̄on̄a ka win m̄oagiru, ñ kun m̄e win sesugiru. Domi seri yi u s̄oawā mi, yi s̄oosim̄o ma u tii Gusun̄o w̄ēewa.

<sup>8</sup> Win tii w̄ēebun saa ye s̄o, u ko n wāawa Yinni Gusun̄oñ s̄emburun s̄o. <sup>9</sup> Wi ka goo bà n wāa sannu ma yēro u gu suaru s̄o, ma u disi duura, u koo win seri kōniwa s̄o n̄ooba yiruse d̄ema te u tii deerasiam̄o. <sup>10</sup> S̄o n̄ooba itase, u koo ka yāku kowo kparukonu yiru naawa, ñ kun m̄e, totoberenu yiru,

sāa yerun kənnəwə, <sup>11</sup> kpa yāku kowo u gen teu go, u ka durə win torarun suuru bikia kpa u ka yiruse yāku dōo mwaararugiru ko. Yen biru kpa u nūn deerasiabun wororu koosi. Yen tōo te, u deerawa mi. <sup>12</sup> Kpa u maa wure u tii Yinni Gusunə wē. Saa yera u koo yāa kinεru wōo tiagiru go u ka win toraru sōme. Adama tōo gbiikii ni u raa tii wē mi, nu kam kuawā mi.

<sup>13</sup> Be ba tii Gusunə wēn wooda wee. Goo ù n tii wuna nənəm Yinni Gusunən sō, ma u yen tōru yibia te u burə ba koo ka nūn dawə Yinni Gusunən sāa yerun kənnəwə. <sup>14</sup> Miya u koo ka win kēru na Yinni Gusunən mi. Niya yāa kinεru wōo tiagiru te tañ alebu mō, u ka yāku dōo mwaararugiru ko, ka maa yāa niru wōo tiagiru te tañ alebu mō u ka torarun yākuru ko. Kpa u maa ka yāa kinεru na te tañ alebu mō u ka siarabun yākuru ko. <sup>15</sup> U koo maa ka pēe na bireru sōo ye bañ seeyatia doke, yen gee yi n kpā yēn som ba ka gum burina, yen gee yi kun maa kpā yi ba koo gum teeni. <sup>16</sup> Yen biru kpa yāku kowo u ka kēe ni na Yinni Gusunən mi, kpa u torarun yākunu ko ka sere yāku dōo mwaararuginu. <sup>17</sup> Kpa u maa siarabun yākunu ko ka yāa kinε te, ka pēe ye ya wāa bire te sōo, ye bañ seeyatia doke, ka som mē, ka tam mē. <sup>18</sup> Saa ye sōo, wi u tii wē mi, u koo win seri yi kōniwa Yinni Gusunən sāa yerun kənnəwə, kpa u yi kpēe mi ba siarabun yākun run dōo sōrua. <sup>19</sup> Yen biru yāku kowo u koo yāa kinε ten nəmu sua te ba sawa mi, kpa u pēe ka kira teeru sua birerun di, kpa u ye kpuro səndi durə win nəmuə wi ba kōna mi. <sup>20</sup> Yen biru yāku kowo u koo ye Yinni Gusunə sōosi, ka sere yaa yen guro guroru ka yen taa teeru sannu, kpa yu ko wi yāku kowogia. Woro nini kpuron

biruwa wi u tii Yinni Gusunə wẽ mi, u koo den kpĩ u tam nõ.

<sup>21</sup> Yera ya sãa be ba tii wuna nенем Yinni Gusunən sõn wooda. Yãku niya ba koo maa ko. Bà n maa dam mə bu ka Yinni Gusunə kënu ganu wẽ nini baasi, ba koo kpĩ bu ko. Adama baa ñ n meren na, ba koo nùn wẽwa ye ba nõo mwεeru kua nge mε yen wooda ya gerua.

### *Nge me ba ko n da domaru ko*

<sup>22</sup> Yinni Gusunə u Məwisi sõowə u neε, <sup>23</sup> a Aroni ka win bii tõn durəbu sõowə a neε, wee nge me ba ko n da gere bà n Isireliba domaru kuammə. <sup>24</sup> Ba ko n da neεwa,

Yinni Gusunə u bεe domaru kua,  
kpa u bεe kõsu.

<sup>25</sup> Yinni Gusunə u ka bεe nõnu geu mεeri  
kpa u bεe durom kua.

<sup>26</sup> Gusunə u bεe mεerima,  
kpa u bεe bəri yendu wẽ.

<sup>27</sup> Yãku kowo ù n nən ȳisiru sokusina mε, sanam mε u Isireliba domaru kuammə, saa yera kon doma te mwa.

### *Kekε yi Isireliban*

### *guro guroba wẽ sãa yerun sõ*

## 7

<sup>1</sup> Sanam mε Məwisi u Yinni Gusunən kuu te gira u kpa, u tu gum ȳeka, te ka ten dendì yãnu kpuro, ta n ka sãa nенем Yinni Gusunən sõ. Ka yãku yee te ka ten dendì yãnu ye kpurowa u gum ȳeka u wuna nенем Yinni Gusunən sõ. <sup>2</sup> Yera Isireliban bwese kera baayeren guro guro be ba raa tõmbu gara mi, ba susima. <sup>3</sup> Ben baaawure u ka win kẽru na.

K   niya n  e w  kura yiru ka k  ke n  oba tia ye n  e gawe. Ba k  ke yi wukiritii kua. Wirugibu yiruwa ba m  enna ba k  ke tia kasu ba w  . Ma ben baawure u naa tia w  . Ma ba ka ye na Yinni Gusun  n s  aa yero.

<sup>4</sup> Yinni Gusun   u M  wisi s  ow  a u n  e, <sup>5</sup> a ye kpuro m  o n  en kuu ten s  mburun s  , kpa a ye Lefiba b  nu kua nge m   ben baawuren s  mbura s  aa yu ka n  un somi.

**6** Ma Mowisi u keke be ka nee yi mwa ma u yi Lefiba wē. **7** U Geesənin bwese kera keke yiru wē ka nee nne ben somburun sō. **8** U Merarin bwese kera keke nne wē ka nee nōba ita, ben somburun sō. N deema Itamaa yāku kowo Aronin biiwa u bu kpare. **9** Un Kehatiba yen gaa wē. Domi sāa yerun dendī yānun tiiwa bē, ba ra sue ben seno.

*Kēe ni ba kua sanam me  
ba yāku yero wukiamō*

**10** Dəma te ba yāku yee te gum yēka ta n ka sāa  
nənəm Yinni Gusunən sō, Isireliban bwese kərin  
wirugibu ba ka ben kēnu na yāku yee ten wuswaao.  
**11** Yinni Gusunə u Məwisi sə̄wəwa u nee, a de Isire-  
liban guro guro be, bu na tia tia, ben baawure u  
n win kēru mə u ka tu sə̄osi yāku yee ten sō, ben  
baawure u n win tōru mə.

12-83 Wee nge me ba ka këe ni naasina.  
Tëo gbiikiru Nasoni, Aminadabun bii, Yudan bwe-seru sœ, wiya u ka wigiru na.

Tõru yiruse Netaneeli, Suarin bii, Isakarin bweseru sõo, u maa ka wiqiru na.

T̄̄ru itase Eliabu, Helonin bii, Sabulonin bweseru s̄̄o, u maa ka wigiru na.

Tõru nnese Elisuri, Sedeurin bii, Rubenin bweseru sõa, u maa ka wigiru na.

Tõru nõəbuse Selumieli, Surisadain bii, Simεon bweseru səo, u maa ka wigiru na.

Tõru nõəba tiase Eliasqfu, Dewεlin bii, Gadin bweseru səo, u maa ka wigiru na.

Tõru nõəba yiruse Elisama, Amihudun bii, Efaraimun bweseru səo, u maa ka wigiru na.

Tõru nõəba itase Gamuliel, Pedasurin bii, Manasen bweseru səo, u maa ka wigiru na.

Tõru nõəba nnεse Abidani, Gideonin bii, Benyameen bweseru səo, u maa ka wigiru na.

Tõru wəkuruse Akiesee, Amisadain bii, Danun bweseru səo, u maa ka wigiru na.

Tõru wəkura tiase Pagieli, Okiranin bii, Aseen bweseru səo, u maa ka wigiru na.

Tõru wəkura yiruse Ahira, Enanin bii, Neftalin bweseru səo, u maa ka wigiru na.

Wee ye ben baawure u ka na.

Yera gbεeru te ba kua ka sii geesu, tēn bunum mu sāa kilo tia ka garamu gooba wunəbu (300), ka maa gbεeru garu te ba ko n da ka yεm yεke. Ba maa te kuawa ka sii geesu. Ten bunum mu sāawa garamu nata ka wunəbu (700). Ba ni kpuron bunum yīirawa ka sāa yerun yīirutia. Ma ba gbεenu yiru ye səo, som doke me ba burina ka gum bu ka yākuru ko.

Ben baawure u ka nəra wuragia na ye ba turare yibie. Nəra yen bunum mu sāa garamu wunəbu (100).

Ba maa ka kεtε kinεru ka yāa kinεru ka yāa kpεndu wəo tiagiru na. Ye ita kpurowa ba koo ka yāku dəo mwaararugiru ko,

kpa bu ka boo kinεru na te ba koo ka torərun yākuru ko,

ka maa naa kinenu yiru ka yāa kinenu nōobu ka boo kinenu nōobu ka yāa kpemminu nōobu wōo tiaginu ni ba koo ka siarabun yākunu ko.

<sup>84</sup> Kēe ni ba kua dōma te, yāku yee ten sō, ni kpuron geera kuawa gbēenu wōkura yiru ni ba kua ka sii geesu ka sere maa sii geesun gbēenu ganu wōkura yiru ni ba ko n da ka yēm yēke, ka maa nōri wuragii wōkura yiru. <sup>85</sup> Gbēe nin baateren bunum mu sāawa kilo tia ka garamu gooba wunōbu (300). Ni ba ra ka maa yēm yēke mi, nin teerun bunum maa sāawa garamu nata ka wunōbu (700). Gbēe ni kpuron bunum mu kuawa kilo yēnda nne, nge mē ba ra yīre sāa yero. <sup>86</sup> Nōri wuragii yi, yin baayeren bunum mu sāawa garamu wunōbu (100). Ma nōri wōkura yiru ye kpuron bunum mu kua kilo tia ka garamu goobu (200). Ba yin baayere turare yibie ye ba koo dōo doke. <sup>87</sup> Yen biru ba yaa sabenu wē. Niya naa kinenu wōkura yiru ka yāa kinenu wōkura yiru ka yāa kpemminu wōo tiaginu wōkura yiru ni ba koo ka yāku dōo mwaararuginu ko ka maa som mē ba ra ka yāku te ko, ka maa boo kinenu wōkura yiru ni ba koo ka toranun yākuru ko, <sup>88</sup> ka kete kinenu yēnda nne, ka yāa kinenu wata ka boo kinenu wata ka yāa kpemminu wōo tiaginu wata. Ni kpurowa ba koo ka siarabun yākunu ko. Kēe niniwa ba kua sanam mē ba yāku yee te gum yēka ta n ka sāa nēnēm Gusunōn sō.

<sup>89</sup> Sanam mē Mōwisi u dua Yinni Gusunōn kuu ten mi, u Yinni Gusunōn nōo nōomō. Nōo ge, ga weewa wōllun kōsobun weenasibu yiru yen baa sōon di, ye ya wāa woodan kpakoro ten wukiritian wōllō. Min diya Gusunō u ka nūn gari mō.

*Nge me ba koo fitilanu yiisina*

## 8

<sup>1</sup> Yinni Gusunə u Məwisi sə̄wa u nəe, a Aroni sə̄wə a nəe, <sup>2</sup> ù n fitilanu nəəba yiru ye doke dabu ge sə̄o, u de nu n yəm bururasie wuswaā.

<sup>3</sup> Ma Aroni u kua mə. U nu doke doke dabu gen wuswaā nge mə Yinni Gusunə u nùn sə̄wa. <sup>4</sup> Ba dabu ge kuawa ka wura bəri tia saa gen wəllun di sere n ka da temə, ka sere burə ni ba gu kua. Məwisi u dera ba gu kuawa nge mə Yinni Gusunə u nùn sə̄si.

*Ba Lefiba wuna nənəm*

*Yinni Gusunən səmburun sō*

<sup>5</sup> Yinni Gusunə u Məwisi sə̄wa u nəe, <sup>6</sup> a Lefiba wunə Isireliban suunu sə̄on di kpa a bu dəerasia.

<sup>7</sup> Wee nge mə kaa ko a ka bu dəerasia. Kaa bu nim yēkawa mə mu koo ben toranu wukiri. Kpa a de bu ben wasin sansu kəni. Kpa bu ben yānu tea kpa bu tii dəerasia. <sup>8</sup> Yen biru ba koo kete kine kpembu sua ka som mə ba ka gum burina ka kete kine kpembu gagu bu ka torarun yākuru ko. <sup>9</sup> Kpa a Isireliba kpuro mənna kuu ten kənnəwə, kpa a de Lefiba bu susima <sup>10</sup> ne, Yinni Gusunən wuswaā, kpa Isireliba bu ben nəma səndi Lefi ben wiru wəllə. <sup>11</sup> Kpa Aroni u Lefi be sə̄si beri berika ne, Yinni Gusunən wuswaā nge yākuru te Isireliba ba ka na. Saa ye sə̄o, ba bu wunawa mi nənəm nən səmburun sō. <sup>12</sup> Lefiba ba koo maa ben nəma səndi kete kine nin wiru wəllə. Yen biru kpa Aroni u teeru go ben torarun suurun sō kpa u ka teeru yāku dō̄ mwaararugiru ko u sere bu dəerasiabun woronu koosi. <sup>13</sup> Kaa de Lefiba kpuro bu se bu yəra

Aroni ka win bibun wuswaa, kpa a bu sɔ̄si beri berika nge yākuru ne, Yinni Gusunən wuswaa. <sup>14</sup> Kaa Lefiba wunawa nənəm Isireliban suunu sɔ̄en di, kpa ba n wāa nen səmburun sō. <sup>15</sup> Yenibar biru ba koo səmburu ko nen sāa yerə. Kaa bu deerasiawā kpa a bu sɔ̄si beri berika nge yākuru. <sup>16</sup> Domi ba man bu wēwa mam mam ba kua Isireliban bii gbiikobu kpuron kəsire. <sup>17</sup> Ben bii gbiikobu kpuro ba sāawa negibu saa təmbun bii gbiikobun di n ka da yaa sabenun binə. Na bu wunawa nənəm ba kua negibu, saa mìn di na bii gbiikobu go Egibitiə. <sup>18</sup> Na Lefiba mwa Isireliban bii gbiikobun ayerə. <sup>19</sup> Na bu wunawa na Aroni ka win bibu wē, bu ka səmburu ko Isireliban sō sāa yerə, kpa ba n sāa nge yākuru te Isireliba ba wē ben toranun sō. Saa ye səo, Isireli be, bañ susimə nen kuu ten bəkuə n sere bu go.

<sup>20</sup> Məwisi ka Aroni ka Isireliba kpuro ba kua mam mam ye Yinni Gusunə u gerua Lefibar sō. <sup>21</sup> Lefiba ba tii deerasia ba ben yānu tea, ma Aroni u bu sɔ̄si beri berika nge yākuru. Ma u bu torarun suuru ka deerasiabun woronu koosi. <sup>22</sup> Yen biruwā Lefi be, ba na Yinni Gusunən kuu ten mi, ba ben səmburu torua Aroni ka win bibun nəni biru, nge mə Yinni Gusunə u Məwisi sɔ̄wa u ko ben sō.

<sup>23</sup> Yinni Gusunə u maa Məwisi sɔ̄wa u nəe, <sup>24</sup> Lefi be ba wō yənda nəəbu mə ka be ba kere mə, beyə ba koo səmburu ko nen kuu te səo. <sup>25</sup> Be ba wō weeraakuru tura, ba koo yariwa ben səmburun di mam mam. Bañ maa man səmburu kuammə. <sup>26</sup> Ba ko n da ben Lefisibu somi bà n səmburu mə. Adama ben tii bañ ko n maa səmburu mə mi. Nge məya kaa Lefiba kua ben səmburun swaa səo.

## 9

<sup>1</sup> Ye Isireliba ba yarima Egibitin di yen wə̄o yirusen suru gbiikoo sə̄o, yera Yinni Gusunə u ka Mə̄wisi gari kua Sinain gbaburə. <sup>2</sup> U nee, Isireliba ba ko n da Gə̄o sararibun tə̄o bakaru diwa saa ye na yi sə̄o. <sup>3</sup> Yera suru winin sə̄o wə̄kura nnesen yoka, sanam mə̄ sə̄o dua. Ba koo tu diwa nge mə̄ ten wooda ya gerua.

<sup>4</sup> Ma Mə̄wisi u Isireliba sə̄owə nge mə̄ ba koo ka Gə̄o sararibun tə̄o bakaru di. <sup>5</sup> Ma ba tə̄o te di suru gbiikoon sə̄o wə̄kura nnese yen yoka sanam mə̄ sə̄o dua, Sinain gbaburu mi, nge mə̄ Yinni Gusunə u Mə̄wisi sə̄owə bu ko.

<sup>6</sup> Yen də̄ma te, tə̄mbu gaba wāa be ba disi mə̄ gorun sə̄. Bañ kpia ba tə̄o baka te di. Ma ba da ba Mə̄wisi ka Aroni deema. <sup>7</sup> Ba bu sə̄owə ba nee, wee sa disi mə̄ gorun sə̄. Yen sə̄, kaa sun yinari su ka bə̄sen yākuru na Yinni Gusunən wuswaa tə̄o te sə̄o, nge Isireli be ba tie?

<sup>8</sup> Ma Mə̄wisi u nee, i yōro n bikia ye Yinni Gusunə u koo man sə̄ bə̄en sə̄.

<sup>9</sup> Yinni Gusunə u Mə̄wisi sə̄owə u nee, a Isireliba sə̄owə a nee, <sup>10</sup> ben goo n̄ kun mə̄ ben bibun bwe-seru sə̄o, goo ù n̄ disi mə̄ gorun sə̄, n̄ kun mə̄ u wuu da, ka mə̄, u koo Gə̄o sararibun tə̄o bakaru diwa nen sə̄. <sup>11</sup> Adama ba koo tu diwa suru yirusen sə̄o wə̄kura nnesen yoka sanam mə̄ sə̄o dua. Kpa bu ten yaa tem ka pēe ye bañ seeyatia doke ka maa kpee wuru si su sosu. <sup>12</sup> Bu ku yen gaa deri sere sisiru bururu. Bañ maa yen kukunu kə̄ramə. Bu de bu yen wooda mə̄m nə̄owə mam mam. <sup>13</sup> Goo ù n̄ də̄ere ma uñ wuu de, ma u ka sere yina u Gə̄o sararibun tə̄o baka te di, ba koo yēro yarawa

Isireliban sansanin di, yèn sɔ̄ u yina u ka win yākuru na ten saa sɔ̄. Yēro u koo win tora ten are mwawa. <sup>14</sup> Sɔ̄ goo ù n wāa bœen suunu sɔ̄, u tɔ̄o baka te dimɔ̄, u koo tu diwa nge me na ten wooda yi. Bœe ka sɔbu, wooda tia yera na bœe wēemɔ̄.

### *Guru wii wuroru ta Yinni*

#### *Gusunən kuu te wukiri*

<sup>15</sup> Dəma te Məwisi u Yinni Gusunən kuu te gira u kpa, guru wii wurora ta tu wukiri saa yoka yen di n ka girari bururɔ. Ma ta yam bururasie nge dɔ̄o kuu ten wəllə. <sup>16</sup> Nge məya ta tu wukiri saa dəma ten di. Wōkuru kpa ta n yam buriri. <sup>17</sup> Guru wii wuro te, tà n seewa Yinni Gusunən kuu ten wəllun di, Isireliba ba ra kuu te wukewa bu doona. Kpa bu maa yɔ̄ra mi guru wii wuro te, ta yɔ̄ra. <sup>18</sup> Nge məya ba ra ka Yinni Gusunən gere tubu ù n kĩ bu kuu te gira, n̄ kun me, ù n kĩ bu tu wuka. Guru wii wuro te, tà n wāa kuu ten wəllə, ba ku ra doone min di. <sup>19</sup> Tà n yɔ̄ra kuu ten wəllə n ka tε, Isireliba ba ra Yinni Gusunən wooda mem nəawewa, ba ku ra doone min di. <sup>20</sup> Tà n yɔ̄ra saa fiiko, miya ba ra ben sansani gire saa fiiko. Yen biru kpa bu se bu doona Yinni Gusunə ù n nee, bu se bu doona. <sup>21</sup> Gasə guru wii wuro te, ta ra yɔ̄re yam tem, saa yokan di sere ka bururɔ, n̄ kun me sɔ̄o teeru ka wōku teeru. Adama tà n seewa, Isireliba ba ra sewa bu swaa wɔri. <sup>22</sup> Adama tà n yɔ̄ra kuu ten wəllə sɔ̄o yiru n̄ kun me suru tia n̄ kun me wɔ̄o tia Isireliba ba ku ra kuu te wuke, ma n̄ kun mo ba guru wii wuro te wa ta seewa. <sup>23</sup> Ba ku ra se, ba ku ra maa sine, ma n̄ kun mo Yinni Gusunə u bu wooda wē. Ba ra win wooda swiwi nge me u Məwisi sɔ̄owə u ko.

*Kəbi yiru*

*yi ba kua ka sii geesu*

## 10

<sup>1</sup> Yinni Gusuno u Məwisi səəwa u neε, <sup>2</sup> a de bu kəbi yiru sekū ka sii geesu yi ba ko n da so bu ka təmbu mənna kpa bu bu sə̄ bu seewo bu doona sansanin di. <sup>3</sup> Bà n kəbi yiru ye so sannu, təmbu kpurowa ba koo mənna wunen mi, Yinni Gusunən kuu ten wuswaaø. <sup>4</sup> Adama bà n yin tia so, Isireliban wirugibu ka ben yənu yəroba ba koo mənna wunen mi. <sup>5</sup> Bà n kəba so ba kuuki koosi, be ba ben sansani gire Yinni Gusunən kuu ten sə̄ yari yero gia, bera ba koo gbi bu doona. <sup>6</sup> Bà n maa wure ba so ba kuuki koosi, be ba ben sansani gire sə̄ yəsan nəm dwaru gia kpa be, bu maa doona. <sup>7</sup> Adama bà n kī bu təmbu kpuro mənna, ba koo kəba sowa ba kun kuuki kue.

<sup>8</sup> Aroni ka win bibu, be, be ba sāa yāku kowobu, be tənawa ba ko n da kəbi yi so. Yeni ya ko n sāawa wooda sere ka ben bibun bweserø.

<sup>9</sup> I n dua bəen tem sə̄, i tabu mò ka bəen yibereba i ko i kəbi yi sowa i n kuuki koosimə kpa ne, Yinni Gusuno n ka bəe yaaya n bəe wəra yibere ben nəman di. <sup>10</sup> I n yāku də̄ mwaararuginu mò, n̄ kun mə siarabun yākunu tə̄ bakaru sə̄, n̄ kun mə tə̄ ni i ra di surun tə̄ gbiikiru sə̄, n̄ kun mə nuku dobun saa gaa sə̄, i ko i n da kəbi sowa. Nge meya kon ka bəe yaaya. Nena Gusuno bəen Yinni.

**ISIRELIBAN SANUM SAA SINAIN  
DI N KA DA MABUN CCN TEM BURA YERO**

*Isireliba ba swaa wɔri*

**11** Ye Isireliba ba yarima saa Egibitin di, yen wɔɔ yirusen suru yirusen sɔɔ yenduse sɔɔra, guru wii wurora seewa Yinni Gusunɔn kuu ten wɔllun di.  
**12** Ma Isireliba ba seewa Sinain gbaburun di ba swaa wɔri nge mɛ ba wooda yi bu ka swiina. Ma guru wii wuro te, ta da ta yɔra Paraniɔ. **13** Dɔma te, ben see gbiikiba ba seewa mi, sanam mɛ Yinni Gusunɔ u Mɔwisi sɔɔwa bu da.

**14-16** Yudaban tabu kowo wuura ta gbia ta swaa wɔri ba ben gidi bɔra neni. Be ba maa wāa wuu te sɔɔ, beya Isakariba ka Sabuloniba. Nasoni, Aminadabun biiwa u sāa Yudaban tabu sunɔ. Isakariban tabu sunɔwa maa Netaneeeli, Suarin bii. Sabuloniban tabu sunɔwa maa Eliabu, Helonin bii.

**17** Ba Yinni Gusunɔn kuu te kurua. Ma Geesɔnibɑ ka Merariba be ba sāa Lefin bweseru ba ten yānu sua ba ka swaa wɔri ba Yudaban tabu wuu te swi.

**18-20** Yen biruwa Rubenin bwese kera ka yen tabu kowo wuuru, ba Lefi be swi. Be ba maa wāa tabu wuu te sɔɔ, bera Simeəba ka Gadiba. Rubeniban tabu sunɔn ȳisira Elisuri, Sedeurin bii. Simeəban tabu sunɔn ȳisira Selumieli, Surisadain bii. Gadiban tabu sunɔn ȳisira maa Eliasafu, Dewelin bii.

**21** Yen biru Kehatibara ba swi be, be ba sāarun dendì yānu sɔɔwa. Lefi be ba gbia ba koo kuu te girawa Kehatiba bu sere tunuma.

**22-24** Kehatibar biru, Efaraimun bwese kera ya swi ka yen tabu kowo wuunu ba ben gidi bɔra gbiisie. Beya Manaseba ka Benyameebə. Efaraimuban tabu sunɔn ȳisira Elisama, Amihudun bii. Manaseban tabu sunɔn ȳisira Gamulieli,

Pedasurin bii. Benyameeban tabu sunən yīsira Abidani, Gideonin bii.

**25-27** Yen biruwa Danun bwese kera ka yen tabu kowo wuunu ba bu swīi ba ben gidi bəra nəni. Beya Aseeba ka Nefitaliba. Beya ba kua tən be kpuro kpuron biru kore. Danuban tabu sunən yīsira Akiesee, Amisadain bii. Aseeban tabu sunən yīsira Pagielie, Okiranin bii. Nefitaliban tabu sunən yīsira Ahira, Enanin bii.

**28** Nge meya Isireliba ba swīine ba ka swaa wəri be ka ben tabu kowobu.

### *Məwisi u goo kasu*

#### *u ka bu swaa səəsi*

**29** Məwisi u Hobabu win kurən sesu, Reweli Medianin bii səəwa u nee, sa dəəwa tem mi Yinni Gusunə u sun nəə mwəeru kua u sun wē. A na a kə sun da, kpa su ka nun durom mə bənu ko, mə Yinni Gusunə u bəse Isireliba nəə mwəeru kua.

**30** Hobabu u nùn wisə u nee, nañ ka bəe dəə. Kon dawa nən temə sere nən yenuə. **31** Ma Məwisi u nùn wisə u nee, a suuru koowo a ku sun deri. Domi a gbabu te yē mi sa wāa mi. A de a sun gbiyya. **32** À n sun swīi sa ko ka nun durom mə bənu ko, mə Yinni Gusunə u koo sun kua.

**33** Ma Isireliba ba Yinni Gusunən guu te deri ba sīa səə ita. Ma ba ka Yinni Gusunən woodan kpakororu gbia bu ka yam kasu mi ba koo wēra. **34** Guru wii wuro te, ta ra n wāawa ben wellə səə səə bà n swaa wəri. **35** Woodan kpakoro te, tà n seewa Məwisi u ra neewa, Yinni, a seewo a yōra, kpa a wunen yibereba yarinasia. Kpa be ba maa nun tusa bu duki wunen wuswaan di. **36** Bà n maa woodan

kpakoro te yi, u ra nεεwa, Yinni Gusunə, a wurama a n wāa Isireli dabi dabi ten suunu səə.

*Yinni Gusunə u dera dɔɔ u na*

## 11

<sup>1</sup> Sɔɔ teeru Isireliba ba ka Yinni Gusunə wɔki. Ye u nu nua, yañ nün dore. Ma u ka bu məru kua, u dera dɔɔ u na u ben sansanin bee tia mwa. <sup>2</sup> Yera Isireli be, ba Məwisi wuri koosi. Ma u Yinni Gusunə kana. Ma dɔɔ wi, u yɔra. <sup>3</sup> Ma ba yam mi ȳisiru kā Tabera, yèn sɔɔ dɔɔ u yabura ben suunu səə.

*Isireliba*

*bayaa kanamə bu tem*

<sup>4</sup> Sɔɔ teeru tən tukobu be ba Isireliba sw̄imba ben gbenubu seewa, ka sere maa Isireliban tii ba wɔkinu torua ba mò, wara u koo sun yaa w̄e su tem. <sup>5</sup> Domi sa yaaye sw̄ee yi sa ra raa wa su tem faara ka gbesenu ka w̄iaru ka ayo ka alumasanu ka alumasanu ganu. <sup>6</sup> Wee t̄e sa gberamə sañ maa gāanu waamə sa dimə ma n kun mɔ manna.

<sup>7</sup> Manna ye, dĩa bim kpika ya ka weene. <sup>8-9</sup> Wɔkuru Gusunə u ra dewa yu sarama ka kakoru kpa sisiru bururu təmbu bu yarima bu gura. Ba ra ye namwa, ñ kun me bu suni soru səə. Kpa bu ye sw̄e wekerø. Ba ra maa ka ye kiraru ko. Manna ye, ya ra n numəwa nge kira te ba sənwa.

<sup>10</sup> Məwisi u nua ma Isireliba ba wɔki yεnu ka yεnu, bwese kera ka bwese kera. Ma Yinni Gusunən məru seewa gem gem. <sup>11</sup> Yera Məwisin nukura sankira, u Yinni Gusunə sɔɔwa u nεε, mban sɔña añ ka man nənu geu mεera. Mban sɔña a ka man nuki sankumə me, ye a ka man tən be nəmu beria. <sup>12</sup> Nεna na tən ben gura sua? Nεna na bu

mara? Mban sɔ̄na a man sɔ̄mɔ̄ n bu bɔ̄kio nge mε  
bii mero u ra win bii bɔ̄ki, kpa n ka bu da sere mi  
a ben baababa nɔ̄o mwεeru kua. <sup>13</sup> Mana kon yaa  
wa n tɔ̄n beni kpuro wε. Domi wee ba man wuri  
koosimɔ̄, ba mɔ̄, n bu yaa wεeyɔ̄ bu tem. <sup>14</sup> Ne turo  
nañ kpε n bu sɔ̄be. Domi sɔ̄mu ni, nu bunu. <sup>15</sup> Na  
nun kanamɔ̄, à n ka man nɔ̄nu geu mεera, ye kaa ka  
man deri mesum, a man goowo. A ku de na n wāa  
nɔ̄ni swāaru sɔ̄o.

<sup>16</sup> Yinni Gusunɔ̄ u Mɔ̄wisi sɔ̄owa u neε, a man  
Isireliban guro gurobu wata ka wɔ̄ku te ta sāa  
wirugibu mεnnama. A de bu na nεn kuu ten mi ka  
wune sannu. <sup>17</sup> Miya nεn tii kon na n gari ko. Kon  
Hunde wi u wāa wune sɔ̄n dam sukum wuna n bu  
wε kpa bu wa bu nun somi a ka tɔ̄n be kpara. Kpa  
ba kun sāa wune turon sɔ̄munu. <sup>18</sup> Kaa Isireliba sɔ̄ a  
neε, bu tii deerasio sian sɔ̄. Ba koo yaa tem domi na  
ben wɔ̄kinu nua ni ba man koosimɔ̄. Ba mɔ̄, wara  
u koo bu yaa wε bu tem, domi sanam mε ba wāa  
Egibitiɔ̄ ba ye kpuro mɔ̄. Adama tεnε, Yinni Gusunɔ̄  
kon bu yaa wε. <sup>19</sup> N ñ sɔ̄o teeru tɔ̄na ba koo ye tem, ñ  
kun mε, sɔ̄o yiru, ñ kun mε, sɔ̄o nɔ̄ebu, ñ kun mε sɔ̄o  
wɔ̄kuru, ñ kun mε, sɔ̄o yendu. <sup>20</sup> Suru gira ba koo ye  
tem sere yu yari ben wεrun di, yu bu tusi. Domi ba  
ne, Yinni Gusunɔ̄ yina, ne wi na wāa ben suunu sɔ̄o.  
Ba man wɔ̄kisi ba mɔ̄, mban sɔ̄na ba yara Egibitin  
di.

<sup>21</sup> Mɔ̄wisi u Yinni Gusunɔ̄ wisá u neε, tɔ̄n durɔ̄bu  
nɔ̄rəbun suba natawa (600.000) Isireliba ba sāa, bɛn  
suunu sɔ̄o na wāa. Yera a neε, kaa bu yaa wε bu tem  
sere suru gira mam mam? <sup>22</sup> Domi wee, baa sà n  
besen yāanu ka keteba kpuro go, ñ kun mε su nim  
wɔ̄kun swεε kpuro mwεeri, ye kpuro yañ bu turi.

<sup>23</sup> Yinni Gusunə u Məwisi wisə u nee, a tamaa ne nəm kpiribugiiwa? Tə kaa wa ye na nun səwa yà kun koo koora.

*Gusunə u win Hunde  
Isireliban guro gurobu*

*wata ka wəku te wə*

<sup>24</sup> Ma Məwisi u yara u da u Yinni Gusunən gari yi tən be səwa. U Isireliban guro gurobu wata ka wəkuru mənna. Ma u dera ba sina ba ka kuu te sikerena. <sup>25</sup> Yinni Gusunə u sarama guru wii wuroru sə. Ma u ka Məwisi gari kua. Ma u Hunde ye u Məwisi wən dam sukum sua u guro guro be wə. Ma guro guro be, ba sāru wəri nge Gusunən səməbu, adama n n ka te.

<sup>26</sup> Ben yiru gabu Elidadi ka Medadi ba sina ben sansani, ban de Yinni Gusunən kuu ten mi. Adama ka me, Hunde u bu yəwa. Ma ba maa sāru mə sansani mi. <sup>27</sup> Yera aluwaasi goo u seewa u da u ye Məwisi səwa u nee, wee Elidadi ka Medadi ba sāru mə nge Gusunən səməbu besen sansani.

<sup>28</sup> Yera Yosue Nunin bii, wi u sā Məwisin səm kowo saa win aluwaasi piiburun di, u Məwisi səwa u nee, nen yinni, a bu yinario bu sā te ko.

<sup>29</sup> Məwisi u nùn səwa u nee, a nisinu məwa nen sə? Gusunə u de win Hunde yu du Isireliba kpuro sə, kpa bu ko win səməbu.

<sup>30</sup> Yen biru Məwisi ka guro guro be, ba doona sansani yen min di.

*Yinni Gusunə u Isireliba*

*kusunu wə bu tem*

<sup>31</sup> Yera Yinni Gusunə u woo seeya saa nim wəkun di. Ma woo ge, ga ka kusunu na nu teria sansani

ye səə kpuro nge səə teerun sanum saka. Kusu ni, nu tem wukiriwa gəm soonu yirun saka. <sup>32</sup> Təə te, ba kusunu gurawa sere ka wəkuru. Yen sisiru ba maa gura. Be ba gura fiiko, bera ba kilo nərəm nərəm suba dabinu gura. Ma ba kusu ni teria ba ka ben sansani sikerena. <sup>33</sup> Sanam me ba kusu ni nəə kpəe, yera Yinni Gusunən məru seewa ma u Isireliba nəni swāa bakaru kpəe. <sup>34</sup> Ma ba yam mi yīsiru kā kədən sikiru. Domi miya ba bu sika be ba bine kua too yaa ye səə.

<sup>35</sup> Saa min diya Isireliba ba seewa ba da Haserətuə. Ma ba yəra mi.

*Yinni Gusunə u dera  
bara disigira Mariamu wəri*

## 12

<sup>1</sup> Məwisi u kurə goo sua wi u sāa Etiopigii. Yera Mariamu ka Aroni ba Məwisi wīimə. <sup>2</sup> Ba nəe, Məwisi tənan min diya Yinni Gusunə u ra ka Isireliba gari ko? Aawo! U ra maa ka bu gari ko saa besen min di.

Yera Yinni Gusunə u gari yi nua. <sup>3</sup> N deema Məwisi u suuru mə too. Goo sari wi u nùn suuru kere handunia ye səə. <sup>4</sup> Ma Yinni Gusunə u Məwisi ka Aroni ka Mariamu səəwa u nəe, bəe kpuro i doo nen kuu bekurugirə.

Ma ba da mi. <sup>5</sup> Ma Yinni Gusunən tii u sarama guru wii wuro te səə, u na u yəra win kuu ten kənnəwə. Ma u Aroni ka Mariamu soka. Ma be yiru ye, ba na. <sup>6</sup> Ma u bu səəwa u nəe, i nen gari swaa dakio. Nen səmə be ba wāa bəen suunu səə, kāsiru səəra na ra bu tii səəsi, kpa n ka bu gari ko dosu səə. <sup>7</sup> Adama n n̄ mə na ra ka Məwisi nen səm kowo gari

ko. Domi u sāawa naanegii nēn t̄mbu sōo. <sup>8</sup> Nōo ka nōowa na ra ka nūn gari ko, n n̄ maa mō kāsiru sōo na ra nūn tii sōesi. Ú ra man wawa sāa sāa nge mē na sāa. N n̄ men na, mban sōna iñ berum kue i ka nēn sōm kowo Mōwisi wīi.

<sup>9</sup> Ma Yinni Gusunō u kā bu mōru kua. Yen biru u doona. <sup>10</sup> Yera guru wīi wuro te, ta doona. Ma Gusunō u dera bara disigira Mariamu wōri u bau kpikisu yara nge wēsu. Ma Aroni u Mariamu mēera u deema bara disigira ta nūn mwa. <sup>11</sup> Yera Aroni u Mōwisi sōowa u nēe, a man suuru kuo. A ku de su besen torarun are wa te sa kua nge gari bakasu. <sup>12</sup> A ku de Mariamu u n sāa nge bii wī ba mara goru ma win wasin bee tia ya kōsa.

<sup>13</sup> Yera Mōwisi u Yinni Gusunō nōögiru sue u nēe, a nūn békio.

<sup>14</sup> Ma Yinni Gusunō u nēe, Mariamun tundo ù n nūn yāatam sie wuswāao bañ koo nūn kēnusi gina sōo nōoba yiru sekurun sō? N n̄ men na, bu nūn yaro sansanin di sōo nōoba yiru, yen biru kpā bu ka nūn wurama yenuo.

<sup>15</sup> Ma ba Mariamu yara sōo nōoba yiru sansanin biru. Adamā Isireliba bañ doone sere ye Mariamu u wurama. <sup>16</sup> Yeniban biru Isireliba ba seewa Haserōtun di ba da ba sina Paranin gbaburō.

### *Mōwisi u t̄mbu gōra bu Kananin tem saria mēeri*

## 13

<sup>1</sup> Yinni Gusunō u Mōwisi sōowa u nēe, <sup>2</sup> a t̄mbu gōsio bu ka Kananin tem saria mēerim da, mē na bēe Isireliba wēemō. Bwese kera baayere sōo, tōn turowa kaa gōsi u da. Yēro u ko n sāawa bwese kera yen wirugii turo.

<sup>3</sup> Ma Mowisi u Yinni Gusunen gere wura. Utən be gəsa u bu gəra saa Paranin gbaburun di. Be u gəsa mi, be kpuro ba sāawa Isireliban wirugibu. <sup>4</sup> Ben yīsa wee.

Rubenin bweseru sāa, Samua, Sakurin bii.

<sup>5</sup> Simēen bweseru sāa, Safati, Horin bii.

<sup>6</sup> Yudan bweseru sāa, Kalébu, Yefunen bii.

<sup>7</sup> Isakarin bweseru sāa, Yiguali, Yosefun bii.

<sup>8</sup> Efaramun bweseru sāa, Osee, Nunin bii.

<sup>9</sup> Benyameen bweseru sāa, Paati, Rafun bii.

<sup>10</sup> Sabulonin bweseru sāa, Gadieli, Sodin bii.

<sup>11</sup> Yosefun bweseru sāa, be ba sāa Manasen bwese kera, Gadi, Susin bii.

<sup>12</sup> Danun bweseru sāa, Amiel, Gemalin bii.

<sup>13</sup> Aseen bweseru sāa, Seturi, Mikaelin bii.

<sup>14</sup> Nefitalin bweseru sāa, Nakabi, Fofusin bii.

<sup>15</sup> Gadin bweseru sāa, Geweli, Makin bii.

<sup>16</sup> Tən be ba sia mi, beya Mowisi u gəsa u gəra bu ka tem men saria mērim da. Ma u Osee Nunin bii yīsiru kā, Yosue.

<sup>17</sup> Mowisi u sere bu gori u bu sāwa u nēe, i doo Kananin temo saa men sōo yēsan nōm dwaru gian di kpa i ka da guunun bera gia. <sup>18</sup> Kpa i tem men saria mēri kpa i wa men təmbu bà n dam mō, bà kun maa dam mō, bà n dabi, bà kun maa dabi. <sup>19</sup> I ko i maa mēri tem me, mù n gea sāa, mù kun maa gea sāa. Kpa i mēri men wusu sù n gbāranu mō, sù kun maa mō. <sup>20</sup> Kpa i maa mēri mù n koo dīanu ko, mù kun maa mō, mù n dānu mō, mù kun maa mō. I wərugəru koowo. Kpa i ka men dāa marum wəma.

N deema saa ye sāra resem gbiikaa ya ra ye.

<sup>21</sup> Yen biruwā tən be, ba seewa ba tem men saria mērim da saa gbaburu te ba mō Sinin di n ka da

Rehəbuo, Hamatin swaa. <sup>22</sup> Ba dua tem me saa saa sõ yësan nõm dwarz gian di ma ba ka da sere Heboroni mi Ahimani ka Sesai ka Talimai, Anakin bibun bwesera wāa. Heboroni ye, ya Egibitin wuu ge ba mò Soani təkəru kere ka wōn nəoba yiru. <sup>23</sup> Ma ba tunuma wōwa ye ba mò Esikoli. Miya ba resem kāasa bura ka sere yen swaaru. Ma ba ye səowa be yiru ba sāarusie ka dəka. Ba maa dāa marum gam sua me ba mò gerenadi ka figi. <sup>24</sup> Ba wōwa ye yīsiru kā Esikoli, yèn sõ miya Isireliba ba resem swaaru bura.

### *Məwisin gərobu ba gəra tusia*

<sup>25</sup> Sõo weerun biru gero be, ba wurama. <sup>26</sup> Ye ba tunuma, ba wura Kadesi, Paranin gbəbur, mi Məwisi ka Aroni ka Isireliba kpuro ba wāa. Ma ba gerua ye ba wa kpuro. <sup>27</sup> Ba nee, too, sa da tem mi a sun gəra mi. Ka gem tem me, mu tim ka bom kokuməwa. Men dāa marum gam wee sa ka na. <sup>28</sup> Adama tən be ba wāa mi, ba dam mə. Ben wusu su kpā su maa gbəranu mə. Sa maa Anakin bibun bweseru wa mi, be ba ra n gunu. <sup>29</sup> Ma Amalekiba ba wāa men sõ yësan nõm dwarz gia. Ma Hətiba ka Yebusiba ka Amoreba ba wāa guunun bera gia. Kananiba ba maa wāa nim wōku ge ba mò Məditeranen bəkuo, ka sere Yuudenin daarun gooro.

<sup>30</sup> Yera təmba Məwisi wəkisim seewa. Ma Kaləbu u bu marisia u nee, su da su tem me mwa mu ko bəsegim. Sa ko nasara wa.

<sup>31</sup> Adama tən be ba ka nùn tem me məerim da mi, ba nùn siki ba nee, sañ kpē su ka tem men təmbu sanna. Domi ba sun dam kere.

<sup>32</sup> Ma ba seewa ba tem mε nanum sosi Isireliban wuswaaø. Ba nεe, tem mi sa bøsu mi, mu ra tømbu gowa be ba kĩ bu sina mi. Be sa wa mi kpuro ba gunuwa. <sup>33</sup> Sa mam Anakin bibun bweseru wa mi, be ba sāa doogo bweseru. Ben wuswaaø sa sāawa nge twee. Mεya ben tii ba koo sun garisi.

### *Isireliba bayina*

### *bu du Kananin temø*

## 14

<sup>1</sup> Ye Isireliba ba gari yi nua ba kpa, yera ba nøøgiru sua ba swī wøku giriru. <sup>2</sup> Ma ba Møwisi ka Aroni wøkisim wøri ba nεe, mban søna sañ daa yande gu Egibitiø, ñ kun mε gbaburu mini. <sup>3</sup> Mban søna Yinni Gusunø u ka sun na tem mini bu sun go ka takobi kpa besen kurøbu ka besen bibu bu ko yiberebagibu. N buram bo su wura Egibitiø.

<sup>4</sup> Ma ba wesiana ba nεe, su besen tii kparo kua, kpa su wura Egibitiø.

<sup>5</sup> Ye Møwisi ka Aroni ba nua mε, yera ba kibari ba wuswaa tem girari Isireliba kpuron wuswaaø. <sup>6</sup> Yera be søø, be ba tem mεn saria mεerim da mi, Yosue, Nunin bii ka Kalebu, Yefunen bii ba ben tiin yānu gεεka nuku sankiranun sø. <sup>7</sup> Ba gerua ba nεe, tem mε sa mεerim da mi, mu wā gem gem. <sup>8</sup> Tim ka boma mu kokumø mi. Gusunø ù n ka sun nønu geu mεera, u koo ka sun da mi, kpa u sun mu wε. <sup>9</sup> Yen sø, i ku nùn seesi, kpa i ku tøn ben bεrum ko. Domi ba koo kowa nge besen dñanu. Ben bñnu kun bu kñsumø. Adamø Yinni Gusunø u ko n ka sun wāa. I ku ben bεrum ko.

<sup>10</sup> Saa ye Isireliba ba gerunamə bu Kaləbu ka Yosue kpenu kasuku, saa yera Yinni Gusunən yi-iko ya sɔ̄ɔsira win kuu ten wollo Isireliba kpuron wuswaaø.

### *Məwisi u Isireliba*

#### *suuru kanamme Gusunən mi*

<sup>11</sup> Ma Yinni Gusunə u Məwisi sɔ̄ɔwa u nεε, sere saa yerà Isireliba ba ko n man gəma. Sere saa yerà ba koo den man naane ko, baa me na maamaaki dabinu kua ben suunu sɔ̄o. <sup>12</sup> Kon bu baranu kpɛ̄ewa, kpa n bu go. Adama wunε kon de wunen bweseru tu kpɛ̄a tu dəm ko n kere Isireli be ba tie.

<sup>13</sup> Yera Məwisi u Yinni Gusunə sɔ̄ɔwa u nεε, wuna a Isireliba yarama Egibitin di ka wunen dəm. Egibitigibu bà n nua ye a Isireliba kua, <sup>14</sup> ba koo ye Kananiba sɔ̄. N deema ben tii ba nua mə wuna a Isireliba kpare, a ra tii bu sɔ̄ɔsi nəni ka nəni. Ba maa nua ma wuna a bu kɔ̄su. Domi a ra n bu swaa gbiyiye sɔ̄o sɔ̄o ka guru wii wuroru, wɔ̄kuru kpa a n wāa dɔ̄o yara sɔ̄o. <sup>15</sup> Wee tɛ̄, à n wunen tən be kpeerasia nən teeru, bwese tuku ni nu wunen gari nua, nu koo gere nu nεε, <sup>16</sup> wunε Yinni Gusunə añ dəm mə a ka wunen tən be kpara a ka da tem mi a bu nɔ̄o mwε̄eru kua. Yen sɔ̄na a na a bu go gbaburø. <sup>17</sup> Yen sɔ̄ tɛ̄, na nun kanamə a de a wunen dəm bakam sɔ̄ɔsi nge me a gerua a nεε, <sup>18</sup> a sãawa suurugii. Wunen durom mu kpā. A ra təmbu ben toranu suuru kue. A ku ra toro deri a kun nùn seeyasie. Meyə a ra baababan toranun mɔ̄oru mwε ben bibun mi, sere ka ben sikadomino. <sup>19</sup> Yen sɔ̄, Yinni, a tən be, ben toranu suuru kuo. A wunen wənwəndu yaayo. A yaayo nge me a ra n bu suuru kuammə saa mìn di a bu yarima Egibitin di.

<sup>20</sup> Ma Yinni Gusunə u nεε, kon bu suuru kua nge mε a kana. <sup>21</sup> Adama sere ka nən wāaru ka sere maa nən yiiko ye ya tem kpuro yiba, <sup>22-23</sup> Isireli be, bañ duə tem mε səo, bu sere mu wa, mε na bōrua na nεε, kon ben baababa w̄. Domi ba nən yiiko ye wa ka səm maamaakigii ni na kua Egibitiø ka gbaburø. Ba maa nən laakari mεera gbaburø nən dabinu, ma bañ nən gere mεm nəowε, ba man gema. <sup>24</sup> Adama yèn s̄ Kalεbu, nən səm kowo uñ bwisika nge be, ma u nən gere swīi mam mam, kon de u du tem mε səo, mε u beram da kpa win bibun bweseru ta n mu mə. <sup>25</sup> Adama Amalekiba ka Kananibara ba wāa tem mi, wōwā səo. Yen s̄, sia i gəsirø i da gbaburø nim wōku ge ba mò Naa yari già.

### *Yinni Gusunə*

#### *u win təmbu sεeyasia*

<sup>26</sup> Yinni Gusunə u Məwisi ka Aroni s̄əwa u nεε, <sup>27</sup> na nua Isireliba ba man wəkisimø. Sere saa yerà ba koo man wəkisim mari. <sup>28</sup> I bu s̄əwə i nεε, sere ka nən wāaru kon bu kuawa nge mε ba gerumø. <sup>29</sup> Gbaburu miniwa ba koo dəlla bu gbi, be, be ba gesi gara be ba wō yendu mə ka be ba kere mε, ba ka man wəkisi. <sup>30</sup> Ben goo kun duə tem mi, mε na bεe nəo mwεeru kua, i ka sina, ma n kun mə Kalεbu, Yεfunen bii, ka Yosue, Nunin bii. <sup>31</sup> Adama ben bii be ba nεε, ba koo ko yiberεban yobu mi, beya kon de bu du tem mε səo, kpa ba n wāa mi, mε be, ba gəburu wa mi, <sup>32</sup> kpa be, bu dəlla gbaburu mini bu gbi. <sup>33</sup> Ben bii be, ba koo sirena wō weerus gbaburu mi, ben baababan mεm nəobu sarirun s̄ sere bu ka gəbisuku bu kpe. <sup>34</sup> Nge mε ba kua s̄əo weerus ba ka tem men saria mεera, nge meya kon maa de bu ko

wɔ̄o weeru gbaburɔ̄ ben toranun sɔ̄. Sɔ̄o wee ten tɔ̄o baatere ta ko n sāawa nge wɔ̄o tia. Saa ye sɔ̄ora ba koo gia ma gāa girina nà kun ka bu wāa. <sup>35</sup> Ne, Yinni Gusunɔ̄wa na yeni gerua. Meyə kon bu kua domi ba man seesi ben nuku kɔ̄surun sɔ̄. Ba koo gbisukuwa gbaburu mi, kpa ben gonu nu kam ko mi.

<sup>36</sup> Be Mɔ̄wisi u raa gɔ̄sa ba ka tem mɛn saria mɛerim da, ye ba wurama ba wɔ̄ki, ma ba tem mɛ nanum doke, <sup>37</sup> beya Yinni Gusunɔ̄ u so u go, <sup>38</sup> ma n kun mɔ̄ Yosue, Nunin bii ka Kalebu, Yefunen bii.

### *Isireliba ba maa tora*

<sup>39</sup> Ma Mɔ̄wisi u dà u Yinni Gusunɔ̄n gari yi Isireliba kpuro sɔ̄owá. Ma ben nuki sankira gem gem. <sup>40</sup> Ma ba seewa buru buru yellu ba yɔ̄owa guuru wɔllɔ̄ ba mɔ̄, Yinni, bɛsɛ wee sa ko da mi a nɛɛ, su da mi. Sa torawa.

<sup>41</sup> Yera Mɔ̄wisi u nɛɛ, mban sɔ̄na i Yinni Gusunɔ̄n wooda sara kpam. Ye i mɔ̄ mi, yañ ka bɛɛ gam dɔ̄o. <sup>42</sup> I ku da, domi Yinni Gusunɔ̄ uñ ka bɛɛ wāa. I ku de bɛɛn yibereba bu bɛɛ kamia. <sup>43</sup> Amalekiba ka Kananiba ba wāa bɛɛn wuswaaø. Ba koo maa bɛɛ go ka takobi, domi i Yinni Gusunɔ̄ biru kisi. Uñ ko n maa wāa ka bɛɛ.

<sup>44</sup> Ka mɛ, ba da guuru wɔllu mi. Adama bañ ka Yinni Gusunɔ̄n woodan kpakoro te de. Meyə Mɔ̄wisin tii kun maa ka bu de. <sup>45</sup> Saa ye sɔ̄ora Amalekiba ka Kanani be ba wāa guurun berɛ mi, ba na ba Isireliba wɔ̄ri. Ma ba bu go go ba ka da sere Hɔ̄omaø.

### *Som ka gum ka tam yākuru*

## 15

<sup>1</sup> Yinni Gusunø u Møwisi sɔ̄wø u nεε, <sup>2</sup> a Isireliba sɔ̄wø a nεε, i n dua tem mèn nɔ̄o mwεeru na bεε kua sɔ̄o, i ka sina, <sup>3</sup> ma i ne, Yinni Gusunø yāku dɔ̄o mwaararugiru kuamme, n̄ kun me nɔ̄o mwεerun yākuru, n̄ kun me kēru garu te i kua ka kīru, n̄ kun me tɔ̄o bakarun yākuru, i ko i tu kowa ka yāaru, n̄ kun me ka kεtε, n̄ kun me ka boo, kpa yāku ten nuburu tu man dore. <sup>4</sup> Wi u koo ka yaa saberu garu yākuru na, u koo som sɔ̄ndimawa kilo ita me ba burina ka gum ditiri tia ka bønu. <sup>5</sup> N n maa yāarun na ba ka yāku dɔ̄o mwaararugiru mò, n̄ kun me siarabun yākuru, ba koo tam ditiri tia ka bønu sɔ̄ndiwa te sɔ̄o. <sup>6</sup> N n maa yāa kinεrun na, ba ka yākuru mò, ba koo som sɔ̄ndimawa kilo nɔ̄oba tia, me ba burina ka gum ditiri yiru, <sup>7</sup> ka sere tam ditiri yiru. Bà n ye kpuro dɔ̄o doke, yen nuburu ta koo man dore. <sup>8</sup> N n maa kεtεn na, ba ka yāku dɔ̄o mwaararugiru mò, n̄ kun me siarabun yākuru, n̄ kun me nɔ̄o mwεerun yākuru, n̄ kun me yākuru garu, <sup>9</sup> ba koo som kilo nɔ̄oba nne me ba burina ka gum ditiri ita sɔ̄ndiwa yaa ye sɔ̄o, <sup>10</sup> ka sere tam ditiri ita. Saa ye sɔ̄o, bà n ye kpuro dɔ̄o doke, yen nuburu ta koo man dore. <sup>11</sup> Nge meyø ba ko n da ko bà n ka kεtε yākuru mò, n̄ kun me yāa kinεru, n̄ kun me yāa kpεmbu, n̄ kun me boo kpεmbu. <sup>12</sup> Yākuru baaterewa i ko i n da kue me, nge me ten wooda ya gerua. <sup>13</sup> Isireli baawurewa u ko n da ko me, ù n yākuru mò tèn nubura koo man dore. <sup>14</sup> Søbu be ba wāa saa fiiko, n̄ kun me be ba te mi, bà n yākuru mò tèn nubura koo ne, Yinni Gusunø dore, ba koo kowa nge me. <sup>15</sup> Wooda tia yera baawure u koo swii. Ya ko n maa wāawa sere ka bεen bibun bwesero. Ne,

Yinni Gusunə, nañ bεε Isireliba ka səbu wunanamə.  
**16** Wooda tia yera i ko i swī bεε kpuro.

### *Dĩa gbiikii ni ba koo din kēru*

**17** Yinni Gusunə u Məwisi sə̄wa u nεε, **18** a Isireliba wooda yeni sə̄wə a nεε, sanam me i ko i du tem me sə̄o, mi na ka bεε də̄o, **19** ma i dĩanu kua i ka di i ko i yen sukum suawa i man wε. **20** I ko i som buri kpa i man kiraru kua i ka na kpa i tu sə̄osi beri berika, nge me i ra ka bεen dĩa gbiikinu ne i sə̄osi. **21** Nge mεya i ko i ka man kira gbiikiru wε te i wə̄wa. Yeni ya ko n sāwa wooda sere ka baadommao.

### *Yāku ni ba koo ko*

#### *tora ni bañ yēn sō*

**22-23** Yinni Gusunə u maa Məwisi sə̄wa u nεε, tε̄wa? N kun me siawa? I n nən wooda gaa sara in̄ ka baaru, ye na bεε ka bεen bibun bweseru wε̄ saa wunen min di, **24** ma goo kun tora te wa, bεε kpurowa i ko i man yāku dɔ̄o mwaararugiru kua ka naa kine kpembu tēn nubura koo man dore. Kpa i som ka tam me ba ra səndi mi, doke ka sere maa boo kin̄eru, tora ten suurun sō. **25** Yāku kowowa u koo Isireliba kpuro dεerasiabun wororu koosi. Kpa be kpuro bu ben torarun suuru wa. Domi ba torawa bañ ka baaru, ma ba ka ben yāku dɔ̄o mwaararugiru na ka torarun yākuru ne, Yinni Gusunən wuswaa. **26** Kon bu ben tora te suuru kua ka maa sə̄o be ba wāa ben suunu sə̄o. Domi ba torawa bañ ka baaru. **27** N n maa tən turon na u tora uñ ka baaru, u koo boo niu wāa tiaguu gowa win tora ten sō. **28** Yāku kowowa u koo nūn dεerasiabun wororu kua. U n tu kua u kpa yēro u koo suuru wa. **29** Isireliba ka səbu kpuro wooda tia yera ba ko n mə ben goo ù n

tora uñ ka baaru. <sup>30</sup> Adama ben goo ù n yë ma torara u ka mò, u man torariwa. Ba koo nùn yarawa win tømbun min di. <sup>31</sup> Domi u nèn gari gëma, ma u nèn woodaba sara. Ba koo nùn yarawa win tømbun min di kpa u win torarun are sëbe.

### *Goo u tðø wërarugirun*

#### *wooda sara*

<sup>32</sup> Sanam më Isireliba ba wāa gbaburø ba goo mwa u dāa guramø tðø wërarugiru søø. <sup>33</sup> Be ba nùn wa, ba ka nùn da Mëwisi ka Aronin mi ka Isireliba kpuron mi. <sup>34</sup> Ma ba nùn kënusi dirø gina, domi bañ yë ye ba koo nùn kua. <sup>35</sup> Yinni Gusuno u Mëwisi sðøwa u nëe, ba koo yëro yarawa sansanin di kpa bu nùn kpenu kasuku bu go.

<sup>36</sup> Ma ba nùn yara sansanin di ba kpenu kasuka ba go, nge më Yinni Gusuno u Mëwisi sðøwa.

#### *Yabenun sari*

<sup>37</sup> Yinni Gusuno u Mëwisi sðøwa u nëe, <sup>38</sup> a Isireliba sðøwø a nëe, bu tii sari kuo yi n sääre ben yabenun swaa buaa kpa bu yi wëë gaaduragii sëre. <sup>39</sup> Bä n sari yi wa, yi sääre, ba koo nèn woodaba yaaya bu ye mëm nøøwa. Saa ye, bañ maa ben tiin gôru kîru mò bu sere ko naane sarirugibu, bu da bu bñnu gasiri. <sup>40</sup> Nge mëya ba koo ka nèn woodaba yaaya, kpa bu ka ye mëm nøøwa kpa ba n sää nènem nèn sø. <sup>41</sup> Nëna na sää Gusuno wi u bu yara Egibitin di na n ka sää ben Yinni.

### *Kore u Mëwisi seesi*

## 16

<sup>1</sup> Kore, Yiseharin bii, Kehatin debubu, Lefin bweseru søø, ka Datani ka Abiramu, Eliabun bibu

ka Oni, Pelentin bii, Rubenin bweseru səə, <sup>2</sup> be kpurowa ba Məwisi seesi, ka sere maa təmbu goobu ka weeraakuru (250) gabu be ba sāa Isireliban wirugii be ba naane sāa. <sup>3</sup> Yera ba menna ba Məwisi ka Aroni soka ba nəe, ya den tura me, bese Isireliba kpuro sa sāawa be Gusunə u gəsa. U maa wāa bese kpuron suunu səə. Mban səna i tamaa i sun kere, bese, Gusunən tən be sa tie.

<sup>4</sup> Sanam me Məwisi u gari yi nua, yera u wuswaa tem girari. <sup>5</sup> U Kore ka win tən be səwa u nəe, sia bururu, Yinni Gusunə u koo sun səsiwi u sāa wigii ka wi u gəsa. U koo maa de yēro u nùn susi. <sup>6</sup> Tē, wunə Kore ka wunegibu, i dəo guratii suo. <sup>7</sup> Sia kpa i turare dəo doke Yinni Gusunən wuswaa. Sa ko wa wi u koo gəsi u n sāa wigii. An̄ wa bē Lefin bibu i banda?

<sup>8</sup> Məwisi u kpam Kore səwa u nəe, i swaa dakio bē Lefiba. <sup>9</sup> Ye Yinni Gusunə u bē gəsa Isireliba səə, i ka win səmburu ko win kuru səə, kpa i n sāa win təmbun səm kowobu, yañ bē tura? <sup>10</sup> U wura wunə Kore ka wunegibu i nùn susi, yera i maa yāku kowobun səmburu kī? <sup>11</sup> N n men na, Yinni Gusunəwa i seesimə. Domi wara ra n Aroni i n ka sere nùn wəki.

<sup>12</sup> Yera Məwisi u gəra bu da bu Datani ka Abiramu, Eliabun bibu sokuma. Adama ba yina bu na. <sup>13</sup> Ba nəe, wee Məwisi u dera sa tem deri mi tim ka bom mu kokumə, ma u ka sun na gbaburu mini u ka sun go. Yeni yañ nùn tura? Yera u kī u maa sun dam dəre? <sup>14</sup> Un̄ ka sun ne tem mi tim ka bom mu kokumə. Un̄ maa sun resəm gbaanu wē. U tamaa u koo sun nəni wəkewa? U doo, sañ wee.

<sup>15</sup> Ma məru ya Məwisi mwa, u Yinni Gusunə səwa u nəe, a ku ben yākuru mwa. Nañ bu keteku

mwaarire. Nañ maa ben goo kësa kuare.

### *Yinni Gusunən u Kore*

#### *ka wigibu kam koosia*

<sup>16</sup> Mɔwisi u maa Kore sɔ̄wa u nεε, wunε ka wunegibu i na sia Yinni Gusunən wuswaa, kpa Aroni u n wāa mi. <sup>17</sup> Kpa bεen baawure u win dɔ̄o guratia sua u turare dɔ̄o doke Yinni Gusunən wuswaa. Yi kpuro yi ko n sāawa mi, goobu ka weeraakuru (250). Wunε ka maa Aroni i ko i n maa bεegia nəni.

<sup>18</sup> Ma ben baawure u win dɔ̄o guratia nəni u dɔ̄o doke. Ma ba turare doke. Ba da ba yɔ̄ra Yinni Gusunən kurun kɔnnɔwɔ ka Aroni ka sere maa Mɔwisi. <sup>19</sup> Ma Kore u Isireliba kpuro mənna Mɔwisi ka Aronin sɔ̄, kurun kɔnnɔ mi.

Yera Yinni Gusunən yiikon girima ya sɔ̄sira. <sup>20</sup> Ma u Mɔwisi ka Aroni sɔ̄wa u nεε, <sup>21</sup> i doonə tən ben min di, domi kon bu gowa mi tən tē ge.

<sup>22</sup> Ma Mɔwisi ka Aroni ba wuswaa tem girari ba nεε, Gusunə wuna a hunde koni kpuro wāaru wɛ. Tən turon torarun sɔ̄na kaa təmbu kpuro go?

<sup>23</sup> Yinni Gusunə u Mɔwisi wisə u nεε, <sup>24</sup> a de tən be, bu se Kore ka Datani ka Abiramun bækun di bu da n toma.

<sup>25</sup> Mɔwisi u seewa ka Isireliban guro gurobu ba da ba Abiramū ka Datani deema. <sup>26</sup> Saa yera u Isireliba sɔ̄wa u nεε, i tondo saa tən kɔ̄so ben kunun di. I ku maa ben gāanu baba. I n maa yina i kua me, i ko i gbi ben tora nin sɔ̄.

<sup>27</sup> Ma tən be kpuro ba ka Kore ka Datani ka Abiramū tonda.

Ma Datani ka Abiramu ba yara ba wāa ben kunun kōnnōwō ka ben bibu ka ben kurəbu ka ben debumīnu. <sup>28</sup> Ma Mōwisi u nēe, tē i ko i già ma Gusunəwa u man gəsa n ka səma ye ko ye i waamə na mò. Nañ ye mò ka nen gōru kīru. <sup>29</sup> Tən be, bà n gu nge mē təmbu kpuro ba ra gbi, n n Yinni Gusunə u man gəsa. <sup>30</sup> Adama Yinni Gusunə ù n gāa nanumginu kua, u dera tem mu nəə baara mu bu mwε ka ye ba mə kpuro, kpa bu da gəribun wāa yero, saa yera, i ko i già ma tən be, ba Yinni Gusunə gemawa.

<sup>31</sup> Sere Mōwisi u ka gari gere u kpe, ma mi ba yō mi, mu besira. <sup>32</sup> Ma tem mu nəə baara mu Kore ka win yənugibu ka ben arumani kpuro mwε, ka sere maa Datani ka Abiramu ka ben yənugibu, ka ben arumani kpuro. <sup>33</sup> Ma ba dua gəribun wāa yero wasiru, ka sere ben ye ba mə kpuro. Ma tem mē, mu bu wukiri. Nge məya ba ka doona Isireliban suunu səən di. <sup>34</sup> Isireli be ba wāa mi, sanam mē ba tən ben wuri nua, yera ba dukı yakikira. Domi bərum bu mwa, tem mu ku raa ben tii mwε. <sup>35</sup> Ma dəə yara ya na, ya təmbu goobu ka weeraaku (250) te di, te ta turare dəə dokemə mi.

### *Kore ka wigibun dəə guratiiin*

#### *gari*

## 17

<sup>1</sup> Yinni Gusunə u Mōwisi səəwə a nēe, <sup>2</sup> a Eleasaa, Aroni yāku kowon bii səəwə a nēe, u təmbu goobu ka weeraaku ten dəə guratii yi wunə saa dəən di. Domi yi sāawa Yinni Gusunəgii. Adama u yin dəə yēe goro u ka da u yari n toma. <sup>3</sup> Kpa u de bu dəə guratii yi so yi ko fərε fərε kpa bu ka yi yāku yero

wukiri. Domi Yinni Gusunəwa ba ka yi turare dɔ̄o dokeɑ, kpa ye kpuro ya n sāa yaayatia Isireliban mi.

<sup>4</sup> Ma yāku kowo Eleasaa u dɔ̄o guratii yi ba kua ka sii gandu mi gura, ba ka yāku yerun wukiritii kua.

<sup>5</sup> Ma ya kua yaayatia Isireliban sɔ̄ ye ya bu sɔ̄mɔ̄ ma goo kun kpē u Yinni Gusunə turare dɔ̄o dokeɑ, ma n kun mɔ̄ be ba sāa Aronin bibun bweseru. Wi u maa yina u kua mɛ, ba koo yēro kuawa nge mɛ ba Kore ka wigibu kua. Domi mɛya Yinni Gusunə u Aroni sɔ̄wəwa, saa win səm kowo Məwisiñ nɔ̄n di.

### *Təmba Məwisi ka Aroni*

#### *taare wɛ*

<sup>6</sup> Yera sisiru bururu Isireliba kpuro ba ka Məwisi ka Aroni wəki ba mè, wee i dera Yinni Gusunən təmba gu.

<sup>7</sup> Sanam mɛ tən be kpuro ba mennamɔ̄ bu ka Məwisi ka Aroni seesi, yera ba mɛera Yinni Gusunən kurun bera gia, ma ba wa guru wii wuroru ta tu wukiri. Ma Yinni Gusunən yiiko ya sɔ̄osira. <sup>8</sup> Məwisi ka Aroni ba da kuu ten mi. <sup>9</sup> Ma Yinni Gusunə u Məwisi sɔ̄wəwa u nɛe, <sup>10</sup> i yario tən ben suunu sɔ̄n di. Kon bu gowa nəni kpaki teeru.

Ma Məwisi ka Aroni ba yiira ba wuswaa tem girari. <sup>11</sup> Məwisi u Aroni sɔ̄wəwa u nɛe, a dɔ̄o guratia ye suo, kpa a dɔ̄o sua yāku yerun di a doke ye sɔ̄, kpa a turare doke mi, kpa a da tən ben mi gia fuuku a bu deerasiabun wororu koosi. Domi Yinni Gusunən mɔ̄ru ya seewa. Kēsi kēsi bararu ta torua.

<sup>12</sup> Aroni u dɔ̄o guratia ye sua nge mɛ Məwisi u gerua. U da tən ben mi. Ma u deema kēsi kēsi bararu ta torua tən ben suunu sɔ̄. Ma u turare dɔ̄o doke, u bu deerasiabun wororu koosi. <sup>13</sup> Ma u yɔ̄ra be ba gu ka be ba wasin baa sɔ̄. Ma bara te, ta

yɔ̄ra. <sup>14</sup> Tɔ̄mbu nɔ̄rɔ̄bun suba wɔ̄kura nnɛ ka nata ka wunɔ̄buwa ba gu yen dɔ̄ma te (14.700), be ba gu Koren torarun sɔ̄ baasi. <sup>15</sup> Yen biru Aroni u gɔ̄sira u da Mɔ̄wisin mi, Yinni Gusunɔ̄n kuu ten kɔ̄nnɔ̄wɔ̄. Ma bara te, ta yɔ̄ra.

### *Aronin deka*

<sup>16</sup> Yinni Gusunɔ̄n u Mɔ̄wisi sɔ̄wɔ̄ u nɛɛ, <sup>17</sup> a Isireliba sɔ̄wɔ̄ a nɛɛ, ben bwese kera baayeren wirugii u ka deka tia na, <sup>18</sup> kpa a ben baawuren ȳisiru yore win deka sɔ̄o, kpa a Aronin ȳisiru yore Lefin bwese keran deka sɔ̄o. Domi bwese kera baayeren wirugii u ko n win deka mɔ̄wa. <sup>19</sup> Yen biru kpa a deki yi yi nɛn kuu bekurugirɔ̄, mi na ra ka bɛɛ yinne. <sup>20</sup> Wi na gɔ̄sa, win deka ya koo kpara. Saa yera kon Isireliba marisia wɔ̄ki ni ba bɛɛ koosimɔ̄ min sɔ̄.

<sup>21</sup> Mɔ̄wisi u Isireliba kpuro ye sɔ̄wɔ̄. Ma bwese kera baayeren wirugii u deka tia w̄e. Ma yi kpuro yi kua deki wɔ̄kura yiru. Ma Aronin deka ya wāā begiin suunu sɔ̄o. <sup>22</sup> Mɔ̄wisi u ka deki yi da Yinni Gusunɔ̄n wuswaao kuu bekurugiru mi. <sup>23</sup> Bururu Yam sāreru Mɔ̄wisi u dua kuru mi, ma u deema Aronin deka ye ya sāā Lefiban deka, ya kpara ya w̄esu kua sere ya binu mara nu ye. <sup>24</sup> Ma Mɔ̄wisi u deki yi gura Yinni Gusunɔ̄n wuswaan di, u ka da Isireliba kpuron wuswaao bu ka wa kpa ben baawure u win deka sua. <sup>25</sup> Yinni Gusunɔ̄n u Mɔ̄wisi sɔ̄wɔ̄ u nɛɛ, a ka Aronin deka wuro a yi woodan kpakoro ten wuswaao, ya n ka sāā seeda Isireliban sɔ̄ be ba man seesi. Nge meya bañ maa ka man wɔ̄kimɔ̄ n sere bu go.

<sup>26</sup> Ma Mɔ̄wisi u kua kpuro nge me Yinni Gusunɔ̄n u nùn sɔ̄wɔ̄.

*Yāku kowobu  
ka Lefiban sōmburu*

<sup>27</sup> Yera Isireliba ba na ba Mōwisi sōwa ba nεε, wee, sa gbimō sa dəo. <sup>28</sup> Wi u gesi Yinni Gusunən kuu te susi, u ra gbiwa. Meyə sa ko n gbimō sa n dəo?

## 18

<sup>1</sup> Yinni Gusunə u Aroni sōwa u nεε, wunε ka wunen bibun bweseru ka Lefiba kpurowa i ko i bεen toranun are sōbe i n tora Yinni Gusunən sāa yerə. Adama wunε ka wunen bibun bweseru tənawa i ko bεen toranun are sōbe ni i kua yāku kobun sōmburu səo. <sup>2</sup> I n da kuu bekurugii ten wuswaa, mi woodan kpakoro te, ta wāa, a de wunen tundo bisibu Lefiba bu na bu ka bεε somi, wunε ka wunen bibu. <sup>3</sup> Ba ko n da kowa ye a bu sōwa kuu ten nənubu səo. Adama bañ sāarun dendì yānu ganu babamō, ñ kun mē yāku yeruginu, kpa i ku rā ka gbin sō, wunε ka be. <sup>4</sup> Beya ba ko n da bεε somi kpa ba n da kuu ten sōmburu ko. Tən tuko goo kun susimō mi. <sup>5</sup> Bεen tii i ko n da sōmburu kowa yāku yerə ka dii te ta dεere gem gem mi. Nge meya nən məru kun maa ka seemō Isireliban sō. <sup>6</sup> Na bεen tundo bisibu Lefiba gəsa Isireliban suunu səən di. Ba sāawa nəgibū, adama na bεε bu wēwa bu ka kuu ten sōmburu ko. <sup>7</sup> Wunε ka maa wunen bibu, bεegia yāku kobu yāku yerə ka sere ye ya sāa dii te ta dεere gem gem sōma. Sōmbu tera i ko i ko. Nəna na bεε tu wēemō. Ta sāawa kēe geeru. Tən tuko goo ù n man susi, kon nùn gowa.

*Ye ya sāa  
yāku kowobun dīanu*

<sup>8</sup> Yinni Gusunø u Aroni sɔɔwa u nεε, wee, yāku ni Isireliba ba ka man naawamme kpuro sɔɔ, kon bεε bεen saria wε wune ka wunen bibu. Ya ko n sāawa wooda sere ka baadommaø. <sup>9</sup> Yāku ni ba koo man kua, bà n kpa, nñin sukuñ kaa n mø, ni wee, torarun yākunu, ka yāku ni ba ra ka toraru sōme, ka gberun dīanun yākunu, ka kēnu. Bà n yāku ni sɔɔ negia wīa, sukuñ mε mu tia wune ka wunen biba i mε kpuro mø. <sup>10</sup> I ko i da i mu diwa yam deeramo. Wune ka wunen bii tøn durø baawurewa i ko mu di. I ko mu garisiwa dīa deeranu. <sup>11</sup> Wee ye ya ko n maa sāa bεegia. Yera kēε ni ba ka man naawa ba sōɔsi beri berika. Ya ko n sāawa wune ka wunen bibugia. Be ba deere wunen yεnuø kpuro, bera ba koo ye di. <sup>12</sup> Kaa maa dīa gbiikii ni ba ka man naawan tii sua. Guma? Aa, alikamawa? Aa, tam kpama? Wune ka wunen biba i ko n ye mø. <sup>13</sup> Dīa gbiikii ni ba ka man gesi naawa kpuro, nu ko n sāawa wune ka wunen bibuginu. Be ba deere wunen yεnu sɔɔ, bera ba koo nu di. <sup>14</sup> Gaa ni ba maa yi nεn sɔɔ mam mam, nu ko n sāawa bεeginu. <sup>15</sup> Bii tøn durø gbiikoo ka yaa saberun buu døø gbiikuu ge ba koo man wε, ye kpuro ya ko n sāawa wune Aronigia. Adama kaa dewa ba n da bii tøn durø gbiikoo yacie ka sere maa yaa ye ba ku ra ka yākuru kon buu. <sup>16</sup> Kaa de bu ye yakiawa saa min di ya suru tia mø, ka sii geesun gobi nɔɔbu nge mε ba ra yi yīire sāa yero. Gobi yin tian bunum mu sāawa garamu wøkuru. <sup>17</sup> Adama añ kete buu døø gbiikuu yakiawø, ñ kun mε yāa buu, ñ kun mε boo buu. Sabe nini kpuro nu sāawa ni ba ra ka yākuru ko. Kaa nu gowa a nin yεm wisi yāku yero kpa a nin gum døø doke kpa men nuburu tu nε, Yinni Gusunø dore. <sup>18</sup> Yen yaa kpuro ya ko

n sāawa bēegia nge mē siarabun yākurun yaa taa nōm geugiru ka ten guro guroru nu sāa bēeginu. <sup>19</sup> Yākunu kpuro ni Isireliba ba ka gesi na nēn mi, ba sō̄osi beri berika na bēe nu wēēmō. Ya ko n sāawa wooda sere ka baadommao wunē ka wunen bibun bweserun sō̄.

<sup>20</sup> Yinni Gusunō u maa Aroni sō̄wa u nēe, aṇ tem wasi Isireliban suunu sō̄. Nēna kaa n mō. Nēna na sāa wunen arumani.

### *Ye ya ko n sāa Lefiban saria*

<sup>21</sup> Ye Isireliba ba wa kpuron wōkuru baateren wōllō, yen tia ye ba ra man wē, Lefibara kon ye wē ben sōmbu te ba mō nēn sāa yerən sō̄. <sup>22</sup> Isireli be ba tie, baṇ maa susimō nēn sāa yerə bu sere taare wa ye ya koo de bu gbi. <sup>23</sup> Lefibara ba koo sōmburu ko nēn sāa yerə, beya ba koo maa ben tiin toranu sōbe ni ba koo ko mi. Baṇ ko ba n tem mō Isireliban suunu sō̄. Ya ko n sāawa wooda sere ka ben bibun bweserō. <sup>24</sup> Adama ye Isireliba ba wa kpuron wōkuru baateren wōllō, yen tia ye ba ra man wē, yeya ya ko n sāa begia. Yen sōna na nēe, baṇ tem gam wasi nge Isireli be ba tie.

<sup>25</sup> Yinni Gusunō u Mōwisi sō̄wa u nēe, <sup>26</sup> a Lefiba sō̄wā a nēe, Isireliban ye ba wa kpuron wōkuru baaterere sō̄, yen tia tia ye ba ra man wē, Lefi be, bà n ye mwa ya kua begia, ben tii bu maa wōkuru baaterere sō̄ tia wunō nēn sō̄. <sup>27</sup> Nge meya ben tii ba koo maa ka ben kēnu na ni nu sāa nge ben gberun dīanu, n̄ kun mē tam. <sup>28</sup> Nge meya ba ko n da maa ye ba wa Isireliban min di kpuron wōkuru baateren wōllō tia wunē. Aroniwa ba ko n da ye wē. <sup>29</sup> Kēe ni ba gesi wa kpuro ba ko n da Gusunōgia wunewa. Gea ba koo nūn wuna. <sup>30</sup> Bà n Gusunōgia wīa, ye

ya tie ya ko n sāawa begia, nge mε Isireli be ba tie ba ra ben alikama ñ kun mε ben tam tii yiye, bā n Gusunəgia wīa. <sup>31</sup> Be ka ben yenugibu ba koo kpī bu dīa ni di mi ba tura. Domi nu sāawa ben səmburun kɔsiaru. <sup>32</sup> Bā n gea wuna nēn sō, ma ba ye ya tie di, ban̄ Isireliban kēe ni ba man wē disi doke, ban̄ maa toraru garu mō mi sō, bu sere gbi.

### *Naa nia swāan torom*

## 19

<sup>1</sup> Yinni Gusuno u Məwisi ka Aroni sōwā u nēe, <sup>2</sup> i Isireliba sōwā i nēe, wee ye ne, Yinni Gusuno na gerua. Na nēe, bu ka naa nia swāa na ye ya kun bau mō, kpa ya kun alebu gaa mō, kpa ba kun ka ye sōmburu koore. <sup>3</sup> Kpa bu ye yāku kowo Eleasaa nōmu bəria. U ko de bu ka ye dawa sansanin biruɔ kpa bu ye saka win wuswaa. <sup>4</sup> Eleasaa wi, u koo naa yen yēm dēkawa ka win niki bia kpa u mu yēka nōn nōoba yiru nēn kurun kōnnō gio. <sup>5</sup> Kpa u de bu naa gira ye dō meni win nōni biru ka yen gōna ka yen yēm ka yen bisu kpuro. <sup>6</sup> Saa ye sōra u koo sedurun dāa ka dāa kiku ge ba mō isəpu \* doke dō wi sō, ka wē wunəmgii kpa ye kpuro yu dō mwaara ka naa ye sannu. <sup>7</sup> Yen biru Eleasaa wi, u koo win yānu teawa kpa win tii u wobure. Yen biru kpa u gəsira u wura sansani. Adama ka mε, u ko n disi mōwa sere ka yokəo. <sup>8</sup> Wi u naa ye dō meni, u koo maa win yānu teawa kpa u wobure. Win tii u ko n maa disi mōwa sere ka yokəo. <sup>9</sup> Wi u dēere wiya u koo da u yen torom gura kpa u mu

---

\* **19:6** isəpu - Yuuban tem kikisa. Sin wurusa ba ra ka sāarun dendī yānu yēke bu ka nu dēerasia.

yi sansanin biruɔ mi disi kun wāa. Miya ba koo ka mu Isireliba d̄eerasiabun nim kua. Nim mε, mu ko n sāawa nge yākuru torarun sō. <sup>10</sup> Wi u torom mε gura, u koo win yānu teawa. Ka mε, u ko n disi mōwa sere ka yokāo. Yeni ya ko n sāawa wooda sere ka baadommaɔ Isireliban sō, ka sere maa sō be ba wāa ben suunu sōn sō.

### *D̄eerasiabun wooda*

<sup>11</sup> Wi u tōn goru baba u ko n disi mōwa sere sō nōoba yiru. <sup>12</sup> D̄eerasiabun nim meya ba koo nūn yēka sō itase ka maa sō nōoba yiruse, kpa u sere d̄eera. Adama ù kun tii d̄eerasie sō itase ka maa sō nōoba yiruse te, u ko n disi mōwa. <sup>13</sup> Wi u tōn goru baba, ma uñ tii d̄eerasie, u nēn kuru disi dokewa mi. Ba koo nūn yarawa Isireliban suunu sōn di. Domi ban nūn d̄eerasiabun nim mε yēke. Yēro u gina disi mōwa mi.

<sup>14</sup> Wooda gaa wee maa. Goo ù n gu win kurō, be ba wāa kuu te sō, u ka gu ka be ba dua mi, be kpuro ba disi duurawa mi, sere sō nōoba yiru. <sup>15</sup> Weke te ta maa wāa kuru mi, ma tañ wukiri, ten tii ta disi duurawa mi. <sup>16</sup> Wi u goru baba yakasō wi ba go ka takobi, ñ kun mε wi u gəo diro gu, ka maa wi u tōnun kukunu ñ kun mε sikiru baba, be kpuro ba disi duurawa mi sere sō nōoba yiru. <sup>17</sup> Bu ka wi u disi duura d̄eerasia, naa swāa yen torom meya ba koo doke gbēeru sō bu nim gem doke. <sup>18</sup> Wi u deere wiya u koo dāa kiku ge ba mā isəpu sua kpa u ge wasi nim mε sō u kuu te yēka ka sere dendy yāa ni nu wāa mi ka tōn be ba wāa mi. Nim meya ba koo maa ka tōnu baawure yēka wi u tōn goru ñ kun mε tōn kukunu ñ kun mε, sikiru baba. <sup>19</sup> Ba koo nūn nim mε yēkawa sō itase ka sō nōoba yiruse. Yen

biru wi ba mu yēka mi, u koo win yānu teawa kpā u wobure. Saa yokā yen diya u dēera. <sup>20</sup> Adama goo ù n disi mō, ma ban̄ nūn dēerasiabun nim me yēke u ka dēera, ba koo nūn yarawa Isireliban suunu səon di, yēn sō u nēn kuru disi doke. <sup>21</sup> Yeni ya ko n sāawa wooda sere ka baadommao Isireliban sō. Wi u tənu dēerasiabun nim me yēka, u koo maa win yānu teawa. Wi u maa nim me baba kpuro u ko n disi mōwa sere ka yokao. <sup>22</sup> Tənu wi u disi mō, gāa ni u baba kpuro nu disi duurawa mi. Wi u maa nu baba, yēron tii u disi duurawa mi, sere ka yokao.

### *Meribān nim*

## 20

<sup>1</sup> Wōn suru gbiikoo səora Isireliba kpuro ba tunuma gbaburō te ba sokumō Sini, ma ba sinā Kadésiō. Miya Mariamu u gu, ma ba nūn sika.

<sup>2</sup> Saa ye səora Isireliba ba nim bia ma ba Mōwisi ka Aroni seesi. <sup>3</sup> Ma tən be, ba ka Mōwisi wəki ba nee, mban sōna añ dere Yinni Gusunō u yande sun go sanam me u besegibu goomō. <sup>4</sup> Mban sōna a ka besē Gusunōn təmbu na gbaburu səo mini su ka gbi besē ka besen yaa sabenu. <sup>5</sup> Mban sōna a sun yarama Egibitin di ma a ka sun na yam kēsum mini, mi sañ kpē su dīanu ganu duure. Dāa ye ba mō figie sari mini, resem maa sari, gerenadi maa sari. Meyā nim kun mam wāa me sa ko nō.

<sup>6</sup> Ma Mōwisi ka Aroni ba tən be deri ba da Yinni Gusunōn kurun kənnəwō. Ma ba yiira ba wuswaa tem girari. Ma Yinni Gusunōn yiiko ya səosira. <sup>7</sup> Yinni Gusunō u Mōwisi səowā u nee, <sup>8</sup> a wunen deka suo kpā wunē ka wunen mō Aroni i Isireliba

mεnna kpa i ka kpee te gari ko be kpuron wuswaa. Ta koo nim yara i nɔ bεε ka bεεn yaa sabenu.

<sup>9</sup> Ma Mɔwisi u dεka ye sua ye ya wāa Yinni Gusunən sāa yerə nge mε Yinni Gusunən tii u nùn sɔ̄wa. <sup>10</sup> Ma wi ka Aroni ba Isireliba kpuro sokə ba da kpee ten mi. Yera Mɔwisi u nεε, i swaa dakio i nɔ bεε mεm nɔɔ sariba. Kpee tenin min diya sa ko de nim mu yari?

<sup>11</sup> Yera Mɔwisi u kpee te so ka win dεka ye, nɔn yiru ma nim mu yara n kpā kpee ten min di. Ma tɔn be kpuro ka ben yaa sabenu ba nim mε nɔra. <sup>12</sup> Yera Yinni Gusunə u Mɔwisi sɔ̄wa u nεε, yèn sɔ i man naane bira iñ man bεere wε Isireliban wuswaa, yen sɔna nañ derimo i ka bu du tem mε sɔa, mε na bu nɔɔ mwεεru kua.

<sup>13</sup> Gari yinin sɔna ba ra nim mε soku Meriban nim. Yen tubusiana sannən nim. Domi miya Isireliba ba Yinni Gusunə wɔkisi ma u bu win dεeraru sɔ̄osi.

### *Edəmuban sunɔ u yina*

### *Isireliba bu kpe*

#### *Saa win tem di*

<sup>14</sup> Saa Kadəsi min diya Mɔwisi u Edəmun sunɔ gorria bu nùn sɔ nge mε be Isireliba ba wahala kua. <sup>15</sup> U nεε, yellu, besen baababa ba da Egibitiø. Miya besen bwesera sina n ka tε. Ma Egibitigibu ba sun nɔni sɔ̄wa bεse ka besen baaba be. <sup>16</sup> Saa ye sɔɔra sa Yinni Gusunə nɔagiru sue sa nùn somiru kana. Ma u besen nɔɔ nua u win gərardo gərima u sun yara Egibitin di. Wee tε sa wāa Kadəsi mini wunen tem nɔɔ buria yerə. <sup>17</sup> Yen sɔ, sa nun kanamo a de su wunen tem bukiana. San kpeeyə ka bεεn gbea già,

sañ bœen resem gbaanu duə, sañ maa bœen dækəban nim nɔrumɔ. Swaa baka sa ko mwa sañ geramɔ gam sere su ka bœen tem sara.

<sup>18</sup> Adama Edəmun sina boko wi, u nεε, iñ nεn tem bukianamɔ. I n maa yina i na, kon ka bœe tabu ko.

<sup>19</sup> Ma Isireliba ba nùn wisə ba nεε, sa ko kpewa ka swaa baka. Besè ka besen yaa sabenu sà n wunen dækəban nim nɔra sa ko yen gobi kɔsia. A gesi de su wunen tem bukiana su doona.

<sup>20</sup> Ma Edəmun sina boko wi, u nεε, nañ wurewa i nεn tem bukiana.

Yera Edəmuban tabu kowobu ba seewa ba da ba ka Isireliba yinna. <sup>21</sup> Ma ba yina Isireliba bu ben tem me bukiana bu doona. Saa ye sɔɔra Isireliba ba gɔsira, ba kpa gam gian di.

### *Aronin gɔo*

<sup>22-23</sup> Isireliba kpuro, ba seewa Kadesi min di ba da Horin guuro, Edəmun tem nɔɔ bura yero. Miya Yinni Gusunɔ u ka Mɔwisi ka Aroni gari kua u nεε, <sup>24</sup> wee Aroni u koo gbi. Un̄ duə tem me sɔɔ me kon Isireliba wẽ yèn sɔ iñ nεn wooda mem nɔɔwε ye na bœe wẽ Meribao. <sup>25</sup> Wunε Mɔwisi, a Aroni ka win bii Eleasaa suo a ka bu da Horin guu ten wɔllɔ. <sup>26</sup> Kpa a Aronin sãa yānu pota a nu Eleasaa sebusia. Domi miya Aroni u koo gbi.

<sup>27</sup> Ma Mɔwisi u kua ye Yinni Gusunɔ u nùn sɔɔwa. Wi ka Aroni ka Eleasaa ba yɔɔwa guu ten wɔllɔ Isireliba kpuron nɔni biru. <sup>28</sup> Ye ba tura mi, u Aronin sãa yāni pota u nu Eleasaa sebusia. Yen biru, Aroni u kpuna u gu guu ten mi. Ma Mɔwisi ka Eleasaa ba sarama. <sup>29</sup> Ye Isireliba ba wa ma Aroni u guwa, yera be kpuro ba win gɔɔ swĩ sɔɔ tēna.

### *Isireliba ba Kananiba tabu di*

## 21

<sup>1</sup> Aradin sunɔ Kananigii wi u wāa sōo yēsan nōm dwaru gia u tua ma Isireliba ba wee ka Atarimun swaa. Yera u da u bu tabu wōri, ma u ben gabu yoru mwēera. <sup>2</sup> Yera Isireliba ba Yinni Gusunɔ nōo mwēe teni kua ba nēe, Yinni Gusunɔ, à n sun tōn beni nōmu bēria, sa ko ben wusu kpeerasiawa mam mam.

<sup>3</sup> Ma u Isireliban gari yi wura u bu Kanani be nōmu bēria. Ma ba Kanani be, ka ben wusu kpeerasia. Yera ba yam mi yīsiru kā Hōoma. Yen tubusiana bansu.

### *Wēe dēegii*

<sup>4</sup> Yenibān biru, Isireliba ba seewa Horin guurun di ma ba kpa ka nim wōku ge ba mō Naa yarin swaaø kpa bu ka Edəmun tem bēwa. Adama ba temanabu kpana swaaø. <sup>5</sup> Ma ba Yinni Gusunɔ ka Mōwisi wōkisim wōri ba mō, mban sōna i sun yarama Egibitin di. Su ka gbi gbaburō? Domi dīanu ka nim sari mini. Manna ye wee, ya sun tusa. Dīa kamwa.

<sup>6</sup> Yera Yinni Gusunɔ u bu wēe dēegii sure ma ben dabira gu. <sup>7</sup> Yera be ba tie ba na ba Mōwisi sōwā ba nēe, wee sa tora sa wuné ka Gusunɔ wōkisi. Tē, a Gusunɔ kānɔ u sun wēe yi gira yi tonda.

Ma Mōwisi u kanaru kua tōn ben sō. <sup>8</sup> Yera Yinni Gusunɔ u nūn sōwā u nēe, a waan weenasia koowo kpa a ye bwē dēkan wōlō. Wi waa ya dōma ma u waan weenasia ye mēera, uñ maa gbimō.

<sup>9</sup> Ma Mōwisi u waa sii gandugia ye kua u ye bwē dēkan wōlō. Wi waa ya dōma kpuro ma u waa sii gandugia ye mēera, u ku ra maa gbi.

### *Isireliba*

*ba tura Pisigan guurɔ*

<sup>10</sup> Yeniban biru, Isireliba ba swaa wɔri ma ba da ba ben sansani gira Obətuə. <sup>11</sup> Saa Obətun di, ba maa seewa ba da ba ben sansani gira Iye Abarimun gbaburɔ, Məabun deedeeru, sɔɔ yari yeru gia. <sup>12</sup> Saa min di, ba maa seewa ba da ba ben sansani gira Serədin wəwəə. <sup>13</sup> Saa Serədin di, ba maa da ba ben sansani gira Aanəən daarun guru gio, tèn nim mu kokumə Amoreban tem di mu dɔɔ gbaburu gia. Domi Aanəə ya sāawa Məabu ka Amoreban tem nɔɔ bura yeru. <sup>14</sup> Yen sɔnə Yinni Gusunən tabun tireru sɔɔ ba Fahəbun gari mò ye ya wāa Sufan temə ka yen daa tori ka Aanəə <sup>15</sup> ka yen daa tori yi yi wāa Arin bera ma yi da yi girari Məabun tem nɔɔ bura yero. <sup>16</sup> Saa min di, ba da Beriə. Beri miya Yinni Gusunə u Məwisi sɔɔwa u nεε, a tən be mənnə kpa n bu nim wɛ.

<sup>17</sup> Yera Isireliba ba womu geni kua ba nεε, nim, a yarima dəkən di kpa su taki ko.

<sup>18</sup> Sinamba ba dəkə ye gba.

Damgiba ba ye gba ka ben sina dəki.

Yen biruwa Isireliba ba seewa gbabu ten min di ba da Matanaə. <sup>19</sup> Saa Matanan di, ba da Nahalieliə. Saa Nahalielin di, ba da Bamətuə. <sup>20</sup> Saa Bamotun di, ba maa da wəwa gaan mi, Məabun temə, guu te ba mò Pisigan wɔllɔ gbaburun deedeeru.

*Isireliba*

*ba Sihoni ka Ogu kamia*

<sup>21</sup> Isireliba ba Sihoni Amoreban sina boko səməbu gəria ba nεε, <sup>22</sup> a de su wunən tem bukiana. Sañ kpeeyə ka beeñ gbea gia, sañ beeñ resem gbaanu duə, sañ maa beeñ dəkəban nim nərumə. Swaa baka

sa ko mwa, sañ gam geramø sere su ka bœn tem yari.

<sup>23</sup> Adama Sihoni u yina Isireliba bu kpe saa win tem di. Yera u win tabu kowobu mœnna ba da ba Isireliba wœri Yahasiø gbaburo. <sup>24</sup> Ma Isireliba ba bu go go ba ben tem mwa saa daa te ba mœ Aanœœn di n ka da daa te ba mœ Yabœkuø, sere n ka girari Amœniban tem nœœ bura yero. N deema Amœni be, ba ben tem nœœ bura yero tem kœsobu yii. <sup>25</sup> Ma Isireliba ba Amœreban wusu kpuro mwœera ba sina mi ka Hœsiboniø ka gen baru kpaano. <sup>26</sup> Hœsiboni ye, ya sœawa Sihonin tiin wuu. Sihoni wi, u raa ka Mœabuba tabu kua ma u bu tabu di sere u Mœabuban tem mwa u ka na sere daa te ba mœ Aanœœwœ. <sup>27</sup> Yen sœna wom kowobu ba ra mœndu ko bu nee, i na i Hœsiboni bani.

I na i Sihonin wuu bani i gu gbœrœru toosi.

<sup>28</sup> Domi dœø u yara Hœsibonin di.

Dœø yara ya yara Sihonin wuun di.

Ma u wuu ge ba mœ Ari Mœabu di  
ka bœu ni nu wœœ Aanœœn gungunu wœllœ.

<sup>29</sup> Mœabu, a kam kuawa!

Bœœ be i maa bœu wi ba mœ Kemœsi sœamœ, i kœœrœwa!  
Domi u dera Amœreban sina boko Sihoni u tœn  
durœbu ka tœn kurœbu yoru mwœera.

<sup>30</sup> Adama sa Amœrebœœ sœenu twee.

Ma Hœsiboni ya wœrukœ.

Ma tem me kpuro mu kam kua

sere Diboniø n ka girari Nœfaø, ka Mœdebaœ.

Sa ye kpuro kam koosiawœ mam mam.

<sup>31</sup> Nge meya Isireliba ba ka sina Amœreban tem soœ.

<sup>32</sup> Ma Mœwisi u gœra bu da bu Yaseœen saria mœeri.  
Yen biru ba ye mwa ka yen baru kpaœnu ma ba

Amore be ba waa mi gira. <sup>33</sup> Yen biru ba swaa kosa ba da Basani gia. Yera Ogu Basanin suno u seewa ka win tabu kowobu u bu tabu wərim da Edεε. <sup>34</sup> Yera Yinni Gusun o u Məwisi səəwa u nee, a ku win bərum ko, domi kon nun nùn nəmu səndia, wi ka win təmbu ka ben tem kpuro, kpa a bu kua nge mε a Sihoni, Amoreban suno kua wi u waa Hesiboni.

<sup>35</sup> Ma Isireliba ba bu go, wi ka win bibu ka sere win təmbu. Baa tən turo, ban deri. Ma ba win tem mwa.

## **ISIRELIBA BA WĀA MƏABUBAN TEM BƏKÜC**

*Balamun gari*

### 22

<sup>1</sup> Yen biru, Isireliba ba da ba ben sansani gira Məabun wəwəo, Yuudenin bəkuo, səə yari yeru gia, Yerikon deedeeru.

<sup>2</sup> Balaki, Siporin bii u wa ye Isireliba ba Amoreba kua. <sup>3</sup> Yera Məabuba ba nanda Isireliban dabirun sə. <sup>4</sup> Ma ba Medianiban guro gurobu səəwa ba nee, tən dari teni, ta koo sun wəri tu di nge mε nee yi ra yakasu di. Saa ye səə, Balakiwa u sāa Məabuban suno.

<sup>5</sup> Yera u səməbu gəra Balamu Beorin biin mi, Petori o ye ya waa Efaratin daaɾo win təmbun temo, u nùn səəwa u nee, wee, bweseru gara yarima saa Egibitin di ma ta handunia kpuro pusi. Ta maa man turuku kooma. <sup>6</sup> Yen sə, na nun kanamə a na a man tən be bərusi. Domi ba man dam kere. A n kua mε, sərəkudo kon kpī n bu kamia n gira nen tem di. Domi na yε ma wi a domaru kua u ra domaru wa. Wi a maa bərusi, u ra bəri wa. <sup>7</sup> Ma Məabuba ka Medianiban guro guro be, ba da Balamu səro win

mi, ba kĕnu neni. Ye ba tura mi, yera ba nùn Balakin gari yi sôowa. <sup>8</sup> Balamu u bu sôowa u nee, i kpuno mini wôku te, sisiru kpa n bee sô ye Yinni Gusunô u man sôowa.

Ma M  abun guro guro be, ba sina mi. <sup>9</sup> Yera Yinni Gusunô u Balamu bikia u nee, t  n ber   ba w  aa wunen mi.

<sup>10</sup> Balamu u Gusunô wis   u nee, Balaki Siporin bii, M  abuban sina bokowa u t  n be g  rima bu man s   bu nee, <sup>11</sup> wee, bweseru gara yarima Egibitin di ma ta handunia pusi. Yen s  , n be na n t  n be b  rusi. S  r  kudo u koo kp   u t  n be w  ri u kamia u gira win tem di.

<sup>12</sup> Gusunô u Balamu sôowa u nee, a ku da. A ku t  n be b  rusi domi na bu domaru kua.

<sup>13</sup> Ma Balamu u seewa buru buru u Balakin s  m   be sôowa u nee, i wuro bee  n tem  , domi Yinni Gusunô u yina n ka bee da.

<sup>14</sup> Ma t  n be, ba seewa ba g  sira Balakin mi. Ma ba nùn sôowa ma Balamu u yina u na. <sup>15</sup> Yera Balaki u maa wirugibu gabu soka u g  ra be ba g  biikobu dabiru ka bee  re kere. <sup>16</sup> Ba seewa ba da Balamun mi. Ye ba tura mi, yera ba nùn sôowa ba nee, am  niwa besen sina boko Balaki, Siporin bii u gerua. U nee, u nun kanam  wa a ku yina a na. <sup>17</sup> Domi u koo be nun bee  re baka w  . U koo ko kpuro ye a nùn bikia. A gesi na a nùn t  n be b  rusia.

<sup>18</sup> Yera Balamu u t  n be wis   u nee, b  a Balaki    n man win diru k   te ta wura ka sii geesu yiba na   kp   n g  anu ko. Domi na   kp   n Yinni Gusun  n gere yina. <sup>19</sup> Ka me, i kpuno wôku te, kpa n bee s   ye u man sôowa.

<sup>20</sup> Ma Yinni Gusunô u Balamu kure wôku te, u nùn sôowa u nee, t   y  n s   t  n be, ba na bu nun soku,

a seewo a ka bu da. Adama kaa kowa ye na nun sɔɔWa.

<sup>21</sup> Balamu u seewa buru buru, u win keteku niu gaari bokua ma u ka Mɔabuban guro guro be da.

### *Balamu ka win keteku*

<sup>22</sup> Ye Balamu u swaa wɔri u win keteku sɔni ma win sɔm kowobu yiru ba nùn swii, yera Yinni Gusunɔ u ka nùn mɔru kua ma u nùn win gɔrardo gɔria u bunana swaa. <sup>23</sup> Ye keteku ge, ga gɔrardo wi wa u yɔ swaa suunuɔ u win takobi womε, yera ga gera ga da yakasɔ. Ma Balamu u gu so, u ka gu swaa sure. <sup>24</sup> Ma gɔrardo wi, u da u yɔra swaa kisa gaa sɔɔ, resem gbaanu yirun ganin baa sɔɔ. <sup>25</sup> Yera keteku ge, ga maa Yinni Gusunɔn gɔrardo wi wa ma ga da ga mani gani yin tia. Ma ga Balamun naasu ka gana ye baari. Ma u gu so kpam. <sup>26</sup> Yera gɔrardo wi, u swenya u da wuswaa, mi bañ kpɛ bu maa gera gam. <sup>27</sup> Yera keteku ge, ga maa gɔrardo wi wa ma ga wɔruma. Saa yera Balamu u maa gu soberu wɔri ka mɔru. <sup>28</sup> Yera Yinni Gusunɔ u dera keteku ge, ga nɔɔ wukia ga gari gerua ga nee, Balamu, mba na nun kua a ka man so me sere nɔn ita.

<sup>29</sup> Ma u keteku ge wisa u nee, a man yaakoru mɔwa. Nà n daa mam takobi neni, na n nun go kɔ.

<sup>30</sup> Ma keteku ge, ga nùn wisa ga nee, na sāawa wunen keteku, a ra man sɔni baadomma sere n ka gisɔ girari. Nge meya na ra nun kue?

Ma Balamu u wisa u nee, aawo, n ñ me.

<sup>31</sup> Saa yera Yinni Gusunɔ u Balamun nɔni wukia ma u Gusunɔn gɔrardo wi wa u yɔ swaa suunu sɔɔ u win takobi womε. Yera u yiira u wuswaa tem girari. <sup>32</sup> Ma gɔrardo wi, u nùn bikia u nee, mban sɔna a ka wunen keteku so me, sere nɔn ita. Na

nawa n ka nun yɔrasi. Domi karin swaa a swi mi.  
 33 Keteku ge, ga man wa ma ga gera sere nən ita. Gà kun daa gere mε, kon daa nun gowa kpa n gen tii deri.

<sup>34</sup> Ma Balamu u gørado wi sɔ̄wa u nee, wee na tora. Nañ yē ma a wāa swaaç. Tē, nen sanum mε, mù kun ka nun naawε, kon gɔ̄sira n wura nen yenuo.

<sup>35</sup> Ma gørado wi, u nee, aawo. A ka tən be doo. Adama gari yi kon nun sɔ̄, yiya kaa gere.

Ma Balamu u ka Balakin tən be da.

### *Balamu ka Balaki ba yinna*

36 Sanam mε Balaki u nua ma Balamu u wee, yera u nùn sennø da sere Mɔabuban wuuø ben tem nɔø buru yero Aanɔøn daaro. <sup>37</sup> Ma Balaki u nùn sɔ̄wa u nee, mban sɔ̄na añ ne sanam mε na gbia na nun sɔmøbu goria. A tamaa nañ kpẽ n nun gāanu kẽ?

<sup>38</sup> Ma Balamu u Balaki wisá u nee, geema, wee, na na wunen mi tē, adama nañ gεe mə n nun sɔ̄. Yinni Gusunøwa u koo man sɔ̄ ye kon nun sɔ̄.

<sup>39</sup> Ma Balamu ka Balaki ba swaa wɔrima ba tunuma Kiriati Husøtu. <sup>40</sup> Yera Balaki u keteba ka yāanu go u ka yākuru kua.

### *Balamu u Isireliba*

#### *domaru kua*

41 Yen sisiru bururu, Balaki u Balamu sua ba yɔøwa Bamøtu Baaliø. Min diya ba Isireliban sukum waamø.

## 23

<sup>1</sup> Ma Balamu u Balaki sɔ̄wa u nee, u nùn yāku yenu nɔøba yiru kuo. Yen biru, kpa u kete nɔøba yiru ka yāa kinenu nɔøba yiru kasu. <sup>2</sup> Ma Balaki u kua ye Balamu u nùn sɔ̄wa. Ma wi ka Balamu

ba kete yen tia ka yaa kinε teeru go yaku yee nin baateren wollo. <sup>3</sup> Yera Balamu u Balaki səwa u neε, a yero yaku dəo mwaarugii nin bəkuə kpa ne n desira n da gam gum. Sərəkudo Yinni Gusunə u koo man kure mi, kpa u man sə ye kon nun sə.

Ma Balamu u da gunguru garun wəllə. <sup>4</sup> Yera Yinni Gusunə u nùn kure ma Balamu u gerua u neε, wee na yaku yenu nəba yiru kua ma na kete ka yāaru go yaku yee nin baateren wollo.

<sup>5</sup> Saa yera Yinni Gusunə u nùn səwa ye u koo Balaki sə, ma u neε, u gəsiro u wura Balakin mi.

<sup>6</sup> Ma Balamu u wura u da u Balaki deema mi u win yaku ni mò ka Məabuban wirugibu gabu. <sup>7</sup> Saa yera Balamu u gari gerua u neε,

wee Balaki Məabun sunə u dera na na saa Aramundi.

Wiya u dera na sarama saa sə yari yerun guunundi.

U neε, n be na n Yakəbun bweseru bərusi.

N be na n ka be Isireliba məru ko.

<sup>8</sup> Adama kon tənu bərusi wi Gusunə kun bərusi?

Aməna kon ka tənu məru ko wi Gusunə kun ka məru mò.

<sup>9</sup> Na Isireliba waamə guunu wollo ka gungunu wollo ba wāa nənəm bañ ka bweseru garu weene.

<sup>10</sup> Goo kun kpə u bu gari.

Ba dabi nge yani seeri mini.

Wara u koo kpə u ben bənu nnən sube teeru gari.

Na kanaməwa n gbi nge Isireli be, be ba sāa gemgibu.

Na kīwa nən wāarun wii goberu ta n sāa nge begiru.

<sup>11</sup> Yera Balaki u Balamu bikia u neε, mba a man kuammə mesum. Na nun sokusiawa a ka nən yibereba bərusi. Adama wee domara a bu kuammə.

**12** Ma Balamu u nùn wisà u nèe, ye Yinni Gusunø u man sɔ̄wa, n ñ yera kon gere?

*Balamu u Isireliba*

*domaru kua nɔ̄n mɛeruse*

**13** Balaki u maa Balamu sɔ̄wa u nèe, a man swiima su da gam gia. Min di kaa ben sukum wa n ñ be kpuro. Be a wa mi, kpa a bu bɔrusi.

**14** Ma u ka nùn da sansanin kɔ̄su yeru garun mi, Pisigan guuru wɔllɔ. Miya u maa yāku yenu nɔ̄eba yiru kua. Ma u naa kin eru ka yāa kin eru go yāku yee nin baateren wɔllɔ. **15** Ma Balamu u Balaki sɔ̄wa u nèe, a yɔ̄ro mi a yāku dɔ̄o mwaararuginu mò mini, kpa n da n nɔ̄ ye Yinni Gusunø u koo man sɔ̄.

**16** Yera Yinni Gusunø u na u ka Balamu yinna. Ma u nùn sɔ̄wa ye u koo Balaki sɔ̄. Ma u nèe, u wuro Balaki win mi. **17** Ma u wura u da Balakin mi u deema u wāa win yākunun bɔkuɔ, wi ka Mɔabuban wirugibu. Saa yera u Balamu bikia u nèe, mba Yinni Gusunø u nun sɔ̄wa.

**18** Ma Balamu u nèe,  
Balaki, a seewo a swaa daki.

Wunè Siporin bii, a swaa tem kpīiyɔ a nɔ̄.

**19** Gusunø kun sāa nge tənu u sere weesu ko.

Un sāa nge tənu u sere kobia ye u raa gerua.

Ye u gerua, yera u ra ko.

Yèn himba u maa yi, ya ra koorewa.

**20** Wee Gusunø u man wooda wẽ n Isireliba domaru kua.

Win tiiwa u bu tu kuq kɔ̄.

Yen sɔ̄, nañ kpẽ n tu yina.

**21** Un toraru garu wa Isireliba sɔ̄o.

U sāawa Gusunø ben Yinni, u maa wāa ka be.

U sāawa ben sina boko.

U maa nuku dobu mɔ ben sɔ.

<sup>22</sup> Wiya u bu yara Egibitin di.

U bu dam wẽ nge kete gbeekiru.

<sup>23</sup> Søroru tañ kpẽ tu Isireliba gãanu kua.

Dobo dobo yañ kpẽ yu bu nɔni wɔke.

Saa yà n tura ba koo bu sɔ bu neε,

bu meεrio ye Yinni Gusunɔ u kua.

<sup>24</sup> Ba sãawa nge gbee sunɔ ge ga ra yaa mwɛ gu tem kpa gu yen yem nɔ gu sere da gu kpuna.

<sup>25</sup> Ma Balaki u Balamu sɔ̄wa u neε, à kun kĩ a bu bɔrusi, a ku bu domaru kua.

<sup>26</sup> Yera Balamu u nùn wisa u neε, nañ daa nun sɔ̄wa na neε, kon kowa ye Yinni Gusunɔ u gerua?

### *Balamu u Isireliba*

#### *domaru kua nɔn itase*

<sup>27</sup> Balaki u maa Balamu sɔ̄wa u neε, ñ n men na, a na su da gam qia. Sørəkudo Yinni Gusunɔ u koo wura a Isireliba bɔrusi nen sɔ.

<sup>28</sup> Ma Balaki u ka Balamu da Peorin guuru wɔllɔ tèn min di ba gbaburu meεra. <sup>29</sup> Balamu u Balaki sɔ̄wa u neε, a man yāku yenu nɔɔba yiru kuo, kpa a ka man naa kinenu nɔɔba yiru ka yāa kinenu nɔɔba yiru naawa, <sup>30</sup> ma Balaki u kua ye Balamu u nùn sɔ̄wa mi. U naa kineru ka yāa kineru go yāku yee nin baateren wɔllɔ.

## 24

<sup>1</sup> Ye Balamu u wa ma Yinni Gusunɔ u yɔrariwa u Isireliba domaru kua, yera un̄ maa bikiaru kue Yinni Gusunɔn mi nge me u ra raa ko yellu. Adama u win wuswaa t̄iwa gbaburun bera qia. <sup>2</sup> Ye u nɔni seeya u wa Isireliba ba ben sansani gire bwese kera

ka bwese kera, yera Gusunən Hunde nùn yooowa.

<sup>3</sup> Ma u gari gerubu wəri u nee,  
ne, Balamu, Beorin bii, wee ye na gerumə.  
Na ra Yam wa.

<sup>4</sup> Na ra Gusunən nəo no.  
Wi, Dam kpurogii u ra de n kāsinu wa.  
Domi u ra man tii səosi nà n nùn sāamə.

<sup>5</sup> Bəe Isireliba Yakəbun bweseru, bəen kunu nu wā.  
<sup>6</sup> Nu tərie nge wəwa ma nu sāa nge gbaa te ta wāa  
daarun bəkuə.

Ma nu gire nge dāa ni ba mò seduru ni Yinni Gusunə  
u duura daarun bəkuə  
ka sere dāa kiki si ba mò cloesi.

<sup>7</sup> Ba nim mə mu yiba mu yarimə  
mu dāa gbaaru nim yēkamə.  
Isireliban sīna boko u koo Agagi tabu di  
kpa win bandu tu dam ko.

<sup>8</sup> Gusunəwa u bu yara Egibitin di  
ka win dam bakam nge kete gbeekiru.  
Wiya u ra de bu bwese tukunu kamia nəni kpaki  
teeru

kpa bu nu səenu twee bu nin kukunu kəsuku bu go.  
<sup>9</sup> Be wee ba kpunamə nge gbee sinansu.  
Wara u koo kpī u bu seeyə.

Bəe, Isireliba, wi u bəe domaru kua, u koo domaru  
Wa.

Wi u maa bəe bərusi, u koo bəri wa.

<sup>10</sup> Yera Balakin məru ya seewa sere u nəma  
yēkana. Ma u nee, Balamu, na nun sokawa a ka nən  
yibəreba bərusi. Adama wee a bu domaru kua nən  
ita. <sup>11</sup> Yen sə, a doonə minin di tə, a wura wunen  
yənuə. Na raa nee, kon nun gāanu kə, adama Yinni  
Gusunə kun wure a ye wa.

*Balamu u gerumə*

*ye ya koo koora*

<sup>12</sup> Ma Balamu u Balaki wisá u nεε, nañ daa wunen goro be sɔ̄wa na nεε, <sup>13</sup> baa à n man wunen diru kā, te ta wura ka sii geesu yiba nañ kpɛ̄ n gea ñ kun mε kōsa gere ma n kun mɔ̄ ye Yinni Gusunən u man sɔ̄wa? <sup>14</sup> Tẽ wee na gɔ̄sirɔ̄ nен tɔ̄mbun mi. Adama a na a nɔ̄ yè Isireliba ba koo wunen tɔ̄mbu kua sia.

<sup>15</sup> Ma u maa nεε,  
wee ye nε Balamu Beorin bii na gerumɔ̄,  
nε wi na ra Yam wa.

<sup>16</sup> Na ra Yinni Gusunən nɔ̄ nɔ̄.  
Na maa wi, Wərukoon himba yɛ̄.  
Na ra wi Dam kpurogiin kāsinu wa,  
domi u ra man tii sɔ̄si nà n nùn sāamɔ̄.

<sup>17</sup> Na wa ye ya sisi, adama n ñ mɔ̄ gisɔ̄.  
Na wa ye ya koo koora, adama n ñ tẽ.  
Wee kpera gaa yara Yakəbun bweserun di.  
Sina boko goo u yara Isireliban suunu sɔ̄on di,  
be, be ba sāa Yakəbun bweseru.  
Ma u ka win sina dëka Mɔ̄abuba soomɔ̄ baa saburosɔ̄.

Ma ya be ba tii suen bweserun winu kɔ̄sukumɔ̄.

<sup>18</sup> U maa Edəmu be ba sāa win yiberebən tem mwa mε ba mɔ̄ Seiri.

Ma Isireliba ba nasara sua.

<sup>19</sup> Sina boko wi, u win yibereba taare.

Ma u be ba raa tie go u kpeerasia mam mam.

*Isireliban yibereba*

*ba koo kam ko*

<sup>20</sup> Ye Balamu u Amalekiba wa, yera u nεε,  
Amalekibara ba dam bo dunia sɔ̄o.  
Adama ba koo bu kam koosia sɔ̄o teeru.

<sup>21</sup> Ye Balamu u maa Keniba wa, yera u nεε,

bεε Keniba, wee bεen wāa yera naane mo  
nge guno sokuru te ta yii kpee baa so.

**22** Adama Asirigibu ba koo bεε yoru mwεeri  
kpa bu bεen wāa yenu kɔsuku.

**23** Ma Balamu u maa nεε,  
Gusunø ù n goon gøøn saa yi, yēro u koo kpī u n wāa?  
**24** Goo nimkusu su koo na saa Kitimun di  
kpa yibereba bu Asirigibu ka Ebεen bweseru  
sekuru doke.

Adama yibere ben tii ba koo kam kowa.

**25** Yeniban biru, Balamu u gøsira u da win wuuø,  
ma Balaki u maa wura win yenuø.

### *Isireliba ba būu sāaru wəri*

## 25

**1** Saa ye Isireliba ba wāa Sitimuø, yera ba ka  
Møabuban wøndiaba sakararu torua. **2** Ma wøndia  
be, ba dera Isireli be, ba ben būu sāaru wəri, ba ka  
bu di, ba ka bu nøra. Ma ba ben būnu yiira ba sāwa.  
**3** Ba tii būu wi ba mò Baali Peorigii wε. Ma Yinni  
Gusunø u ka bu møru kua. **4** U Møwisi søøwa u nεε,  
a Isireliban wirugibu kpuro mènnø, kpa a de bu be  
ba taare mø go søø soø nen wuswaaø. Saa yera nen  
møru ya koo sure.

**5** Ma Møwisi u Isireliban wirugibu søøwa u  
nεε, ben baawure u meero win tømbu soø be ba  
Møabuban būu wi ba mò Baali Peorigii sāamø, kpa  
u bu go.

**6** Saa yè soø Isireliba ba wuri mò Yinni Gusunø  
kurun kønnøwø, saa yera ben turo u ka kurø  
Madiani goo na wigibun mi, Isireliba kpuron  
wuswaaø ka Møwisin wuswaaø. **7** Ye Fineesi,  
Eleasaan bii, Aronin debubu u wa me, yera u

seewa tən ben suunu səon di u yaasa sua. <sup>8</sup> Ma u Isireli wi swii sere win kurə ma u bu yaasa səkura ben bəsonə. Saa yera wahala ya yəra Isireliba səo. <sup>9</sup> Yen dəma te, təmbu nərəbun suba yənda nnewa (24.000) ba gu.

<sup>10</sup> Yinni Gusunə u maa Məwisi səowə u nəe, <sup>11</sup> wee yāku kowo Fineesi, Eleasaan bii, Aronin debubu, u nən məru sureisia ye u ka man sanna, Isireliban suunu səo. Yen səna nañ bu kpeerasie. <sup>12</sup> Yen sə, a nùn səowə a nəe, wee na ka nùn arukawani bəkumə ye ya sāa bəri yəndugia. <sup>13</sup> Arukawani ye, ya koo de wi ka win bibun bweseru ba n sāa yāku kowobu sere ka baadommaə. Domi u nə, Gusunə win Yinni sanna. Ma ya dera Isireliba ba ben torarun suuru wa.

<sup>14</sup> Isireli wi ba go ka kurə Madiani wi sannu, win yīsira Simiri, Salun bii. U sāawa Siməən bwese kera tian wirugii. <sup>15</sup> Kurə Madiani win yīsira maa Kosibi. Win tundon yīsira Suri. U sāawa Madianiban bwese kera tian wirugii.

<sup>16</sup> Yinni Gusunə u maa Məwisi səowə u nəe, <sup>17</sup> i Madianiba wərio, kpa i bu go. <sup>18</sup> Domi ba sāawa bəen yibereba be ba bəe torasia ben būu Baali Peorigiin sə ka Kosibi, ben wirugii turon bii wəndian sə, wi ba go sanam me wahala ya seewa Peorio.

### Ba Isireliba gara nən məeruse

## 26

<sup>1</sup> Wahala yen biru, Yinni Gusunə u Məwisi ka yāku kowo Eleasaa, Aronin bii səowə u nəe, <sup>2</sup> i Isireliban bii tən durəbu gario be ba wəə yəndu mə ka be ba kere mə, be ba koo gesi kpī bu tabu da. I ko i bu gariwa bwese kera ka bwese kera.

<sup>3</sup> Ma Məwisi ka Eleasaa ba ye Isireliba sāwa Maabun wəwəs, Yuudenin bəkuə, Yerikon dedeederu. <sup>4</sup> Ba nəe, bu gario ben be ba wəs yendu mə ka be ba kere mə, be ba koo kpī bu tabu ko nge mə Gusuno u raa bu yen wooda wē sanam mə ba yarima Egibitin di.

<sup>5</sup> Bèn min di Rubeni, Yakəbun bii gbiikoon bwese keri torua, bera Enəku, wìn min di Enəkuban bwese kera yara, ka Paalu, wìn min di Paaluban bwese kera yara, <sup>6</sup> ka Hesironi, wìn min di Hesironiban bwese kera yara, ka Kaami wìn min di Kaamiban bwese kera yara. <sup>7</sup> Be ba sāa Rubenin bwese keri, bera mi. Ben geera sāwa təmbu nərəbun suba weeruska ita ka təmbu nata ka wunəbu ka təmbu təna (43.730).

<sup>8</sup> Eliabu, Paalun bii, <sup>9</sup> wiya u Nemueli mara, ka Datani, ka Abiramu. Datani wi, ka Abiramu ba sāwa win gerunasibu. Beya ba Məwisi ka Aroni seesi, ma ba ka Koren bibun bweseru yōra sanam mə ba Yinni Gusuno seesi. <sup>10</sup> Ma tem mu nəə baara mu bu mwə ka Koren tii sannu. Ma dəo u gabu di. Ben geera sāa təmbu goobu, ka weeraakuru (250). Ma ya kua kirə be ba tien sə. <sup>11</sup> Adama Koren bibu ban dəma te gu.

<sup>12</sup> Bèn min di Simeon bwese keri torua bera, Nemueli, wìn min di Nemueliban bwese kera yara, ka Yamini, wìn min di Yaminiban bwesera yara, ka Yakini, wìn min di Yakiniban bwesera yara, <sup>13</sup> ka Seraki, wìn min di Serakiban bwesera yara, ka Səolu, wìn min di Səoluban bwesera yara. <sup>14</sup> Be ba sāa Simeon bwese keri, bera mi. Ben geera sāwa təmbu nərəbun suba yenda yiru ka təmbu goobu (22.200).

<sup>15</sup> Bèn min di Gadin bwese kéri torua, bera Sefoni, wìn min di Sefoniban bwese kéra yara, ka Hagi, wìn min di Hagiban bwese kéra yara, ka Suni, wìn min di Suniban bwesera yara, <sup>16</sup> ka Osini, wìn min di Osiniban bwesera yara, ka Eri, wìn min di Eriban bwesera yara. <sup>17</sup> Ka Arodi, wìn min di Arodiban bwesera yara, ka Areli, wìn min di Areliban bwesera yara. <sup>18</sup> Be ba sāa Gadin bwese kéri, bera mi. Ben geera sāawa təmbu nərəbun suba weeru ka neera wunəbu (40.500).

<sup>19-21</sup> Bèn min di Yudan bwese kéri torua, bera Sela, wìn min di Selaban bwese kéra yara, ka Peressi, wìn min di Peresiban bwesera yara, ka Seraki, wìn min di Serakiban bwesera yara. Bèn min di Peresin bwese kéri torua, bera Hesironi wìn min di Hesironiban bwese kéra yara, ka Hamulu wìn min di Hamuluban bwesera yara. Yudan bibu yiru Eri ka Onani ba gu Kananin temo. <sup>22</sup> Be ba sāa Yudan bwese kéri, bera mi. Ben geera sāawa təmbu nərəbun suba wata ka wəkura nəəbu ka tia ka neera wunəbu (76.500).

<sup>23</sup> Bèn min di Isakarin bwese kéri torua, bera Tola, wìn min di Tolaban bwesera yara, ka Pufa, wìn min di Pufaban bwesera yara, <sup>24</sup> ka Yasubu, wìn min di Yasububan bwesera yara, ka Simuroni, wìn min di Simuroniban bwesera yara. <sup>25</sup> Be ba sāa Isakarin bwese kéri, bera mi. Ben geera sāawa nərəbun suba wata ka nne ka gooba wunəbu (64.300).

<sup>26</sup> Bèn min di Sabulonin bwese kéri torua, bera Seredi, wìn min di Serediban bwese kéra yara, ka Heloni, wìn min di Heloniban bwesera yara, ka Yaleeli wìn min di Yaleeliban bwesera yara. <sup>27</sup> Be ba

sāa Sabulonin bwese kéri torua, bera mi. Ben geera sāawa təmbu nərəbun suba wata ka neera wunəbu (60.500).

<sup>28</sup> Yosefun bweseru sōora Manase ka Efaraimu ba wāa. <sup>29</sup> Manasen biwa Makiri, wìn min di Makiriban bwese kéra yara. Makiriwa u Galadi mara, wìn min di Galadiban bwese kéra yara. <sup>30</sup> Bèn min di Galadin bwese kéri torua, bera Yesee, wìn min di Yeseeban bwese kéra yara, ka Heleki wìn min di Helékiban bwese kéra yara. <sup>31</sup> Ka Asirieli wìn min di Asirieliban bwesera yara, ka Sikemu wìn min di Sikemuban bwesera yara, <sup>32</sup> ka Semida wìn min di Semidaban bwesera yara, ka Hefee, wìn min di Hefeeban bwesera yara. <sup>33</sup> Selofadi Hefeeen bii, uñ bii tən durəbu mara ma n kun mə tən kurəbu təna. Beya, Mala ka Nəa, ka Hogula, ka Milika, ka Tirisa. <sup>34</sup> Be ba sāa Manasen bwese kéri, bera mi. Ben geera sāawa təmbu nərəbun suba weeraakuru ka yiru ka təmbu nata ka wunəbu (52.700).

<sup>35</sup> Bèn min di Efaraimun bwese kéri torua, bera Sutelaki, wìn min di Sutelakiban bwese kéra yara, ka Bekee wìn min di Bekeeban bwesera yara, ka Takani wìn min di Takaniban bwesera yara. <sup>36</sup> Sutelakin biiwa Erani wìn min di Eraniban bwese kéra yara. <sup>37</sup> Be ba sāa Efaraimun bwese kéri, bera mi. Ben geera sāawa təmbu nərəbun suba təna ka yiru ka təmbu neera wunəbu (32.500). Be kpuro ba sāawa Yosefun bibu.

<sup>38</sup> Bèn min di Benyamēen bwese kéri torua, bera Bela, wìn min di Belaban bwesera yara, ka Asibeli wìn min di Asibeliban bwesera yara, ka Akiramū wìn min di Akiramuban bwesera yara, <sup>39</sup> ka Sufamu wìn min di Sufamuban bwesera yara,

ka Hufamu wìn min di Hufamuban bwesera yara.  
**40** Belan biba Aadi ka Namani. Aadin min diya Aadiban bwese kéra yara. Namanin min diya maa Namaniban bwese kéra yara. **41** Be ba sää Benyameen bwese kéri, bera mi. Ben geera sääwa təmbu nərəbun suba weerus ka nəəbu ka təmbu nata (45.600).

**42** Bèn min di Danun bwese kéra torua, bera Sukamu, wìn min di Sukamuban bwese kéra yara.  
**43** Ben geera sääwa təmbu nərəbun suba wata ka nne ka təmbu nəeru (64.400).

**44** Bèn min di maa Aseen bwese kéri torua, bera Yimina, wìn min di Yiminaban bwesera yara, ka Yisifi wìn min di Yisifiban bwesera yara, ka Beria wìn min di Beriaban bwesera yara. **45** Berian bweseru səəra Hebeε u wāa, wìn min di Hebeεban bwesera yara, ka Maakieli wìn min di Maakieliban bwesera yara. **46** Aseε u bii tən kurə mə wi ba sokumə Seraki. **47** Be ba sää Aseen bwese kéri, bera mi. Ben geera sääwa təmbu nərəbun suba weeraakuru ka ita ka təmbu nəeru (53.400).

**48** Be ba Nefitalin bwese kéri torua, bera Yasieli, wìn min di Yasieliban bwesera yara, ka Guni wìn min di Guniban bwesera yara. **49** Ka Yesεε wìn min di Yesεεban bwesera yara, ka Silemu wìn min di Silemuban bwesera yara. **50** Be ba sää Nefitalin bwese kéri, bera mi. Ben geera sääwa təmbu nərəbun suba weerus ka nəəbu ka təmbu nəeru (45.400).

**51** Isireli be ba gara mi, be kpuron geera kuawa təmbu nərəbun suba nata ka tia ka təmbu nata ka wunəbu ka təna (601.730).

*Nge me ba koo tem me*

*bənu koosina*

<sup>52</sup> Yinni Gusunə u Məwisi səjwa u nee. <sup>53</sup> A bwese kəri yi tem mə bənu kuo nge mə yin geera ne. <sup>54</sup> Bwese kəra yèn təmba dabiru bo, a ye tem wəeyə mu n kpā. Bwese kəra yèn təmba kun maa dabi kpā a ye tem wə fiiko. A yen baayere tem wəeyə nge mə yen təmba geeru ne. <sup>55</sup> Adama kaa bu tem mə bənu kuawa ka təte a bu wə bwese kəra kə bwese kəra. <sup>56</sup> Ba koo tem mə bənu kowa ka təte bu ka bwese kəra baayere wə nge mə yen təmba geeru ne.

*Ba Lefiban bweseru gara**nən məeruse*

<sup>57</sup> Lefin bweseru səo, be ba gara, bera Geesəni wìn min di Geesəniban bwese kəra yara, ka Kehati wìn min di Kehatiban bwesera yara, ka Mərari wìn min di Mərariban bwesera yara. <sup>58</sup> Be ba səa Lefin bwese kəri, bera Libinan yənugibu, ka Heboronin yənugibu ka Makirin yənugibu, ka Musin yənugibu, ka Koren yənugibu, Kehatiwa u Amuramu mara. <sup>59</sup> Amuramun kurən yisira Yokebedi. U səawa Lefin bii wi u mara Egibiti. Bii be u Amuramu marua, bera Aroni, ka Məwisi, ka Mariamu ben sesu. <sup>60</sup> Bii be Aroni u mara, bera Nadabu, ka Abihu, ka Eleasaa, ka Itamaa. <sup>61</sup> Adama Nadabu ka Abihu ba guwa sanam mə ba ka dəo tuko dua Yinni Gusunən səa yero bu ka yākuru ko. <sup>62</sup> Tən durə be ba suru tia tia mə ba gara ka be ba mə kere, ben geera kuawa təmbu nərəbun suba yenda ita (23.000). Bañ bu gara sanam mə ba Isireliba garimo domi bañ ka bu tem bənu mə.

*Gari gari yen wii goberu*

<sup>63</sup> Isireli be Məwisi ka yāku kowo Eleasaa ba gara Məabun wəwəa, Yuudenin bəkuə, Yerikon

deedeeru, bera mi. <sup>64</sup> Isireli be kpuro səə, goo sari mi, wi Məwisi ka yāku kowo Aroni ba raa gara Sinain gbaburə, <sup>65</sup> ma n kun mə Kalebu, Yefunen bii ka Yosue, Nunin bii. Domi nge meyə Yinni Gusunə u raa bu səəWa.

*Tubi ye tən kurəba ko n mə*

## 27

<sup>1</sup> Selofadi, wi u sāa Hefee ka Galadi ka Makiri ka Manasen sikadobu Yosefun bweseru səə, u bii tən kurəbu nəəbu mara. Bera Mala ka Nəa ka Hogula ka Milika ka Tirisa <sup>2</sup> ma be, ba na Məwisi ka yāku kowo Eleasaan mi, ka wirugibun mi ka sere Isireliba kpuron mi Yinni Gusunən sāa yerun kənnəwə ba nəe, <sup>3</sup> besen tundo u guwa gbaburə. Un̄ wāa Koren bibun wuuru səə be ba Yinni Gusunə seesi. U guwa win tii tiin toranun sə. Adamə un̄ bii tən durə mə. <sup>4</sup> N weene bu win bwese kəra deri yēn sə un̄ bii tən durə mə? I sun tem wēeyə besen tndon maabu ka wənəbun suunu səə.

<sup>5</sup> Ma Məwisi u Yinni Gusunə kana ben gari yin sə. <sup>6</sup> Ma Yinni Gusunə u nùn wisə u nəe. <sup>7</sup> Selofadin bii be, ba gem mə. A bu tem wēeyə mə ben tundo u ko n daa mə. Kaa bu mu wēwə ben tndon maabu ka wənəbun suunu səə. <sup>8</sup> Yen biru, kpa a Isireliba sə a nəe, goo ù n gu ma un̄ bii tən durə mə, win bii tən kurəwə u koo win arumani sua u tubi di. <sup>9</sup> U kun maa bii tən kurə mə, win maabu ka wənəba ba koo win arumani sua bu tubi di. <sup>10</sup> U kun maa maabu ka wənəbu mə, win tndon maabu ka wənəba ba koo win arumani sua bu tubi di. <sup>11</sup> Win tundo ù kun maa maabu ka wənəbu mə, win mero bisi wi u fēe fēe bo wiya u koo win arumani tubi di. Yeni ya ko n

sāawā wooda Isireliba sāo nge mē ne, Yinni Gusunə na ye Mōwisi wē.

*Yinni Gusunə u Yosue gəsa*

*u ka ko Mōwisin kəsire*

<sup>12</sup> Yinni Gusunə u Mōwisi sāawā u nee, a yāawo Abarimun guu tenin wii kpiirə, kpa a nəni seeya a tem mē meeri mē kon Isireliba wē. <sup>13</sup> Yen biru, kpa a kpuna a gbi nge mē wunen mōo Aroni u gu. <sup>14</sup> Domi iñ woodaba mēm nōawē Sinin gbaburə, sanam mē Isireliba ba man seesi. Iñ maa man beeरe wē ben wuswaaqə sanam mē ba nim kanamə. Yera n dera na Meribān nim mē soka Sannən nim Kadesiə, Sinin gbaburə.

<sup>15</sup> Ma Mōwisi u Yinni Gusunə sāawā u nee, <sup>16-17</sup> Yinni Gusunə, wunə wi a taka koora kpuro hunde wē, a goo gəsio, a nūn ko wirugii wi u koo kpī u wunen təmbu kpara kpa ba kun ka sāa nge yāa ni nūn kparo mō.

<sup>18</sup> Ma Yinni Gusunə u Mōwisi wisə u nee, Yosue Nunin bii wee, wì səə nən Hunde u yiba. A nūn suo kpa a nūn nōma səndi. <sup>19</sup> Kaa ka nūn dawa yāku kowo Eleasaan wuswaaqə, kpa a nūn ko wunen kəsire Isireliba kpuron nəni biru. <sup>20</sup> A nūn wunen yiikon bənu wēyeə kpa Isireliba kpuro bu nūn mēm nōawā. <sup>21</sup> Yāku kowo Eleasaawā u ko n da wa kpa Eleasaa u man kana win sō ka woro te ba ra ko kā urimu. Win gariya Yosue ka Isireliba kpuro ba ko n da ka səmburu ko.

<sup>22</sup> Ma Mōwisi u kua ye Yinni Gusunə u nūn sōawā. U Yosue sua ma u ka nūn da yāku kowo Eleasaan wuswaaqə Isireliba kpuron nəni biru. <sup>23</sup> Ma u nūn nōma səndi u nūn kua win kəsire nge mē Yinni Gusunə u nūn sōawā.

*Tĕru baateren yăkurun  
wooda*

## 28

<sup>1</sup> Yinni Gusunø u Møwisi sõowá u nεε, <sup>2</sup> a Isireliba wooda yeni wεeyø.

A nεε, bu ku duari saa ye na yi ba n da ka man kēnu naawé kpa bu man yāku dō mwaararuginu kua ni nu koo man nuburu dore.

<sup>3</sup> A bu sõowá a nεε, tō baatere, yāa kpemminu yiru ni nu wōo tia tia mō kpa nu kun alebu gaa mō, niya ba koo ka man yāku dō mwaararugiru kua baadomma. <sup>4</sup> Ba koo ka teeru yākuru kowa bururu, teeru maa yoki kpaa, <sup>5</sup> ka som kilo ita mε ba burina ka olifin gum ditiri tia ka bənu. <sup>6</sup> Tō baateren yāku te, ta ko n sāawa nge yāku nubu durorugii te ba nε, Yinni Gusunø kua Sinain guuro. <sup>7</sup> Bururu ba ko n da ka tam newa ditiri tia ka bənu nen sāa yero bu ka yākuru ko ka yāa te sannu. <sup>8</sup> Yoka, kpa bu maa man yāku dō mwaararugiru kua ka yāa tee te ta tie ka som ka tam nge me ba raa kua bururu. Ta ko n sāawa yāku dō mwaararugiru te ta koo nε, Yinni Gusunø nuburu dore.

*Tō wērarugirun yākunun  
wooda*

<sup>9</sup> Tō wērarugiru sōo, yāanu yiru ni nu wōo tia tia mō ma nun alebu gaa mō, niya i ko i ka nε, Yinni Gusunø yākuru kua ka tam ka som kilo nəəba tia mε ba burina ka gum. <sup>10</sup> I ko i n da yāku te kowa tō wērarugiru sōo tō baateren yāku dō mwaararugii ni i ra ko baasi.

*Surun tō gbiikirun yākunun*

*wooda*

<sup>11</sup> Suru baawuren t   gbiikiru s  , i ko i n  , Yinni Gusun   y  ku d   mwaararuginu kuawa ka naa kp  mi yiru, ka y  a kin  ru, ka y  a kp  emminu n  eba yiru, ni nu w  o tia m  . Kpa sabe nin baatere ta kun alebu gaa m  . <sup>12</sup> I ko i ka ten baatere y  kuru kowa ka som me ba burina ka gum. <sup>13</sup> Y  a kp  emmii nin baatere maa ka som kilo ita me ba burina ka gum. Y  ku d   mwaararugii niya nu koo ne Yinni Gusun   nuburu dore. <sup>14</sup> I n ka k  te y  kuru m  , tam ditiri itawa i ko i ka ko. I n ka y  a kin  ru m  , tam ditiri yiruwa i ko i ka ko. I n maa ka y  a kp  embu m  , tam ditiri t   ka b  nuwa i ko i ka ko. Y  ku d   mwaararugii ni i ko i n da ko w  on suru baawuren t   gbiikiru s  , niya mi. <sup>15</sup> Yen biru, i ko i maa n  , Yinni Gusun   torarun y  kuru kua ka t   baateren y  ku d   mwaararugiru ka ten tam baasi.

*G  o sararibun y  kunun**wooda*

<sup>16</sup> W  on suru gbiikoon s   w  kura nnese s  ora i ko i G  o sararibun t   bakaru di, n  , Yinni Gusun  n s  . <sup>17</sup> Suru win s   w  kura n  ebuse s  ora i ko i t   bakaru tore te i ko i di s   n  eba yiru. T   ni s  , p     ye ba   seeyatia dokewa i ko i di. <sup>18</sup> T   bakat ten t   gbiikiru s  , i ko i be  n s  oma deriwa, kpa i menna i n  , Yinni Gusun   s  . <sup>19</sup> I ko i man y  ku d   mwaararugiru kuawa ka naa kp  mi yiru, ka y  a kin  ru, ka y  a kp  emminu n  eba yiru, ni nu w  o tia m  , kpa sabe nin baatere ta kun alebu gaa m  . <sup>20</sup> I ko i ka y  a saberu baatere y  kuru kowa ka som sannu me ba burina ka gum. I n y  kuru m   ka naa, som kilo n  eba nnewa i ko i ka ko. I n ka y  a kin  ru m  

som kilo nəəba tia i ko i ka ko. <sup>21</sup> I n maa ka yāa kpembu mò, som kilo itawa i ko i ka ko. <sup>22</sup> Yen biru, kpa i boo kineru go i ka torarun yākuru ko. <sup>23</sup> Yāku ni kpurowa i ko i n da ko tō baateren bururun yāku dō mwaararugii te baasi. <sup>24</sup> Sō nəəba yiru ye sō, i ko i ne, Yinni Gusunō yāku dō mwaararugiru kuawa baadomma te ta koo man nuburu dore tō baateren bururun yāku dō mwaararugii te baasi. <sup>25</sup> Yen sō nəəba yiruse, i ko i bēen sōma deriwa kpa i menna i man sā.

### *Gēebun saan yākunun wooda*

<sup>26</sup> Gēebun tō bakaru sō, i ko i ka ne, Yinni Gusunō bēen gbean dīa gbiikinu naawawa kpa i menna i man sā. In dōma te sōmburu garu mò. <sup>27</sup> I ko i man yāku dō mwaararuginu kuawa ni nu nuburu do ka naa kpemi yiru, ka yāa kineru, ka yāa kpemminu nəəba yiru ni nu wō tia mō. <sup>28</sup> I ko i ka yaa saberu baatere yākuru kowa ka som sannu mē ba burina ka gum. I n yākuru mò ka naa, som kilo nəəba nnewa i ko i ka ko. I n ka yāa kineru mò som kilo nəəba tia i ko i ka ko. <sup>29</sup> I n maa ka yāa kpembu mò som kilo itawa i ko i ka ko. <sup>30</sup> Yen biru, kpa i boo go i ka torarun yākuru ko, <sup>31</sup> yāku ni kpurowa i ko i n da ko tō baateren bururun yāku dō mwaararugii te baasi. Yaa sabe ni nuñ alebu gaa mōwa i ko i n da ka yākuru ko, ka tam sannu.

### *Yāku te ba koo*

*ka Yinni Gusunō takaru ko*

## 29

<sup>1</sup> Suru nəəba yirusen tō gbiikiru sō, i ku sōmburu garu ko. I ko i menna wa i Yinni Gusunō

takaru ko. I ko i t   te diwa i n k  bi soom  . <sup>2</sup> I ko Yinni Gusun   y  ku d  o mwaararuginu ku   ni nu koo n  n nuburu dore, ka k  te kp  ma, ka y  a kin  ru, ka y  a kin   kp  mminu w  o tia tiaginu n  eba yiru. Yaa sabe ni kpuro nu ko n s  awa ni nu   alebu gaa m  . <sup>3</sup> I ko i ka yaa sabe ten baatere y  kuru kowa ka som me ba burina ka gum. I n y  kuru m   ka k  te, som kilo n  eba nn  wa i ko i ka ko. I n m   ka y  a kin  ru, som kilo n  eba tia i ko i ka ko. <sup>4</sup> I n maa m   ka y  a kin   kp  mbu, som kilo itawa i ko i ka ko. <sup>5</sup> I ko i maa torarun y  kuru ko ka boo kin  ru. <sup>6</sup> Y  ku niniwa i ko i n da ko suru baawuren t  o g  likiruginu ka t  o baatereginu ka nin som ka tam baasi. I ko nu kowa nge me ba nin wooda yi. Nu ko n s  awa y  ku d  o mwaararuginu ni nu koo n  , Yinni Gusun   nuburu dore.

### *Durum w  kabun y  kurun*

#### *wooda*

<sup>7</sup> Suru n  eba yirusen s  o w  kuruse s  o, i ku s  mburu garu ko. I ko i mennawa i Yinni Gusun   s   k  pa i n  o b  ke. <sup>8</sup> I ko i Yinni Gusun   y  ku d  o mwaararuginu kuawa ni nu koo n  n nuburu dore, ka naa kp  ma, ka y  a kin   kp  mminu w  o tia tiaginu n  eba yiru. Yaa sabe ni kpuro nu ko n s  awa ni nu   alebu gaa m  . <sup>9</sup> I n y  kuru m  , i ko i nu kowa ka som me ba burina ka gum. I n y  kuru m   ka naa, som kilo n  eba nn  wa i ko i ka ko. I n m   ka y  a kin  ru som kilo n  eba tia i ko i ka ko. <sup>10</sup> I n maa m   ka y  a kin   kp  mbu, som kilo itawa i ko i ka ko. <sup>11</sup> Y  ku ninin biru, i ko i y  kuru ko ka boo kin  ru bu ka b  e   b  en durum w  ka, torarun y  kuru ka t  o baateregiru ka nin som ka tam baasi.

*Kunun t  o bakarun y  kunun*

*wooda*

**12** Suru n  ba yirusen s  o w  kura n  buse s  o, i b  en s  ma derio ye i ra ko, kpa i m  nna i ne, Yinni Gusun   s   kpa i man t  o bakaru diiya s  o n  ba yiru. **13** T  o baka ten t  o gbiikiru s  o, i ko i ne, Yinni Gusun   y  ku d  o mwaararuginu kuawa ni nu koo man nuburu dore. I ko i nu kowa ka naa kpemi w  kura ita ka y  a kinenu yiru, ka y  a kin   kpemminu w  kura nne ni nu w  o tia tia m  . Yaa sabe ni kpuro nu ko n s  awa ni nu   alebu gaa m  . **14** I ko i ka yaa sabe nin baaterere y  kuru kowa ka som m   ba burina ka gum. I n y  kuru m   ka naa, som kilo n  ba nn  wa i ko i ka ko. I n m   ka y  a kineru, som kilo n  ba tia i ko i ka ko. **15** I n m  a m   ka y  a kin   kpembu, som kilo itawa i ko i ka ko. **16** I ko i m  a y  kuru ko ka boo kineru bu ka bee b  en durum w  ka, t  o baateren y  ku d  o mwaararugii te i ra ko ka som ka tam sannu baasi.

**17-34** T  o baateren y  ku ni baasi, i ko i m  a y  kunu ko ka yaa sabe ni nu   alebu gaa m   ka m  a som m   ba burina ka gum, nge m   i ra ko saa t  o baka ten s  o yirusen di n ka girari ten s  o n  ba yiruse. Nge m  niwa i ko i y  ku ni koosina.

S  o yiruse s  o, i ko i y  kuru kowa ka ket   kin   kpennu w  kura yiru ka y  a kinenu yiru, ka y  a kin   kpemminu w  kura nne w  o tia tiaginu ka m  a boo kineru.

S  o itase s  o, i ko i y  kuru kowa ka ket   kin   kpennu w  kura tia ka y  a kinenu yiru, ka y  a kin   kpemminu w  kura nne, w  o tia tiaginu ka m  a boo kineru.

Sõõ nnese sõõ, i ko i yākuru kowa ka kete kinε kpennu wəkuru, ka yāa kinεnu yiru ka yāa kinε kpemminu wəkura nne, wõõ tia tiaginu, ka boo kinεru.

Sõõ nəəbuse sõõ, i ko i yākuru kowa ka kete kinε kpennu nəəba nne ka yāa kinεnu yiru, ka yāa kinε kpemminu wəkura nne, wõõ tia tiaginu, ka boo kinεru.

Sõõ nəəba tiase, i ko i yākuru kowa ka kete kinε kpennu nəəba ita ka yāa kinεnu yiru ka yāa kinε kpemminu wəkura nne, wõõ tia tiaginu, ka boo kinεru.

Sõõ nəəba yiruse sõõ, i ko i yākuru kowa ka kete kinε kpennu nəəba yiru, ka yāa kinεnu yiru, ka yāa kinε kpemminu wəkura nne, wõõ tia tiaginu, ka boo kinεru.

<sup>35</sup> Tõõ baka ten sõõ nəəba itase sõõ, i bεen səma derio ye i ra ko, kpa i menna i ka nε, Yinni Gusunə sā, <sup>36</sup> kpa i man yāku dõõ mwaararuginu kua ni nu koo man nuburu dore, ka kete kinεru, ka yāa kinεru ka yāa kinε kpemminu nəəba yiru wõõ tia tiaginu. Yaa sabe ni kpuro nu ko n sāawa ni nuñ alebu gaa mə. <sup>37</sup> I ko i yāku nin baaterere kowa ka som ka tam nge mε ba yen wooda yi. <sup>38</sup> Kpa i maa yākuru ko ka boo kinεru bu ka bεe bεen durum wəka, tõõ baateren yāku dõõ mwaararugiru ka ten som ka tam baasi.

<sup>39</sup> Yāku nini kpurowa i ko i nε, Yinni Gusunə kua tõõ baka te sõõ, ka sere maa yāku ni i ra ko baadomma. Niya yāku dõõ mwaararuginu ni i ra ko ka som ka tam, ka siarabun yākunu, ka kēnu, ka sere maa ni i ra ko nəə mwεerun sõ.

## 30

<sup>1</sup> Yeniwa Məwisi u Isireliba kpuro sə̄wa nge mə Yinni Gusunə u nùn yiire.

### *Wooda ye ba yi*

#### *nə̄o mwə̄enun sə̄*

<sup>2</sup> Məwisi u Isireliban bwese kerin wirugibu sə̄wa u nə̄e, wee wooda ye Yinni Gusunə u wə̄.

<sup>3</sup> U nə̄e, goo ù n nə̄o mwə̄eru kua ma u koo nùn kēru wə̄, n̄ kun mə ù n bōrua u nə̄e, u koo tii nə̄nə gāanu ganun sə̄, un̄ win gari yi kəbiamə. U koo win nə̄o mwə̄e te yibiawa.

<sup>4</sup> Bii wəndia ù n Yinni Gusunə nə̄o mwə̄eru kua, n̄ kun mə, ù n bōrua sanam mə u gina wāa win tundon nə̄ma sə̄, <sup>5</sup> ma tundo wi, un̄ nùn ye yinari sanam mə u yen gari nua, saa ye sə̄, wəndia wi, u koo win nə̄o mwə̄e te yibiawa. <sup>6</sup> Adama win tundo ù n nùn ye yinari sanam mə u yen gari nua, saa ye sə̄, wəndia wi, un̄ maa nə̄o mwə̄e te yibiamə. Yinni Gusunə u koo nùn yen suuru kua, domi win tundowa u nùn ye yinari.

<sup>7</sup> Wəndia goo ù n nə̄o mwə̄eru kua, n̄ kun mə ù n bōrua n deema un̄ bwisika saa ye u bōri yi mə, yen biru ma u durə sua, <sup>8</sup> ma win durə kun nùn ye yinari sanam mə u yen gari nua, u koo win nə̄o mwə̄e te yibiawa. <sup>9</sup> Adama win durə ù n ye yinā sanam mə u yen gari nua, un̄ maa nə̄o mwə̄e te yibiamə te u kua. Yinni Gusunə u koo maa nùn suuru kua.

<sup>10</sup> Tən kurə wīn durə gu, n̄ kun mə wi ka durə ba yinana, ù n nə̄o mwə̄eru kua, u koo tu yibiawa.

<sup>11</sup> Kurə məro goo ù n nə̄o mwə̄eru kua, n̄ kun mə ù n bōrua, <sup>12</sup> ma win durə kun nùn ye yinari sanam

mε u yen gari nua, kurɔ wi, u koo win nɔɔ mwεε te yibiawa. <sup>13</sup> Adama win durɔ ù n nùn ye yinari sanam mè sɔɔ u yen gari nua, kurɔ wi, un̄ maa nɔɔ mwεε te yibiamɔ. Yinni Gusunɔ u koo nùn suuru kua domi win durɔwa u nùn ye yinari. <sup>14</sup> Kurɔ mɔro ù n nɔɔ mwεeru kua, n̄ kun mε ù n bɔrua u nεε, u koo tii nene gāanu ganun sɔ, win durɔwa u koo de nɔɔ mwεε te, tu koora, n̄ kun mε tu wəruma. <sup>15</sup> Sanam mε durɔ wi, u gari yi nua, ù kun ye yinε, u yi wurawa. Kurɔ wi, u koo nɔɔ mwεε te yibiawa. <sup>16</sup> Adama durɔ wi, ù n dera n te u sere nùn ye yinari, durɔ wiya u koo yen taare wa.

<sup>17</sup> Wooda yeniwa Yinni Gusunɔ u Mɔwisi wɛ wɔndia ka win tundon sɔ, ka sere maa kurɔ mɔro ka win durɔn sɔ.

### *Isireliba ba Madianiba tabu di*

## 31

<sup>1</sup> Yinni Gusunɔ u Mɔwisi sɔɔwa u nεε, <sup>2</sup> a doo a Madianiba mɔru kɔisia kɔsa ye ba Isireliba kuan sɔ. Yen biruwa kon de a kpuna a gbi a wunen baababa deema.

<sup>3</sup> Ma Mɔwisi u tɔn be sɔɔwa u nεε, gabu bu ben tabu yānu sebuo bu da bu Madianiba wɔri kpa bu bu mɔru kɔisia nge mε Yinni Gusunɔ u gerua. <sup>4</sup> Yen sɔ, bwese kera baayere yu tabu kowobu nɔrɔbu (1.000) gɔsio.

<sup>5</sup> Ma Isireliban bwese kera baayere ya tɔmbu nɔrɔbu gɔsa. Ma ben geera kua tabu kowobu nɔrɔbun suba wɔkura yiru (12.000). <sup>6</sup> Ma Mɔwisi u tabu kowobu nɔrɔbun suba wɔkura yiru ye tabu gɔra. Ba dawa ka Fineesi, yāku kowo Eleasaan bii, u Yinni Gusunɔn kurun dendì yānu neni ka kɔbi

sannu. <sup>7</sup> Ma ba Madianiba tabu wəri nge mə Yinni Gusunə u raa Məwisi səəwa, ma ba ben tən durəbu kpuro go. <sup>8</sup> Ma ba ben sinambu nəəbu ye go. Bera, Efi ka Rekemu ka Suri ka Huri ka Reba. Ba maa Balamu Beorin bii go. <sup>9</sup> Adama ba ben kurəbu ka bibu yoru mwəera ma ba ben yaa sabenu ka ben arumaniba gura. <sup>10</sup> Ma ba ben wusu ka ben kpara yenu dəə meni. <sup>11</sup> Ma ba ka ye kpuro doona ye ba gura, təmbu ka yaa sabenu. <sup>12</sup> Ma ba ka ye kpuro na Məwisi ka yāku kowo Eleasaa ka Isireliba kpuron mi sansanio, Məabun wəwəa, Yuudenin bəkuə, Yerikon deedeeru.

<sup>13</sup> Yera Məwisi ka yāku kowo Eleasaa ka Isireliban wirugibu ba yara ben sansanin di ba bu sennə da. <sup>14</sup> Yera Məwisi u ka tabu sinambu məru kua, ka nərəm nərəm wirugibu, ka wunəm wunəm wirugibu, be ba taa bi da ba wee. <sup>15</sup> U nəε, mban səna i tən kurəbu deri iñ bu go. <sup>16</sup> I yē ma bera Balamu u borie ma ba dera Isireliba ba Yinni Gusunə torari Peorin gari səə, ma Yinni Gusunə u bu kəsi kəsi bararu sure. <sup>17</sup> Yen sə tə, i ben bii tən durəbu kpuro goowo ka tən kurə be ba durə yē. <sup>18</sup> Adama i tii wəndiaba yiyo be bañ durə yē. <sup>19</sup> Be ba maa tənu go, n̄ kun mə ba goru baba, ba koo yariwa sansanin di səə nəəba yiru, kpa bu tii deerasia be ka ben yobu, səə itase ka səə nəəba yiruse. <sup>20</sup> I ko i bəεn yānu deerasiawa ka gāanu kpuro ni ba kua ka yaa gəna, ka boo sansu, ka sere maa ni ba kua ka dāa.

<sup>21</sup> Ma yāku kowo Eleasaa u tabu kowo be ba tabu da mi səəwa u nəε, wee woodə ye Yinni Gusunə u Məwisi wē. U nəε, <sup>22</sup> wura ka sii geesu ka sii gandu ka sii wəkusu ka pεεrum, <sup>23</sup> sii si ba koo gesi kpī

bu dɔ̄o doke kpuro, i ko i su dɔ̄o dokewa kpa i su deerasia. Ye bañ maa kpẽ bu dɔ̄o doke i ko i ye wasiwa deerasiabun nim sɔ̄o. <sup>24</sup> I ko i bεen yānu teawa sɔ̄o nɔ̄oba yiruse kpa i deera. Yen biru i ko i kpī i wurama sansaniɔ̄.

### *Isireliba*

#### *ba arumani bɔ̄nu kua*

<sup>25</sup> Yinni Gusuno u Mɔ̄wisi sɔ̄owa u neε, <sup>26</sup> wune ka yāku kowo Eleasaa ka Isireliban yεnu yεrobu, i arumani ye gario ye Isireliba ba mwaama mi, tɔ̄mbu ka yaa sabenu. <sup>27</sup> I ko i ye bɔ̄nu kowa suba yiru ya n kpāaru ne, be ba tabu dagia ka be bañ tabu degia. <sup>28</sup> Be ba tabu dan bɔ̄nu sɔ̄o, wee ye i ko i wuna ne Yinni Gusunɔ̄n sɔ̄. Yera neεra wunɔ̄bu (500) baayeren wollo i tia wuna nen sɔ̄, tɔ̄mbu sɔ̄o ka keteba sɔ̄o, ka keteckunu sɔ̄o, ka yāanu ka bonu sɔ̄o. <sup>29</sup> Kpa a ye yāku kowo Eleasaa wε. <sup>30</sup> Be bañ maa tabu den bɔ̄nu sɔ̄o, weeraakuru baateren wollo, kaa tia tia wuna nen sɔ̄ tɔ̄mbu sɔ̄o ka keteba sɔ̄o ka keteckunu sɔ̄o ka yāanu sɔ̄o ka bonu sɔ̄o, ka sere yaa sabe ni nu tie sɔ̄o, kpa a ye Lefiba wε be ba sɔ̄mburu mɔ̄ nen sāa yero.

<sup>31</sup> Ma Mɔ̄wisi ka Eleasaa ba kua ye Yinni Gusuno u Mɔ̄wisi yiire. <sup>32</sup> Arumani ye ba gura kpuro, yen geeru wee. Yāanu ka bonun geera sāa nɔ̄rɔ̄bun suba nata ka wata ka wékura nɔ̄ebu (675.000). <sup>33</sup> Keteban geera sāa nɔ̄rɔ̄bun suba wata ka wékura yiru (72.000). <sup>34</sup> Keteckunun geera sāa nɔ̄rɔ̄bun suba wata ka tia (61.000). <sup>35</sup> Wəndiaban geera maa sāa nɔ̄rɔ̄bun suba tēna ka yiru, be bañ durɔ̄ yε (32.000). <sup>36</sup> Be ba tabu dan bɔ̄nu ya kua yāanu nɔ̄rɔ̄bun suba gooba wunɔ̄bu ka tēna ka nɔ̄oba yiru ka neεra

wunəbu (337.500). <sup>37</sup> Mi səə, ba nata ka wata ka wəkura nəəbu wuna Yinni Gusunən sə (675). <sup>38</sup> Ben kətəban geera sāa nərəbun suba tēna ka nəəba tia (36.000). Mi səə, ba wata ka wəkura yiru wuna Yinni Gusunə sə. <sup>39</sup> Ben kətəkunun geera sāa nərəbun suba tēna ka neera wunəbu (30.500). Mi səə, ba wata ka tia wuna Yinni Gusunən sə. <sup>40</sup> Tən be ba mwəeran geera maa sāa nərəbun suba wəkura nəəbu ka tia (16.000). Mi səə, ba tēna ka yiru wuna Yinni Gusunən sə. <sup>41</sup> Ma Məwisi u Gusunəgia kpuro yāku kowo Eleasaa wē nge mə Gusunə u nùn səəwa u ko. <sup>42-43</sup> Bənu ye ba Isireli be ba tie wē ya newa ka be ba tabu dagia. Ya sāawa nərəbun suba goobə wunəbu ka tēna ka nəəba yiru ka neera wunəbu (337.500), <sup>44</sup> ka kətəba nərəbun suba tēna ka nəəba tia (36.000) <sup>45</sup> ka kətəkunun nərəbun suba tēna ka neera wunəbu (30.500), <sup>46</sup> ka təmbu nərəbun suba wəkura nəəbu ka tia (16.000). <sup>47</sup> Bənu ye Məwisi u Isireli be wē səə, ye u wuna Yinni Gusunən sə, yera tia tia weeraakuru baateren wəllə, təmbu səə, ka yaa sabenu səə. Ma u ye kpuro Lefiba wē be ba səmburu mò sāa yero, nge mə Yinni Gusunə u nùn wooda wē.

### *Kee ni ba Yinni Gusunə wē*

<sup>48</sup> Tabu kowobu nərəm nərəm wirugibu ka wunəm wunəm wirugibu ba mennama ba na Məwisin mi. <sup>49</sup> Ma ba nùn səəwa ba nee, sa tabu kowobu gara be sa kpare. Baa tən turo un kare be səə. <sup>50</sup> Yen səna sa ka Yinni Gusunə takarun kēnu naawa ni ba kua ka wura. Niya sumi ka taaminu ka swaa tonkunu ka yəni. Kpa nu n sāa nge torərun yākuru.

<sup>51</sup> Ma Mɔwisi ka yāku kowo Eleasaa ba kēe ni kpuro mwa ni ba kua ka wura mi. <sup>52</sup> Kēe ni tabu kowobun wirugii be, ba Yinni Gusunɔ wē mi, nin bunum mu koo ko nge kilo wunaa wata ka wɔkurun saka. <sup>53</sup> Adama be ba sāa tabu kowobu ba ben arumani ye ba gura tii yiyyawa kpuro. <sup>54</sup> Mɔwisi ka Eleasaa ba ka kēe ni kpuro da ba yi Yinni Gusunɔn kurɔ, Yinni Gusunɔ u n ka win tɔmbu Isireliba yaaye.

*Isireliban bwese kəri ita  
yi sina Yuudenin  
səɔ yari yerusgia*

## 32

<sup>1</sup> Rubenin bwese kera ka Gadin bwese kəran tɔmbu ba yaa sabenu mɔ nu dabi too. Ma ba wa ma Yaseen tem ka Galadin tem mu gea sāa ben yaa sabenun sɔ. <sup>2</sup> Yera ba da ba Mɔwisi ka yāku kowo Eleasaa ka Isireliban wirugibu deema, ba nεε, <sup>3</sup> wuu sini, Atarətu ka Diboni ka Yasee ka Nimura ka Hesiboni ka Eleale ka Sebamū ka Nebo ka sere Beoni, <sup>4</sup> si Yinni Gusunɔ u dera bəse Isireliba sa kamia, sin tem mu gea sāa yaa sabenun sɔ. Wee sa maa yaa sabenu mɔ nu dabi.

<sup>5</sup> Yen sɔ, à n ka sun nənu geu məeran na, a de bu sun tem mε wē bəse wunen səm kowobu. A ku de su Yuudenin təburə.

<sup>6</sup> Ma Mɔwisi u bu wisa u nεε, bəen mero bisibu ba koo dawa ba n tabu mò kpa bəe i n sɔ mini? <sup>7</sup> In yε ma i ko i bu mwia kpanasiawa kpa ba kun kī bu da tem mε Yinni Gusunɔ u bu wē səɔ? <sup>8</sup> Nge meya bəen baababa ba kua yellu sanam mε sa wāa Kadesi Baanəa, ye na bu gəra ba da ba Kananin tem saria

meera. Ye ba da ba tura sere Esikolin wəwəa ma ba tem mən saria meera. <sup>9</sup> Ye ba gəsirama, ma ba begibu Isireliba mwia kpanasia bu ku ka da tem me Yinni Gusunə u bu wẽ səo. <sup>10</sup> Yen tɔ̄ te səo, Yinni Gusunə u məru besira ma u bɔ̄rua u nee, <sup>11</sup> tən be ba yarima Egibitin di mi, be ba wɔ̄ yendu mə ka be ba kere me, ben goo kun duə tem me səo, me u nɔ̄a mwəeru kua u Aburahamu ka Isaki ka Yakəbu wẽ. Domi ba yina bu win gere mem nəəwa. <sup>12</sup> Kalebu, Yefunen bii, Kenasin bweseru səo, ka sere Yosue, Nunin bii, be tənawa ba koo du tem me səo yèn sɔ̄ba nùn mem nəəwa mam mam. <sup>13</sup> Yinni Gusunə u ka bəen baababa məru kua ma u dera ba yaayaare kua gbaburə wɔ̄ weerusere be kpuro ba ka kpeera, be, be ba kua ye yan nùn wẽre. <sup>14</sup> Wee, tẽ bəe, i kĩ i bəen baaba ben yira swi, kpa i de Yinni Gusunə u kpam məru besira ka bəe Isireliba. <sup>15</sup> Domi ì n gerə win swaan di, u koo de bəe kpuro i kpam tẽ gbaburə. Saa ye səo, kpa i de bəegibu bu kam ko.

<sup>16</sup> Ma ba Məwisi wisə ba nee, aawo. Sa ko bəsen yaa sabenu karaba kua kpa su maa wusu bani su gbāranu toosi bəsen kurəbu ka bibun sɔ̄. <sup>17</sup> Yen biru, sa ko tabu yānu sua kpa sa n gbia su ka bəsegibu duusia ben temə, me ba bu wẽ. Sa ye səo, sa ko bəsen kurəbu ka bibu deriwa ba n wāa wuu gbāranugii si səo, tem mən təmbun sɔ̄. <sup>18</sup> Sañ wurə bəsen yənusə ma n kun mə Isireli baawure u win tem mwa. <sup>19</sup> Sà n tem məni wa guru gee sɔ̄ yari yeru mi, sañ maa tem gam kĩ Yuudenin guru gio.

<sup>20</sup> Ma Məwisi u bu sɔ̄wa u nee, ñ n mən na, i de i bəen nəə mwəeru yibia. I tabu yānu suo kpa i da i tabu ko ka wərəbu nge me Yinni Gusunə u bəe yiire. <sup>21</sup> Bəe kpuro, i Yuudenin təburo nge me Gusunə u

kĩ kpa i n wāa mi sere u ka win yibereba gira win wuswaan di, <sup>22</sup> kpa u tem me mwa. Saa ye sōo, in ko i n maa taare gaa mō. I ko i kpī i wurama bœen temō, kpa mu n sāa bœegim. <sup>23</sup> Adama ì kun kue me, i Yinni Gusunō torariwa mi. Kpa i n yē ma bœeya i ko i tora ten are sōbe. <sup>24</sup> I doo i wusu banī bœen kurōbu ka bibun sō, kpa i maa karaba ko bœen yaa sabenun sō. Yen biru kpa i na i bœen nōo mwœeru yibia.

<sup>25</sup> Ma Gadigibu ka Rubeni be, ba Mœwisi wisā ba nœe, Yinni, ye a gerua mi kpuro, sa wura. <sup>26</sup> Sa ko besen kurōbu ka besen bibu ka besen yaa sabenu deri Galadi mini. <sup>27</sup> Kpa bœse kpuro su Yuudenī tōbura sa n tabu yānu neni su ka tabu ko Yinni Gusunōn wuswaao nge me a gerua.

<sup>28</sup> Yera Mœwisi u yāku kowo Eleasaa ka Yosue Nunin bii, ka Isireliban bwese kera baayeren wirugii wooda wē ben sō. <sup>29</sup> U nœe, Gadin bwese kera ka Rubenigia bà n tabu yānu sua ma ba Yuudenī tōbura ka bœe sannu bu ka tabu ko Yinni Gusunōn wuswaao, ma ba bœe somi i ka tem me mwa, i bu Galadin tem wœeyā mu ko begin. <sup>30</sup> Adama bà kun kue me, i ko i bu tem wœwa bœen suunu sœo Kananin temō.

<sup>31</sup> Ma Gadigibu ka Rubeni be, ba kpam nœe, ye Yinni Gusunō u nun sœowa kpuro, sa wura. <sup>32</sup> Sa ko tabu yānu sua su Kananin tem wœri nge me Yinni Gusunō u gerua kpa sa n besen tem mō Yuudenin bera gee.

<sup>33</sup> Ma Mœwisi u Gadigii be ka Rubeni be, ka Manase, Yosefun biin bwese kerañ bœnu Amoreba ka Basanigibun tem kpuro wē, men wuu marosu ka men baru kpaanu, mi Sihoni ka Ogu ba raa bandu dii.

<sup>34</sup> Wuu si Gadigiba ba bana, siya Diboni ka Atarətu ka Aroee, <sup>35</sup> ka Atarətu Sofani ka Yasee ka Yogbea, <sup>36</sup> ka Beti Nimura ka Beti Harani. Ma ba su gbärənu toosi. Ba maa ben yaa sabenu karaba kua.

<sup>37</sup> Wuu si Rubeniba maa bana, siya Hesiboni, <sup>38</sup> ka Eleale ka Kiriataimu ka Nebo ka Baali Meoni ka Sibima. Ma ba si kpuro yīsinu kəsa.

<sup>39</sup> Makiri Manasen biin sikadominu, beya ba Galadin tem wəri ba Amareba gira tem men di ma ba mu mwa. <sup>40</sup> Ma Məwisi u bu tem me wē ba sina mi. <sup>41</sup> Manasen bii wi ba maa mò Yairi, win sikadomina nu da nu Amareban baru kpaanu wori nu mwa, ma nu nu soka Yairin wusu. <sup>42</sup> Yen biru Nəbaki u Kenati wəri u mwa, ka yen baru kpaanu ma u ye soka ka win tiin yīsiru, Nəbaki.

### *Mi Isireliba ba sirena gbaburə*

## 33

<sup>1-2</sup> Sanam me Məwisi ka Aroni ba Isireliba kparama wuuru ka wuuru Egibitin di Yinni Gusunə u Məwisi səəwa u nee, u yoruo mi ba da da. Ye u yorua wee.

<sup>3</sup> U nee, wəən suru gbiikoon səə wəkura nnese səə yera ba Gəə sararibun təə bakaru di nən gbiikiru. Yen sisiru ma ba seewa ba yara Ramusesin di Egibitigibun nəni biru ka toro sindu. <sup>4</sup> Saa ye səə, Egibitigibu ba ben bii gbiikobu sikumə be ba gu saa ye Yinni Gusunə u ka ben būnu siri. <sup>5</sup> Ye Isireliba ba seewa Ramusesin di, ba dawa Sukətuə, ba ben sansani gira. <sup>6</sup> Sukətun di ba da Etamuə tem saaram gam bəkuə, ba ben sansani gira. <sup>7</sup> Saa Etamun di, ba na Pihahirətuə ye ya wāa Baali Sefonin deedeeru ma ba ben sansani gira Migidolin wuswaaə. <sup>8</sup> Saa

Pihahirötun di ba nim wōku tēbura ba da Etamun tem saaram bera gira. Ba sanum sowa sōo ita ma ba da ba ben sansani gira Marao. <sup>9</sup> Saa maran di ba tunuma Elimuə mi nim nənusu wəkura yiru ka kpakpa bēe wata ka wəkura wāa ma ba ben sansani gira mi. <sup>10</sup> Saa Elimun di ba da ba ben sansani gira nim wōkun bōkuə ge ba mō Naa yari. <sup>11</sup> Saa min di, ma ba da bera mi ba mō Sini, mi tem mu sāa saaram. <sup>12</sup> Saa min di ma ba da ba ben sansani gira Dofukao. <sup>13</sup> Saa min di ma ba da Alusio ba ben sansani gira mi. <sup>14</sup> Saa min di, ma ba da Refidimuə ba ben sansani gira mi. Miya Isireliba ba nim bia bu nō.

<sup>15</sup> Saa min diya ba seewa ba da bera mi ba mō Sinai mi tem mu sāa saaram ba ben sansani gira mi. <sup>16</sup> Saa min diya ba da Kiburti Hatafaə ba ben sansani gira mi. <sup>17</sup> Saa min diya ba da ba ben sansani gira Haserötua. <sup>18</sup> Saa min diya ba da ba ben sansani gira Ritimao. <sup>19</sup> Saa min diya ba da ba ben sansani gira Rimao Pəresio. <sup>20</sup> Saa min diya ba da ba ben sansani gira Libinao. <sup>21</sup> Saa min diya ba da ba ben sansani gira Risoa. <sup>22</sup> Saa min diya ba da ba ben sansani gira Kehelatao. <sup>23</sup> Saa min diya ba da ba ben sansani gira guu te ba mō Safeeə. <sup>24</sup> Saa min diya ba da ba ben sansani gira Haradao. <sup>25</sup> Saa min diya ba da ba ben sansani gira Makelötua. <sup>26</sup> Saa min diya ba da ba ben sansani gira Tahatiə. <sup>27</sup> Saa min diya ba da ba ben sansani gira Tarakiə. <sup>28</sup> Saa min diya ba da ba ben sansani gira Mitikao. <sup>29</sup> Saa min diya ba da ba ben sansani gira Hasimənao. <sup>30</sup> Saa min diya ba da ba ben sansani gira Məserötua. <sup>31</sup> Saa min diya ba da ba ben sansani gira Bene Yakanio. <sup>32</sup> Saa min diya ba da ba ben sansani gira Hori Gidigadio. <sup>33</sup> Saa

min diya ba da ba ben sansani gira Yotibatao. <sup>34</sup> Saa min diya ba da ba ben sansani gira Aborona. <sup>35</sup> Saa min diya ba da ba ben sansani gira Esioni Gebεε. <sup>36</sup> Saa min diya ba da ba ben sansani gira Kadesio bera mi ba mà Sini, mi tem mu sāa saaram. <sup>37</sup> Saa min diya ba da ba ben sansani gira guu te ba mà Hori Edəmun tem nəə buru yero.

<sup>38-39</sup> N deema n kua wəə weeru saa min di ba yarima Egibitin di. Saa ye, yāku kowo Aronin wəə wunaa teeru ka itawa mi. Ma u yəəwa guu ten wəllə nge me Yinni Gusunə u nùn səəwa. Miya u kpuna u gu wəən suru nəəbusen təə gbiikiru səə. <sup>40</sup> Ma Aradin sina boko wi u sāa Kananigii u ka wāā Kanani yen səə yēsan nəm dwarzia, u nua ma Isireliba ba tunuma.

<sup>41</sup> Ye Isireliba ba seewa Hori min di, ma ba da Salumənə, ba ben sansani gira. <sup>42</sup> Saa min diya da ba ben sansani gira Punəəwə. <sup>43</sup> Saa min diya ba da ba ben sansani gira Obətu. <sup>44</sup> Saa min diya ba da ba ben sansani gira Iye Abarimu Məabuban tem nəə buru yero. <sup>45</sup> Saa min diya ba da ba ben sansani gira Diboni Gadio. <sup>46</sup> Saa min diya ba da ba ben sansani gira Alimə Dibilataimu. <sup>47</sup> Saa min diya ba da ba ben sansani gira Abarimun guunun bera gia, Nəbon deedeeru. <sup>48</sup> Ye ba doona Abarimun guunun di, ba nawə Məabuban wəwəa Yuudenin bəku, Yerikon deedeeru. <sup>49</sup> Ma ba ben sansani gira mi, saa Beti Yesimətin di, n ka girari Abelis Sitimu.

### *Yinni Gusunə u wooda wə*

#### *bu Kananin tem bənu ko*

<sup>50</sup> Yinni Gusunə u ka Məwisi gari kua Məabun wəwəa, Yuudenin bəku, Yerikon deedeeru, u

nεε, <sup>51</sup> a Isireliba sɔɔwɔ a nεε, sanam mε ba koo Yuuden'i tɔbura bu du Kananin temɔ, <sup>52</sup> bu tem men tɔmbu kpuro giro ben wuswaan di kpa bu ben bwāarokunu kɔsuku ni ba dāka ka ni ba seka, ka sere maa ben yāku yenu. <sup>53</sup> Bu tem mε mɔɔ kpa bu sina mi, domi na bu mu wεwa mu n sāa begin, <sup>54</sup> kpa bu tem mε bɔnu ko ka tete nge mε ben bwese kerin tɔmba geeru nε. Bèn tɔmbu ba dabi, bu bu tem wεyeɔ mu n kpā. Be bañ maa dabi kpa u bu wε fiiko. Ba koo bwese kera baayere yen tem wεwa bera ye ba tete di kpa mu n sāa begin. <sup>55</sup> Adama bà kun tem men tɔmbu gire ben wuswaan di, be ba deri mi, ba ko n sāawa nge sāki yi yi ko n ben nɔni sɔkumɔ, ka yabiri yi yi ko n bu sɔkirimɔ bera ka bera. Ba ko n sāawa ben yibereba tem mε sɔɔ, mi ba koo sina mi. <sup>56</sup> Saa ye, beya kon kua ye na raa gɔru doke n yibere be kua.

### *Kananin tem nɔɔ bura yenu*

## 34

<sup>1</sup> Yinni Gusunɔ u ka Mɔwisi gari kua u nεε, <sup>2</sup> a Isireliba sɔɔwɔ a nεε, bà n dua Kananin temɔ, mε mu koo ko begin, men nɔɔ bura yenu wee.

<sup>3</sup> Sɔɔ yεsan nɔm dwaru già mu koo nɔɔ yɔrawa bera mi ba mò Siniɔ mi tem mu saaram sāa kpa gu maa da Mɔabun tem bɔkuɔ. Nɔɔ ge, ga koo torewa nim wɔku bɔruguun bɔkuɔ, sɔɔ yari yeru già. <sup>4</sup> Min di, kpa gu fuka gu da Akarabimun guunu già sɔɔ yεsan nɔm dwarɔ kpa gu bera mi ba mò Sinin sukum sara sere ka Kadesi Baaneaɔ, n ka da Hasaa Adariɔ sere ka Asimɔɔwɔ. <sup>5</sup> Saa Asimɔɔn di kpa gu maa da Egibitin daa tora gaan mi kpa gu da gu yɔra nim wɔkuɔ ge ba mò Mediterane.

**6** Sõo kpee yeru gia men nõo ga koo yõrawa nim wõku teu gen mi.

**7** Sõo yësan nõm geu gia ba koo tem men nõo suawã saa nim wõku gen min di n ka da Horin guuro. **8** Min di, ba koo de gu kpewa ka Hamatiõ n ka na Sedadiõ.

**9** Kpa gu doona min di gu da Siforoniõ kpa gu da gu yõra Hasaa Enaniõ. Miya n ko n sãa bœen tem nõo bura yeru sõo yësan nõm geu gia.

**10** Sõo yari yeru gia maa, men nõo bura yera koo torewa saa Hasaa Enanin di kpa tu da Sefamuõ.

**11** Saa Sefamun di kpa tu da Ribilan bera gia Ainin sõo yari yeru gia kpa tu Kineretin daa burerun gooru bëwa. **12** Saa min di, kpa tu da Yuudenin bera gia kpa tu da tu yõra nim wõku bõruguuõ. Mi n ko n sãa bœen tem nõo bura yeru miya mi.

**13** Ye Mowisi u Isireliba gari yi sõowa ma u maa nee, tem meya mi, me Yinni Gusuno u himba kua u bœe bwese keri nõoba nne ka bõnu wë i bõnu ko ka tete. **14-15** Bwese keri yiru ka bõnu yeni, Rubenigiru ka Gadigiru ka Manasegirun bõnu, ba ben tem mwa ko Yuudenin bera gee, Yerikon deedeeru, sõo yari yeru gia.

### *Wirugii be Gusuno u gosa bu ka tem me bõnu ko*

**16** Yinni Gusuno u Mowisi sõowa u nee, **17** yâku kowo Eleasaa ka Yosue Nunin bii, beya ba koo tem men bõnu kobun wunano su ko, **18** kpa a ben bwese kera baayeren di wirugii turo wuna u raa bu somi.

**19** Be ba koo bu somi, beya

Kalebu, Yefunen bii, Yudan bweseru soõ.

**20** Ka Samueli, Amihudun bii, Simeon bweseru soõ,

**21** ka Elidadi, Kisilonin bii, Benyameen bweseru soõ,

**22** ka Buki, Yogilin bii, Danun bweseru soõ,

<sup>23-24</sup> ka Hanieli, Efodun bii, Manasen bweseru sāo  
ka Kemueli, Sifitanin bii, Efaramun bweseru sāo.  
N deema Manase ka Efaramun bwesenu nu sāawa  
Yosefun bwese keri.

<sup>25</sup> Ka Elisafani, Paanakin bii, Sabulonin bweseru  
sāo,

<sup>26</sup> ka Patielil, Asanin bii, Isakarin bweseru sāo,

<sup>27</sup> ka Ahihudu, Selomin bii, Aseen bweseru sāo,

<sup>28</sup> ka Pedaheli, Amihudun bii, Nefitalin bweseru  
sāo.

<sup>29</sup> Be Yinni Gusuno u gosa bu ka Isireliban bwese  
keri Kananin tem mē bənu kua, bera mi.

## 35

### *Wuu si ba Lefiba wē*

<sup>1</sup> Yinni Gusuno u ka Mōwisi gari kua Mōabun  
wōwāo, Yuudenin bəkuo, Yerikon deedeeru u nēe,  
<sup>2</sup> a Isireliba sāowā bu wusu gosi ben tem sāo bu  
Lefiba wē mi ba ko n wāa ka sere maa kpara yenu.

<sup>3</sup> Lefiba ba koo sinawa wuu marosu sāo, kpa ba  
n tem mō mi ba ko n da ben yaa sabenu kpare.

<sup>4</sup> Kpara yee ni i ko i bu wē mi, nin yasum mu ko n  
sāawa gōm soonu nōrōbu (1.000) saa gbārarun beri  
berikan di, <sup>5</sup> kpa nin dēebu bu n sāa gōm soonu  
nōrōbun suba yiru (2.000) sāo yari yeru gia, ka sāo  
duu yeru gia, ka sāo yēsan nōm dwaru gia, ka maa  
nōm geu gia, kpa wuu ga n wāa suunu sāo. Nge meya  
ben kpara yee ni, nu ko n sāa wuu baagere sāo. <sup>6</sup> Ba  
koo bu wusu nōoba tia wē mi wi u tōnu go u ko n  
da kpikiru de, ka maa wusu gasu weeru ka yiru.

<sup>7</sup> Wuu si kpuro su ko n sāawa weeru ka nōoba ita, ka  
sin kpara yenu. <sup>8</sup> Isireliban bwese kera baayere ya  
koo Lefiba wusu wēwa nge mē yen tem mu kpāaru

nε. Be bā dabi bā koo wēwa n̄ dabi. Be bañ maa dabi, kp̄a bu wē fiiko.

### *Wuu s̄in mi*

#### *ba ko n̄ da kpikiru de*

<sup>9</sup> Yinni Gusun̄ u M̄wisi s̄ōwa u n̄εε, <sup>10</sup> a Isireliba s̄ōw̄ a n̄εε, b̄a n̄ Yuuden̄ t̄bura ba dua Kananin tem̄, <sup>11</sup> bu wusu gasu ḡsio mi wi u kun k̄i u ka t̄nu go u ko n̄ da kpikiru de, <sup>12</sup> sere bu ka n̄ùn da bu siri t̄mbun wuswaā. Nge meya u koo ka yari wi u k̄i u n̄ùn m̄eru k̄osian n̄oman di. <sup>13</sup> Wuu s̄in mi ba ko n̄ da kpikiru de, su ko n̄ s̄āwa n̄ōba tia, <sup>14</sup> ita ya n̄ wāa Yuuden̄in s̄ō yari yeru gia, ita ye ya maa tie ya n̄ wāa Kananin tem̄. <sup>15</sup> Isireli goo, n̄ kun m̄e s̄ō wi u wāa Isireliban suunu s̄ō, ù kun k̄i u ka t̄nu go, u koo kp̄i u kpikiru da wuu sin gagun mi.

<sup>16-19</sup> Goo ù n̄ t̄nu so u go ka gāa ni ba kua ka sisu, n̄ kun m̄e ka kperu, n̄ kun m̄e ka bokuru, u s̄āwa t̄n gowo. Wi u go min t̄nu u koo maa n̄ùn m̄eru k̄osie u gowa. <sup>20</sup> Goo ù n̄ win winsim tusa u b̄eria, n̄ kun m̄e u n̄ùn gāanu kara, <sup>21</sup> n̄ kun m̄e u n̄ùn so ka n̄oma u go, ba koo yēron t̄ii gowa, domi u s̄āwa t̄n gowo. Wi u go min t̄nu u koo maa n̄ùn m̄eru k̄osie u gowa.

<sup>22-23</sup> Goo ù kun maa k̄i u ka win winsim b̄eria, n̄ kun m̄e u n̄ùn kara ka gāanu n̄ kun m̄e, u ka n̄ùn kperu so u go, <sup>24</sup> t̄mbu ba koo ye ya koora min saria m̄eeriwa bu ka yēro siri wi u t̄nu go mi. <sup>25</sup> Kp̄a bu n̄ùn wiru dwe bu de u wura wuu ḡen mi u raa kpikiru da, kp̄a u s̄ina mi sere yāku kowo t̄nwero u ka gbi wi ba gum t̄are wir̄o. <sup>26</sup> Wi u t̄nu go mi, ù n̄ yara wuu gen min di, ḡen mi u kpikiru da mi, <sup>27</sup> ma wi u k̄i u n̄ùn m̄eru k̄osia u n̄ùn go, yēro kun taare

gaa mɔ. <sup>28</sup> Domi wi u tɔnu go mi, n weenɛ u sinawā wuu mi u raa kpikiru də sere yāku kowo tɔnwero u ka gbi. Yen biru u koo kpī u wura win temɔ.

<sup>29</sup> Wooda beniwa ba ko n da swīi, be ka ben bibun bweseru yam kpuro mi ba wāa.

<sup>30</sup> Goo ù n tɔnu go, tɔn dabira ba koo yen seeda di bu sere yēro go. Tɔn turon seeda dibu kun tura bu ka tɔnu taare wē bu go. <sup>31</sup> Bu ku nɔm biran kēru mwa bu ka tɔn gowo deri. N weene u gbiwa kam kam. <sup>32</sup> Ban̄ maa nɔm biran kēru mwaamə bu ka de u da wuu gèn mi ba ra kpikiru de, kpa u wura win temɔ yāku kowo tɔnwero ù n gu.

<sup>33</sup> Bu ku raa tɔnu go, domi yera ya koo ben tem disi doke. N ñ maa koorɔ bu mɛ dēerasia ma n kun mɔ ba yēro go, wi u tɔnu go mi. <sup>34</sup> Bu ku raa tem mɛ disi doke mɛ sɔɔ ba ko n wāa, domi ne Yinni Gusunɔ, ko na n wāa ka be, ne wi na ra n wāa be Isireliban suunu sɔɔ.

*Kurɔ suabun wooda ye ba yi*

*tɔn kurɔ be ba tem tubi din sɔ*

## 36

<sup>1</sup> Manasen bweseru ta sāawa Yosefun bwese kera. Bwese te sɔɔ, Galadi u sāa Makirin bii, Manasen debubu. Galadi win bweserun wirugibə ba da ba Mɔwisi ka Isireliban yenu yērobu deema, <sup>2</sup> ba nɛɛ, Mɔwisi, wee sanam mɛ Yinni Gusunɔ u nun yiire a Isireliba tem bənu kua ka tete, u nun sɔɔwa u nɛɛ, a besen mɔɔ Selofadin tem win bii wɔndiaba wē. <sup>3</sup> Tɛ, bii wɔndia be, bà n durɔbu sua Isireliban bwese keri yi yi tien gaa sɔɔ, ba koo ben tem mɛ ba tubi di suawa bu bwese kera yēn mi ba wura sosia. An̄ wa ma besen tem mu koo kaara mɛ ba sun wē ka tete? <sup>4</sup> Isireliban yakiabun tɔru tà n

tunuma, ba koo ben bənu wunawa bəsen min di bu ye bwese kera yèn mi ba wura sosia.

<sup>5</sup> Ma Məwisi u Isireliba sə̄wa u nε̄, Yosefun bweserun tən be, ba gem mə. <sup>6</sup> Wee ye Yinni Gusunə u gerua Selofadin bii wəndiaban sə̄. U nε̄, ba koo kpī bu durə sua wi ba kī, adama ya n gesi sāa ben tundon bwese kera sə̄. <sup>7</sup> Isireliban bwese kera gaan tem muñ duə bwese kera gaan tem sə̄. Isirelin bwese kera baayere, ya koo yen tem nənəwa mε ya tubi di. <sup>8</sup> Tən kurə baawure wi u tem wa u tubi di Isireliban bwese kera gaa sə̄, u koo durə suawa win bwese kera ye sə̄, u wa u ka win tundon tem mε u tubi di nənε. <sup>9</sup> Bwese kera gaan tem kun duə bwese kera gaan tem. Adama Isireliban bwese kera baayere ya koo yen tem nənəwa kem kem mε ya tubi di.

<sup>10-11</sup> Ma Selofadin bii wəndiə be, Mala ka Tirisa ka Hogula ka Milika ka Nəa ba Yinni Gusunən wooda ye wura ye u Məwisi wə̄ mi. Ma ba ben tundon maabu ka wənəbun bibu sua durəbu. <sup>12</sup> Ba durəbu suawa Yosefun bwese kera sə̄, Manasen bibun bweserə, ma tem mε ba tubi di muñ menanə ka ben tundobun tem.

<sup>13</sup> Wooda ka yiire bi Yinni Gusunə u Isireliba wə̄ Məwisin min di, Məabun wəwəsə, Yuudenin bəkuə, Yerikon deedeeru, biya mi.

**Bibeli Gusunɔn Gari**  
**The Holy Bible in the Baatonum language of Benin,**  
**also called the Bariba language**

copyright © 2013 SIM

Language: Bariba (Baatonum)

Translation by: SIM International

**Bariba, Bibeli Gusunɔn Gari**

This translation, published by the UEEB/SIM au Benin, was published in 1996.

If you are interested in obtaining a printed copy, please contact the SIM at SIM, BP 15, Parakou, Benin.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-09-10

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
00601790-b883-5da1-83f2-d05a7fa289a8